

## MAAKI

# Maakiva Iesusiva nrohurara tura

*Ioniva nramanri nyi varu vaisiva nraakyе qora  
timwa nyu quara*

*(Matiu 3:1-12; Ruku 3:1-18; Ioni 1:19-28)*

<sup>1</sup> Iesusiva Kotira mwaaquvanto varura. Mwia qua kyuqe qua mwia okyara vahirero mwataamama vahiro.

<sup>2</sup> Haaru mpo enta Aisaiaava Kotira qua qovarama kyero qara ntumwa tero tiqaro,  
Taqaante, ni qua nraakyе qora timwa nyiani  
vaisira

nte titaariro mwiva i vuni viqaro  
i aanra terama mwataananrove. *(Marakai 3:1)*

<sup>3</sup> Mwi vaisiva qumina mwataqaa variqaro  
aakyara ntero tiqaro,  
Nronravanto quani aanranra terama mwateta  
mwia aanra avuqavuma mwataivaro mwiva  
mwi  
aanranraqaama qio quarive qiananrove, tura.  
*(Aisaiaa 40:3)*

<sup>4</sup> Kotiva mwia kyaahaqa huvaro Aisaiaava tohare varu entara mwi quara qara ntumwa tovaro airi ihi vi vuvaro mpo enta Ioniva qumina mwataqaa qovarama vura. Qumina mwataqaa qovarama viro Ioniva nraakyе qora nramanri nyiqanro mwihua timwa nyinro tiqaro, Nkyeta qora kyaiqa vare varira qaqlira kyeta nramanri varaivaro Kotiva nkye qora kyaiqa vare vari quara nruka nyataarive, tiro.

**5** Ioniva mwitaa ti varuvata Iutiasaitave, Ierusaremisaitave, ekyaa mwi mwatanaahua hisai hisai mwiva qua tunani vita uto variqata mwihua nkyiari qora kyaiqa vare varura timwa qovarama kyovaro Ioniva nramanri mwihua nyunra.

**6** Ioninra tuavaaqa vahirero mpo quara kameri kyaahi vara kyero ututo tuavaaqava vahuvaro mwiva mwia nraahu ututero reti tavaarana rupatero varura. Ioniva hia kyara vara tu kyero nrraitiro, mwiva kainyaaqa nrenro voravanto kuruto nramanrinra nreqanro mwi kyarara nraahu nre varura.

**7** Ioniva nraakye qora timwa nyinro tiqaro, Ni naakiara nrianri vaisiva kepukyavanto ni naatara kyero nronra vaisivantoma variananrove. Mwiva nronra vaisivanto varihana nte qumina vaisi variqananra tina, hia nte qio kakataama vina nai kyuqu nraamwuma tai kyaantara huvantu mwataaninrave.

**8** Nte qati nramanri nkyi nyi varuqo. Mwiva Kotira mwanraqura nkyi nyiananrove, tiro. Ioniva mwitaa turama.

*Ioniva Iesusira nramanri mwunra  
(Matiu 3:13-17; Ruku 3:21-22)*

**9** Mwi entara Iesusiva Nasareti mwatukya Karirisairo nri ntero Ioniva varunani utontero vuvaro Ioniva Iotaani nramanriqi variqaro Iesusira nramanri mwunra.

**10** Nramanri mwia mwuvaro Iesusiva nramanriqitairo qatinani mwaanri ntero taqovaro nyaamwuvanto qatua vuvaro mwiqitairo Kotira mwanraquravanto nyaamwa

minrunra voti huva tumu ntero Iesusiraqaa varura.

<sup>11</sup> Tumu Iesusiraqaa varuvaro quavanto nyaamwusairo mwitaama tiro:  
E ni maaqvanto variararo  
ni mutukyavanto iara mpoqiaavata vaiho.  
Nte iara qamwateqanama varuquo, tiro.

*Saataaniva Iesusira mwataara hura*  
(*Matiu 4:1-11; Ruku 4:1-13*)

<sup>12</sup> Quavanto nyaamwusairo mwitaa tuvaro qamwanrama kyero Kotira mwanaraquravanto Iesusira vita varero qumina mwataqaa hia vaisivata varu mwataraqaa uro kyovaro varura.

<sup>13</sup> Mwini uro kyovaro Iesusiva 40 entara variqiro vuvaro Saataaniva Iesusirara qora kyaiqa varaarive tiro, mwia mwataara hiqaro taqovaro Iesusiva hia mwia qua riaraitiro, hia qora kyaiqa utura. Iesusiva mwitaamaqiro viqaro qaakyau vahikurivant nrohi varunani varuvata nyaamwunyaa vaisinramwu tumu mwiaqaa kyuqema kyeta ntaqikyi varura.

*Iesusiva Karirini uro nai kyaiqa toharora*  
(*Matiu 4:12-17; Ruku 4:14-15*)

<sup>14</sup> Mwi entara mpo uhua Ioninra ntavaaqavu kyeta viteta karavuqi uro kyovaro Iesusiva Karirini uro variqaro Kotira mwakyaakya kyuqe mwakyaakya nraakye qora timwa nyinro tiqaro,

<sup>15</sup> Mwi entava nri ntaiho. Kotiva nkyiqa ntaqikyiari entava qaumaqa iho. Nkye qora kyaiqa uti varira qaqlira kyeta nte kyuqe mwakyaakya timwa nyianinra nkye mwi quarara quitaave timwa kyeta riemwaqi quate, tura.

*Iesusiva Saimonikya Enturukya nyaanronra  
(Matiu 4:18-20)*

<sup>16</sup> Iesusiva mwitaa timwa kyero vuva Kariri rumpua tokya sataa viqaro taqovaro Saimoniva nai qata Enturukyantiri variqaro vahe nte varura. Mwitanahua tavukya kyaiqa vare varutanahua vahe nte varuvaro

<sup>17</sup> Iesusiva mwitanahuara tiqaro, Nkyetana ni naakiara nriate. Nkyetana vahe ntamwa kyeqata tavukya varaantema kyeta ni naakiara nriqata nraakye qora sitevarave, tiro.

<sup>18</sup> Iesusiva mwitaa tuvata mwitanahua mate mwiqiara nkyiari vahe mwini kyeta Iesusira vatavare vurama.

*Iesusiva Iemisikya Ionikya nyaanronra  
(Matiu 4:21-22)*

<sup>19</sup> Mwitanahua mwia vatama kyeta vuvaro Iesusiva pataqiaqa viqaro taqovata Sepetira mwaaqutana Iemisivavata, mwia qata Ionivavata, mpotuqi variqata vahe ntuke hi vura haqire varura.

<sup>20</sup> Mwitanahua vahe haqire varuvaro qamwanrama kyero Iesusiva mwitanahua nraanrovata mwitanahua rieta nkyiari sora Sepetiravata, mwia kyaiqa varo vaisihuavata, mpotuqi kyeta Iesusira vatama kyeta vurama.

*Iesusiva vaana titovaro nritarero vura  
(Ruku 4:31-37)*

<sup>21</sup> Mwitanahua Iesusira vatama kyeta vuvaro Iesusiva vuva Kapenaamini uro variqaro mwaanra tu entaraqaa mwaanra nraamwuqi vera ntero variqaro mwipi varuhua mwakyaakya timwa nyinro.

**22** Iesusiva nraakye qora timwa nyi varuvata mwihua mwia qua rieta tiqata, Qikye, mwiva nanra quave tiri timwa timwiho? Mwiva hia mwaanra okyara ti varia vaisinramwuhua qiantema kyero ti variho. Mwiva nronra vaisivanto qiantema kyero ti variho, tura.

**23** Mwitaa tuvaro Iesusiva mwaanra nraamwu mwipi varuvaro vaanavanto mwia utaqi varu vaisiva nraamwuqi vera ntero qua aakyara ntero tiqaro,

**24** Iesusio, e Nasaretinyaavave. E tiri nataa hirerarave nrianro? E tiri ntuqutu taiqa kyarerarave nrianro? Nte i okyara ntapihi kyauba e nrianro. Kotiva i titaihara e Kotira kyaiqa nraahu vare variarava variaro, tiro.

**25** Mwitaa tuvaro Iesusiva vaana mwia inronra hiro tiqaro, Tirema variante. Mwi vaisiraqtaira nritarera quante, tiro.

**26** Iesusiva mwitaa tuvaro vaana mwiva mpoqama kyero mwi vaisira tu varero qakya qakyaama kyero qua aakyara timwa mwatero qatinani nritarero viro.

**27** Vaanavanto nritarero vuvata mwipi ntuvantuama vita varuhua kyauqu ntukikinraaqata kyeqata nai timwa mwi nai timwa mwi hita tiqata, Nanra inraikyavantove qovarama viho? Mwaa quara qaraakya quave. Mwi vaisiva kepukya qua tihatama vaanavantovata mwia qua riaavo, tura.

**28** Mwihua mwitaa timwaqi vita nrita huvata ekyaa Karirini varuhuavata mwi quara riora.

*Iesusiva Saimoninra nrinraatarara  
kyahaqama kyovaro qati sivura  
(Matiu 8:14-15; Ruku 4:38-39)*

**29** Iesusiva mwaanra nraamwuqitairo veva ntero Iemisikya Ionikya sita varero vuva uro Saimonikya Enturukya nraamwuqi vera ntero varura.

**30** Saimoninra nrinraatarara mwamwanta tutoqa huvaro taintaqaa vaite varuvata mwihua mwianra Iesusira timwa mwita.

**31** Timwa mwuvaro Iesusiva mwia uro taqero mwia kyauquqa tu varero mwia mwaamwianrama kyero. Mwitaama kyovaro mwia mwamwantavanto kyuqema viro naitarama vahuvaro mwi nraakyeva siviro kyara uta nyinrenro tera hora.

*Iesusiva nriqa vuhua kyaahaqama kyovata qati varura  
(Matiu 8:16-17; Ruku 4:40-41)*

**32** Iesusiva mwi mwatukyaraqi varuvaro huarivanto vikyovaro entama vuvata nraakyе qora nriqa vuhuavata, vaanavanto utaqi varuhuavata, sita vareta Iesusiva varunani uro kyora.

**33** Mwitaa huvata ekyaa mwi mwatukyaraqinaahuavata Iesusiva varu nraamwunra qesa mwina nrumbu varita huvai kyora.

**34** Huvai kyeta varuvaro Iesusiva nraakyе qora airintikara mpo qara mpo qarama kyero nriqa vuhua kyuqema nyatovaro mwihua nriqa vuva taiqa vuvata qio varura. Qio varuvaro vaanavantovata airi vaisiqi varuhua sitamwa kyovata nritareta vura. Nritareqata vi varuvaro Iesusiva

vaana mwihuara qao tiro tiqaro, Hiavata qua qiate, tiro. Vaanavanto Jesusira ntapihi kyovarora tiro, Jesusiva mwitaa tura.

*Iesusiva Karirini nrohiqaro qua mwakyaakya timwa nyunra*

(*Ruku 4:42-44*)

<sup>35</sup> Mwia qanranraa hia qaatatovaro Jesusiva siviro veva ntero uro hia vaisivantovata varunani Kotiravata qua tirero vura.

<sup>36</sup> Mwini vuvaro Saimoniva nai henahuvatama kyero mwia puua hirero viro.

<sup>37</sup> Vuhua uro Jesusira puaama kyeta mwinramwuhua mwianra tiqata, Qutaara e mwaini variarata ekyaa mwaa mwatukyaraqinaahua iara puua hi variavo, tita.

<sup>38</sup> Mwinramwuhua mwitaa tuvaro Jesusiva qaqao tiro, Varavaqenramwu mpo mwatukya mpo mwatukyavata nrohiqata qua mwakyaakya nraakye qora timwa nyianre. Nte mwakyaakya mwihua timwa nyinrenra nruvave, tiro.

<sup>39</sup> Mwitaa timwa kyero mwinramwuhuavata sita varero Karirini nrohi variqaro mwaanra nraamwu mpoqi mpoqi vera ntero variqaro mwakyaakya nraakye qora timwa nyiqiro viqaro vaisi utaqitairo vaanavata sitamwa kyovata nritare vurama.

*Tauma rumpuara utu vaisira kyaahaqama kyora*

(*Matiu 8:1-4; Ruku 5:12-16*)

<sup>40</sup> Iesusiva mwakyaakya timwa nyiqiro vi varuvaro vaisi mpovanto tauma rumpuara utu vaisiva Iesusiva varunani uro ntero tori kyauru raviro Iesusirara po kye tiqaro, E ni kyaahaqa

hiataa hirera, e qiona ni tauma rumpuara nruka matenanrave, tiro.

<sup>41</sup> Mwitaa tuvaro Iesusiva mwi vaisirara po kye timwa mwatero, nai kyauqu mpiami mwia mwamwantaqa vatero tiqaro, Nte mwitaa hiataa ihana i mwitaama mwatarerave. I mwamwanta kyuqema quarive tuqo, tuvaro

<sup>42</sup> mwia tauma rumpuaravanto qamwanrama tavanta vuvaro mwiva qio varura.

<sup>43</sup> Mwiva qio varuvaro Iesusiva mwi vaisirara kepukyaqama kyero tiqaro,

<sup>44</sup> Hia mpohuavata timwa nyinraitira, vi-raro Kotira kyaiqa vara mwate vari vaisiva i mwamwanta taqaarive. Mwiaqataira e Mosesiva mwaanra qua timwa tora rieqarama Kotira mpo inraikya mwinrata nraakye qoravanto iara tiqata, Qutaama mwia mwamwanta kyuqema viho qiate, tiro.

<sup>45</sup> Iesusiva mwitaa tuvaro mwi vaisiva hia Iesusiva tunte hiraitiro, mwi quara viti timwa nyi viri timwa nyi huvata ekyaa vaisi riovoro mwia kyaara Iesusiva mpo mwatukya mpo mwatukya qoqaa quariva hia vahuvaro mwiva qaqlira kyero hia mwatukyan viraitiro, qumina sata variqiro vuvata nraakye qora hisai hisaita mwia taqarerata nrunrama.

## 2

*Iesusiva hini mwamwanta qutu vu vaisira  
kyuqema mwatora*  
*(Matiu 9:1-8; Ruku 5:17-26)*

<sup>1</sup> Iesusiva Karirini nrohi ntero nrumu ntantero Kapenaamini uro varuvata mwi mwatanaahua Iesusiva nrumu variho tu quara rieta

<sup>2</sup> mwihsa airivanto uro Iesusiva varu nraamwunraqi ntuvantuama vita nraamwu mwiavata ru piqa kyeta qesanavata huvaiqu kyovaro mpovanto mwiqi vera ntaariva hia qioqa hora. Mwitaa huvaro Iesusiva nraamwu mwiqi variqaro mwakyaakya timwa nyi varura.

<sup>3</sup> Iesusiva timwa nyi varuvata vaisi mponramwuvanto nkyiari hena vaisi mpo mwia mwamwanta hini qutu vura taintama vare nrunra. Erahiamuaantema vaisinramwu mwia taintama vareta nrunra.

<sup>4</sup> Mwinramwuhua nri nteta Iesusira nraaqani quananrave tita, taqovata nraakyehora airivanto varuvata mwinramwuhua nraamwu utaqi vera nteva hia qioqa hora. Hia qioqa huvata mwinramwuhua qaqlira kyeta nraamwu qiatatahiporaqaa mwaanri nteta mwi vaisira vara mwaanri vateta, Iesusiva nraamwu utaqi varuvata mwinramwuhua Iesusiva varura mwina mpiami ntukuraa kyeta. Qio ntukuraa kyeta nriqa vu vaisira taintaqaa vatora qakyomakye kyaqi vuvaro mwi taintava nraakyehora utaqaa uto vahura.

<sup>5</sup> Vahuvaro Iesusiva riovata mwi vaisinramwuhua nkyiari nraahu tiqata, Qutaama mwaa vaisira Iesusiva qio kyuqema kyaananrove, tu vaisinramwuhua varuvaro Iesusiva hini mwamwanta qutu vu vaisirara tiqaro, Ni maaquo, e Kotira qua raaquta kyaananra nte mwi quara nrukama mwatauqo, tiro.

**6** Jesusiva mwitaa tuvata mwaanra okyara ti varu vaisinramwuhua mwiqi varuhua riemwaqi vita tiqata,

**7** Qaqao, mwi vaisiva nanraqamave mwitaa tiho? Mwiva mwitaa tiqaroma Kotira uaqima mwate variho. Hiama qumina vaisivanto variqaro nai hena vaisiara, E Kotira qua raaquta kyaananra nruka mwatauqo, qiananrove. Kotiva mwiva nraahuma qio mwitaa qiananrove, tita.

**8** Mwihua mwitaama nraato riovoro Jesusivavata mwihua su nyaato tura ntapihi kyero tiqaro, Nkye nataamaqive mwitaama riaavo?

**9** Nte mwaa vaisira hini mwamwanta qutu virara tiqanama, E Kotira qua nteqa kyaananra nte nrukama mwatauqo, tuqatama nkye nianra tiqata, Qaqao, i quavanto unra quave. Hia quataa qovara hiananrove, qiarave. Qio mwaini riaate. Nte mwi vaisirara tiqana, Sivira ena tainta tu varera quante, qiariro qiove ni quara mwiva mwitaa hiananrove? Nkye timwa mpivaqena riaankye, tiro.

**10** Jesusiva mwitaama kyero mwihua kyanarama nyatero mwiva mwihuara qaiqaa tiqaro, Nte mwatani mwatatai nraaqiarava varuqaro ni nronraqama kyaihananra tina, nte qioma mwatani variqana vaisivanto Kotira qua nteqa kyaani quara nruka kyaaninrave. Nkye ni quara quataa quave qiate tina, nte mwate mwaa vaisirara mwitaa tirerave, tiro.

Mwitaa timwa kyero Jesusiva hini mwamwanta qutu vu vaisirara tiqaro,

**11** Sivira ena tainta tu varera ena mwaatani quantema tuqo, tiro.

**12** Mwitaa tuvata ekyaan nraakye qora mwia taqe varuvaro mwi vaisiva siviro mpiami nai tainta tu varero vuvata mwihua nrighanrama vita kyauqu ntukikinraaqate varita Kotira nrutu tuaahereta tiqata, Mwaa kyaiqara nraahumwa mpo qara hi kyaiqara hia taqauna kyaiqarave, tura.

*Iesusiva Rivaira nraanronra  
(Matiu 9:9-13; Ruku 5:27-32)*

(Mwi entara taakisi vare varu vaisihuamponramwuvanto taakisi vareqata hini munima nkyiari tuteta hini munima nraahu nkyiari nronra vaisi nyunra. Mwitaa huvata qumina nraakye qoravanto taakisi varo vaisihuua ekyaan mwihuara mpuara vaisi nraahuma variavo tura.)

**13** Iesusiva Kapenaamini vari kyero mwiaqaatairo nrumu ntantero Kariri nramanritokyasataa vuvata nraakye qora airivanto mwiva varunani ntuvantuama vita varuvaro Iesusiva qua mwakyaakya mwihuua timwa nyinro.

**14** Mwiaqaatairo mwiva vuva uro variqaro taqovaro Rivaiva, Arapiaasira mwaaquvanto, opisi nraamwuqi taakisi vare varuvaro Iesusiva mwianra tiqaro, Ni naakiara nriante, tiro. Mwitaa tuvaro Rivaiva siviro Iesusira vataqiro vurama.

**15** Iesusiva Rivaira nraamwuqi uro variqaro nai nraaqiaranramwuvata kyara nre varuvata airi vaisi taakisi vare varuhuavata, vaisi mponramwu mwihuara uaqiahi kyaiqara uti variahuave tuhua mwihuavata, nraamwu mwipi variqata kyara nre varura.

**16** Iesusiva vaisi mwinramwuhua kyapata kyara nre varuvata Parisi vaisi mwaanra

okyara ti varuhua taqovaro Jesusiva taakisi vare varuhuavata, uaqiahi kyaiqara uti variahuate tuhua mwihuavata, kyara nre varuvata mwihua Jesusira nraaqiaranramwu kyapara hita tiqata, Nanraqamave Jesusiva uaquia hia vaisihua kyapata kyara nre variho? tita.

<sup>17</sup> Parisi vaisinramwuvanto mwitaa tuvaro Jesusiva mwihua qua riero tiqaro, Qati vari vaisiva hia totaava hinani vi varirave. Nriqa vi vaisiva nraahu totaava hinani vi varirave. Ta vaisihuave tiqata, Tire avuqavuma kyeta nrohi varurahuave qiahua, nte hia mwihua nyaanranrenrana tumuvave. Nte uaquia hia nraakyे qorahua nyaanranrenrana tumuvave, tiro.

*Kyara auramaterara tura  
(Matiu 9:14-17; Ruku 5:33-39)*

<sup>18</sup> Mwi entara Ioninra nraaqiaranramwuvantovata, Parisi vaisinramwuvantovata, kyara auramate varuvata vaisi mponramwuvanto Jesusira kyapara hita tiqata, Ioninra nraaqiaranramwuvantovata, Parisi vaisinramwuvantovata, kyara auramate variavo. Qio nanraqamave i nraaqiaranramwuvanto hia kyara aurama taraitita, qati kyara nre variavo? tita.

<sup>19</sup> Mwihua mwitaa tuvaro Jesusiva tiqaro, Nraakyе vararerera qari vaisiva nai vataahuavata qati varirera, qiove mpovanto mwia vataahuara kyara aurama taate qiananro? Qaqao, hiama qio mpovanto mwitaa qiananrove. Nraakyе vararerera qari vaisiva qati varirata mwia vataahua hia kyara aurama taraitita, qatima kyara nrevarave.

<sup>20</sup> Mpo enta nri ntairata mwihuaqtai nraakyе vararerera qiani vaisira tu vareta qatinani vara

kyavata mwi entaraqaataita mwia vataahua ti atura ntinqata kyara aurama tevarave, tiro.

<sup>21</sup> Mwitaa timwa kyero Iesusiva mpo quaqaa ntumwa kyero timwa nyinro tiqaro, Mpowanto tuavaaqa nrihi nrabitu quaninra haqira hirero hiama tavuna qaraakya toqa kyero mwiaqaa taaqautero haqiraananrove. Tavuna qaraakya mwia toqa kyaariro qiqu vahiraro tuavaaqa nrihi mwivavata nronraqama kyero nrabituankyo tiro, hia mwitaa hirave.

<sup>22</sup> Qaiqaa tirerave. Uaini qaraakya tati kyero hia mpovanto memenra pahiqo ututaira haaruua taqu vara kyero qaraakya uaini mwia mwipi raurirave. Memenra pahi mwiva nraahaqama viraqa mwiva mwitaa hiraro uainivanto kepukya uaini utu viqaro memenra pahi nrabitu kyaananrove. Mwitaa hiraro uainivantovata memenra pahivantovata uaqiamma quananrove. Memenra pahiqotai ututaa taqura qaraakya taqu vara kyeta mwipi nraahu qaraakya uaini rauruarave, tiro.

(Iesusiva mwi quaraqaa ntumwa kyero tu quara okyaravanto mwataamama vahiro. Mwia votima kyeta hiama haaruua okyaravata qaraakya okyaravata kuaaqi kuairama kyeta tutaate, tura.)

*Mwaanra tu entarara tura  
(Matiu 12:1-8; Ruku 6:1-5)*

<sup>23</sup> Mpo enta mwaanra tu entaraqaa Iesusiva nai nraaqiaranramwu kyapata aakyo utaqi kyakuma votihura uiti vara tutoraqi vi varuvata mwia nraaqiaranramwuvanto viqatama uiti tamwa nteqa kyeqa nramwaqita vi varuvata

**24** Parisi vaisivanto mwihua taqeta Iesusirara tiqatama, Mwataqi mwihua taqaante. Mwaanraqaa qao timwa tai inraikyarama mwihua vareta hiavo, tita.

**25** Parisi vaisinramwuvanto mwitaa tuvaro Iesusiva nkyiari timwa nyinro tiqaro, Haaru nkyi haivaqava Ntevitivavata, mwiavata nruhua mwihuavata, kyara nraataa huvata varuvaro Ntevitiva kuaa qara hora mwia nkye hia mpukuqi kyaara ntumwa kyeta riaarave?

**26** Apaiataava Kotira kyaiqa vara mwate varuva vunyaa vaisivanto varu entaraqaa Ntevitiva Kotira nraamwuqi vera ntero mpereti Kotirani vatora vara kyero nrenro nteqa kyero nai mwia vatama kyeta nruhuavata hini nyuvata nronrave. Kotira kyaiqa vara mwate varu vaisihua nraahu mwi kyarara nraataara vahuvaro qumina vaisivanto mwi kyarara nrenro mwi quara nteqa kyorave, tiro.

**27** Iesusiva mwitaa timwa kyero tiqaro, Kotiva vaisiara rieqaro mwaanra enta vahiananrove turave. Kotiva hia mwaanra entara rieqaro vaisi utu tairave.

**28** Ni mwatani mwatatai nraaqiarara nronraqama kyaihana variqana nte mwaanra entaqaa ntaqikyiqanama ntena kyakya hiani kyaiqara qioma varaaninrave, tiro. Iesusiva turama.

### 3

*Mwaanra tu entaraqaa Iesusiva vaisi kyauqu kyuqema kyora*  
*(Matiu 12:9-14; Ruku 6:6-11)*

<sup>1</sup> Mpo enta Iesusiva mwaanra nraamwuqi vera ntero taqovaro vaisi mpovanto kyauqu hini kukokaqama vuva varuvata

<sup>2</sup> mwiqi varuhua mponramwuvanto tiqata, Kyai variqata taqaararo Iesusiva vaisi kyauqu kukoka mwia mate mwaanra tuna entaraqaa kyuqema kyairera, mwia kyaara mwiaqaa qua vataare, tita.

<sup>3</sup> Mwihua mwitaa timwa kyeta Jesusira taqe varuvaro Iesusiva kyauqu hini kukoqama vu vaisirara tiqaro, E nrinra vaisi variara utaqaa sivira variante, tuvaro mwiva siviro varuvaro

<sup>4</sup> Iesusiva mwihua kyapara hiro tiqaro, Tiren-ramwu tetu mwaanra qua rieqatama mwaanra qiana entaraqaa nataa hiani kyaiqarave qio varaanranrave? Tire mwi entaraqaa vaisi mpo kyaahaqamave mwataananrave? Mwia uaqiamave mwataananrave? Mwaanra qiana entaraqaa tire vaisi mpo kyaahaqa hiararo mwiva qative variananrove? Tire qaqlira kyeta mwi vaisira ruve kyaananrave? tiro.

Iesusiva mwitaa tuvata mwihua hia quavata tihua tirema varuvaro

<sup>5</sup> Iesusiva taqovata mwihua hia mwi vaisirara po kye tiraitita, kapera viri rate varuvaro mwia kyaara Jesusira mwutukyavanto uaqia huvaro mwia raraqa tovaro mwi vaisirara tiqaro, Ena kyauqu ntatutaante, tuvaro mwiva nai kyauqu ntatuta kyovaro kyuqema vura.

<sup>6</sup> Mwia kyauquvanto kyuqema vuvata Parisi vaisi mwinramwuhua mwaanra nraamwuqtai veva nteta uro Herotira vataqita nrohuhua kypata ntuvantua hita variqata Jesusira nataama

kyetave ru kyaananrave timwa kyeta nai timwa mwi nai timwa mwi hi varura.

*Nraakye qoravanto hisai hisaita uro Iesusira taqora*

<sup>7</sup> Iesusiva nai nraaqiaranramwu sita varero kyaarerera tokyasata uro varuvata nraakye qora airivanto Karirinyaahuave, Iutianyaahuave,

<sup>8</sup> Ierusaremiqinaahuave, Itumianyaahuave, Taiaaqinaahuave, Saitoniqinaahuave, Iotaani nramanri vutura qarahi hini varuhuave, mwihua Iesusiva mpo kyaiqa mpo kyaiqa vare varurara rieta, mwihua Iesusiva varura nramanri tokyani ntuvaantuama vita varura.

<sup>9</sup> Nraakye qora airivanto ntuvaantuama vita varuvarora tiro, Iesusiva nai nraaqiaranramwuanra tiqaro, Nraakye qoravanto ni ntaqutivorave. Mpotu terama kyeta vataivaqena mwiqi mwaanrintena variankye, tiro.

<sup>10</sup> Iesusiva nraakye qora airi kyuqema kyovatara tita, nriqa vuhua mwia tu vararerata uti variqata nai ntaquti nai ntaquti hi varura.

<sup>11</sup> Mwihua mwitaa hi varuvata nraakye qora mponramwu vaanavanto mwihua utaqi varuhua, mwihua Iesusira taqeta mwia vuni tumu ntita variqata aakyara nteta tiqata, E Kotira mwaquivantove, tita. Vaanavanto mwihua utaqi varu vaisihua mwitaa tuvaro

<sup>12</sup> Iesusiva mwihuara kepukyaqama kyero tiqaro, Hia ni okyarara qiate. Tirema variate, turama.

*Iesusiva vaisi 12 nramwu sita vatora  
(Matiu 10:1-4; Ruku 6:12-16)*

<sup>13</sup> Iesusiva mwini vari kyero uro taaqi mporuqa variqaro nai mwutukya vahu vaisihua nraahu nyaanrovata mwihua uro varuvaro

<sup>14</sup> Iesusiva vaisi 12 nramwu kyaara ntumwa kyero mwihuara nte mwihua sitaarita ni qua vareta timwa nyiqi quate timwa kyero, mwihua nronraqama kyero mwihuara tiqaro, Nkyenramwu ni airuqama mateta ni qua timwa nyiate tinama, nte nkyi sita vatauquo.

<sup>15</sup> Nkyenramwu vaana titaivaro nritarero quarive tina, nte nkyi kepukya nyinrenrave, tiro.

<sup>16</sup> Iesusiva mwaa vaisinramwuhua sitora:  
Saimoninra. Iesusiva mwia mpo nrutu ntamwatero

Pitaavave tiro.

<sup>17</sup> Iemisikya Ionikya. Mwitanahua Sepetira mwaaqutana

varura. Iesusiva mwitanahua mpo nrutu Poanesisi-huatanave tura. (Poanesisi mwaa quaraqitai

tirera, Nyaanruva Nruqua Ti Varirave, tita.)

<sup>18</sup> Enturura, Piripira

Pataromiunra

Matiura

Tomaasira

Iemisira. mwiva Arapiaasira mwaaqu

Tatiaasira

Saimoninra. mwia nrutu mpo Serotira

<sup>19</sup> Iutaasira. mwi vaisiva Iesusira ntavaaqavu kyaate tiro,

mwia qovarama kyo vaisiva.

Iesusiva 12 vaisi mwi vaisinramwuhua sitora.

*Mpo uhua Iesusirara ueraqama vi vaisivama variho tura  
(Matiu 12:24-32; Ruku 11:14-23)*

**20** Iesusiva nai nraaqiaranramwu sita varero nraamwunianra nkyiari mwaatani vuvata qaiqaa nraakyе qora airivanto mwia taqarerata ntuvantuama vita varuvaro Iesusiva nai nraaqiaranramwu kyapata kyara nraanriva hia qioqa huvaro varuvata

**21** Iesusira vataahua mwi quara rieta Iesusirara tiqata, Qikye, mwiva ueraqamama viho. Kyai uro mwia vitaare, timwa kyeta vurama.

**22** Mwaanra okyara ti varu vaisihua mponramwuvanto Ierusaremisaita tumunte mwitaama tita, Vaana vunyaava Pierisepurivama Iesusira utaqi variho. Pierisepuriva mwia utaqi variqaro mwia kyaahaqa hi variharoma Iesusiva vaisiqitairo vaana tite variho, tita.

**23** Mwihua mwitaa tuvaro Iesusiva mwihua nyaanrovata vaini nruvaro mpo quaqaa ntumwa kyero mwihuara tiqaro, Saataaniva nataama kyerove nai henanra titairaro nritaraananrove.

**24** Kuua mwatanaavanto ntainravi variqata nkyiaritana nai ntaqi nai ntaqi ihua hia qio varivarave.

**25** Kuua nraamwunaavanto ntainravi variqata nkyiaritana nai ntaqi nai ntaqi ihua, mwihuavata hia qio varivarave.

**26** Saataaniva ntaqikyi vari vaanahua ntainra vita nai ntaqi nai ntaqi hi varivaro Saataaniva hia mwihuqaqaa ntaqikyiqiro viraro mwihua kepukyavanto taiqaananrove.

**27** Mpuara varaiva hia kepukya vaisi mpo nraamwuqi qumina vera ntero mpo inraikya varairave. Mpuara varaiva vuni kepukya vaisi mwia nraante rupa kyero vatero mwiaqaatairo vera ntero mpo inraikya mwiani mpuara varairave.

**28** Nte qutaa qua qianinra riaate. Nraakye qoravanto uaqia hiani kyaiqara mpo qara mpo qara hiani kyaiqara uti vari quarave, uaqia hi quara mpohuara ti vari quarave, Kotiva qioma ekyaa mwi quara mwi quara nraakye qora qati nruka kyero taunru nyataananrove.

**29** Vaisivanto Kotira mwanraqrara uaqia hi quara ti vari quara Kotiva mwaa entaravata nraakiaravata mwi quara hia nruka kyero taunru nyataananrove, tiro.

**30** Iesusirara vaanavanto mwia utaqi variho tuvarora tiro, mwiva mwitaa tura.

*Iesusira vataahua mwia taqarerata nrunra  
(Matiu 12:46-50; Ruku 8:19-21)*

**31** Iesusiva mwitaa tuvata mwia nrovavata, mwia qatanramwuvata, nri nteta mwaata qesaqa sivi varita tiqata, Iesusira tivaro tumuanrive, tuvata

**32** nraakye qora airivanto Iesusira tataaqa mwatakyaa vita varuhua Iesusira timwa mwita tiqata, I nrovavata, i qatanramwuvata, mwaataqa variqata iara tumuanqiavo, tita.

**33** Mwihua mwitaa tuvaro Iesusiva mwihua kyapara hiro, Tavave ni ntova variho? Tahuave ni kata pakyaa variavo? tiro.

**34** Mwitaa timwa kyero mwia tataaqa vara ututu mwatakyaa vita varuhua taqero tiqaro, Mwaahuama ni ntohua ni kata pakyaan variavo.

**35** Ni kova nyaamwuni varira mwia qua rieqata nrohi variahua, mwihiuama ni kata pakyaan variavata, ni nunra nakyaan variavata, ni ntohuamwanra varita hiavo, tura.

## 4

*Uiti humwu iso quaraqaa ntumwa kyero tura  
(Matiu 13:1-9; Ruku 8:4-8)*

**1** Iesusiva kyaarerera tokyani uro variqaro nraakye qora qua mwakyaakya timwa nyiankye tuvata nraakye qora airivanto ntuvantuama vita mwia ututuma kyovarora tiro, Iesusiva qaqlira kyero mpotu mpoqi mwaanri ntero mwipi mwatakyaa viro nramanriqaa varuvata nraakye goravanto nramanri tokya sata varura.

**2** Mwihiu mwataqaa nramanri tokya sata varuvaro Iesusiva mpo qua mpo quaqaa ntumwa kyeqaro timwa nyunra.

**3** Iesusiva tiqaro, Nte qianinra riaate. Vaisi mpovento kyara vara tirero humwu isaqiro vurave.

**4** Mwiva kyara humwu isaqiro vuvaro mpo-huva aanra tokyani tumu ntuvvaro nyaamwabantu nrumu nramwa kyorave.

**5** Mwitaa huvaro humwu mponramwuvanto ori mwataqaa tumu ntuvvaro mwatavanto hia vevatoqama vahuraqaara tiro, qamwanrama qupiqa vuvaro

**6** mwia tuqavanto hia mwataqi vevato vu-raqaara tiro, huarivanto nri ntero itovaro aa-harama vurave.

**7** Mwitaa huvaro humwu mponramwuvanto uakukya qupiqoraqi tumu ntiro uakukya vatama kyero qupiqa vuvaro uakukyavanto ntumwaqu kyovaro hia tamwa riorave.

**8** Mwitaa huvaro humwu mponramwuvanto kyuqe hu mwataraqaa tumu ntiro kyuqema kyero qupiqeqaro kyuqe tamwa riorave. Mpo huva airi tamwa riemwa tovaro mpo huva uro mpoqivata riemwa tovaro mpo huva uro mwia-vata nraatarero mpoqivata riemwa torave, tiro.

**9** Iesusiva mwi quaraqaa ntumwa kyero timwa nyi taiqa kyero tiqaro, Nkyi nyaato vahirera, mwi quara okyara ntapihi kyeta riaate, tiro.

*Iesusiva hia vutu kyero tiraitiro, mpo quaqaa ntumwa kyeqaro nraakyе qora timwa nyu okyarara tura*

*(Matiu 13:10-17; Ruku 8:9-10)*

**10** Iesusiva qua timwa nyi taiqa kyovata nraakyе qoravanto nkyiari mwaatani vita nrta huvaro Iesusiva nanrianraa varuvata mwia nraaqiara 12 nramwuvantovata, mpo uhuavata, mwiva varunani nri nteta Iesusiva mwi quaraqaa ntumwa kyero tu okyarara hia ntapihiraitita, Iesusira kyapara huvaro

**11** Iesusiva mwihua timwa nyinro tiqaro, Kotiva nraakyе qoraqaa ntaqikyiani quara uqetatai quara, mwi quara Kotiva nkyiara qati kyairata mwi quara okyara riaate tirave. Mwitaa timwa kyero mpo nraakyе qora qatinani varihua mwi quara okyara hia ntapihi kyera timwa nyiante

tihanana tina, nte mwi quaraqaa ntumwa kye-qana mwihua timwa nyinrenrave.

**12** Nte mpo quaqaa ntumwa kyena qiarita nraakye qoravanto taqevaravata hiama ntapihi kyeta taqevarave.

Mwihua ni qua rietavata hiama ntapihi kyeta rievarave.

Mwihua ni qua rieqata nkyiari uaqiahi kyaiqara qaqlira kyaivarovauma Kotiva mwihua uaqiahi kyaiqara vare quara nruka nyataananrove, tiro.

*(Aisaiaa 6:9-10)*

*Uiti uru isaqiro vura mwia okyara ntapihi kyero Iesusiva nai nraaqiaranramwu timwa nyunra*

*(Matiu 13:18-23; Ruku 8:11-15)*

**13** Iesusiva mwitaa timwa kyero mwin-ramwuhuara tiqaro, Nkye mpo? Nte mwi quaraqaa ntumwa kyena tu okyarara hiave nkye ntapihi riaavo? Nkye hia mwi quara okyara ntapihi kye riaivera, nte nraakiara mpo quaqaavata ntumwa kyena qiani quara, nkye nataama kyetave qio mwiavata ntapihi kyeta rievarave?

**14** Nte vaakya mwi quaraqaa ntumwa kyena tu okyarara tirerave.

Vaisivanto humwu isatora mwi quara okyara vahirero Kotira quama vaiho.

**15** Humwu aanraqaa tumuntu quara mwia okyara vahirero nraakye qora mponramwuvanto mwi humwunra votima kyeta variarave. Mwi nraakye qorahua Kotira qua riaavaro Saataaniva

nri ntero mwihua su nyaato mwutukyaqitairo  
mwi quara ntavihi kyero varairave.

<sup>16</sup> Mpohia nraakyе qorahua ori mwataqaa  
tumu nti humwunra votima kyeta variarave.  
Mwinramwuhua Kotira mwakyaakya rieta mwi  
quarara qamwata kyeta variavaro

<sup>17</sup> quavanto hia mwihua mwutukyaqi vihata  
mwi nraakyе qorahua hia mwi quara mpo enta  
mpo enta riaraitita variavata mwi quara kyaara  
mpo hiahua mwihua uaqama nyatarerata uti  
variavata mwihua tiri rivorave tiqata Kotira qua  
qamwanrama qaqlira kyeta varia nraakyе qo-  
rahua variarave.

<sup>18</sup> Mpohia nraakyе qorahua uakukya  
upiqairaqa isato humwunra votima kyeta  
variarave. Mwi nraakyе qorahua Kotira qua  
rieta

<sup>19</sup> mwiaqaataita mwihua mwatanyaa inraik-  
yara nronraqama kyeta riemwaqi viqata mun-  
manrave, mpo inraikyarave, qamwata kyeqata  
mpo inraikya mpo inraikya vararerata riemwaqi  
vita Kotira qua qaqlira kyaavaro Kotira quavanto  
hia mwi nraakyе qorahuaqi vahata variarave.

<sup>20</sup> Mwihua mwitaa hiavata mpohia nraakyе  
qorahua kyuqe mwataqaa isato humwunra vo-  
tima kye variarave. Mwi nraakyе qorahua Kotira  
qua rieta mwi quarara quataave timwa kyeta,  
mwi quara riemwaqi vita kyuqe kyaiqa Kotirani  
varaqlita quarave. Mpohia nraakyе qorahua mwi  
quara rieqata kyuqe kyaiqa Kotirani varaqi vi  
variavata, qaiqaa mpohia nraakyе qorahua mwihua  
nraatara kyeta uro mpoqiaavata kyuqe kyaiqa  
Kotirani varaqi vi variavata, qaiqaa mpohia

nraakye qorahua mwihua kyaiqavata nraatara kyeta uro nai mpoqiavata kyuqe kyaiqa Kotirani varaqita vi variarave, tiro. Iesusiva turama.

*Iesusiva omwanra mpo quaqaa ntumwa kyero tura*  
*(Ruku 8:16-18)*

<sup>21</sup> Iesusiva mwitaa timwa kyero mpo quaqaa ntumwa kyero tiqaro, Omwa qupi kyero taini uro vatairave? Tave vara kyero ntumwaqu tairave iho? Tainta mwemwaqi veta vatairave iho? Qaqao, hia mwitaa hiraitiro, omwa qupi kyero tuaahera kyero qoqaa mwaanri vatairave.

<sup>22</sup> Nraakiara ekyaa uqeta taani inraikyara qoqaa ma qovarama kyaananrove. Ntumwaqutaani inraikyara ekyaa qoqaa ma qovarama kyaananrove.

<sup>23</sup> Nkyi nyaato vahirera, mwi quara okyara ntapihi kyeta riaate, tiro.

<sup>24</sup> Iesusiva mwitaa timwa kyero mwiva tiqaro, Nkye qua riaara mwia ntapihi kyeqata riaate. Nkye nanra tukyaqaave mpohua nyitave mpohua vara nyatera mwi tukyaraqaama Kotiva nkyitavata nyiqanro mwiaqaa mpoqiavatama nyiananrove.

<sup>25</sup> Kotira qua riaariva variqiro viraro Kotiva mwia kyaahaqa hiraro mwiva mwia qua mpoqiavatama riaananrove. Kotira qua hia riaariva variqiro viraro mwiva nanra inraikyave tutaaninra mwia vara kyairaro mwiva qatima variananrove, tiro.

*Kyara humwukyanaa qupiqaaninranra mpo quaqaa ntumwa kyero tura*

**26** Mwitaa timwa kyero Iesusiva mpo quaqaa ntumwa kyero timwa nyinro tiqaro, Kotiva ntaqikyiariva mwaa quara votima kyeroma vaiho. Vaisivanto kyara humwu isatero

**27** mwiaqaatairo mwiva uro vaitero siviro qaiqaa vaitero siviro mwitaamaqiro vi variharo kyara humwuvanto nai ntukohiro qupiqe vari-rave. Vaisivanto kyara humwu mwiva qupiqaani okyarara hia ntapihiharo

**28** nai mwataqi vahiro naiqama kyero qupiqairave. Tauraaqama kyero uru mwiva ntukohiro turu vera kyero uro tamwa riemwa taiharo tamwa mwiva peqaqa hirave.

**29** Peqaqama viharo vaisivanto paipa varero uro tamwa mwia teqa kyeqaro varairave, tiro.

*Maasiteti uruqaa ntumwa kyero tura  
(Matiu 13:31-32; Ruku 13:18-19)*

**30** Iesusiva mwitaa timwa kyero qua timwa nyiqiro viro mwitaama tiro: Kotiva ntaqikyiva nanra inraikya votima kyerove vaiho? Mwianra rieqana nanra quaqaave ntumwa kyena qianin-rave?

**31** Qio mwia maasiteti kyatari mwia tamwa votima kyeroma vaiho. Uru mwiva nai pata qiani vahirarama tuqo. Vaisivanto uru mwia vara kyero mwataqi tutaiharo

**32** qupiqero kyatari nronraqama viro hini kyara tutaaravata nraatara kyero nritarero kyatari nronra vaiharo mwia kyaaravantovata nronra vaiharo nyaamwavantovata mwia kyauquqaa nraamwu hoqatero mwia aamanaqi varirave, tiro.

<sup>33</sup> Mwitaa timwa kyero Iesusiva mwi quara voti hira mpo qua mpo quaqaavata ntumwa kyeqaro timwa nyiqiro viro nraakye qoravanto ntapihi kyeta rie quara nraahu mwihua timwa nyunra.

<sup>34</sup> Mwiva nraakye qora qua timwa nyinrenro hia vutu kyero tiraitiro, mpo quaqaa ntuma kyeqaro timwa nyiqiro vuvata nraakye qoravanto nkyiari mwaatani vita nrira huvaro Iesusiva nanrianraa nai nraaqiaranramwu kyapata variqaro mwi quara okyara ntapihi kyero mwinramwuhua timwa nyunra.

*Toqa vaururu utura Iesusiva inronra huvaro taiqora*

(Matiu 8:23-27; Ruku 8:22-25)

<sup>35</sup> Mwi entara entama vuvaro Iesusiva nai nraaqiaranramwuanra tiqaro, Nrivaqenramwu nramanri nronra mwaa qara vare vutura hini tokyani quare, tiro.

<sup>36</sup> Mwitaa tuvata mwia nraaqiaranramwuvanto nraakye qora ntuvaantuama vuhua mwini kyeta Iesusiva varu mpoturaqi mwaanrinteta mwia vita vareta vuvata mpotu mponramwuvanto mwihua vatama kyeta vurama.

<sup>37</sup> Mwihua nramanri mwiaqaa vi varuvaro qamwanrama kyero toqa vaururuvanto nronraqama kyero tiqaro nramanri ventaqiro nrivi varuvaro nramanrivanto mpotuqi mwaanrintero piqa kyarerero uti varuvaro

<sup>38</sup> Iesusiva mpotu vitiqi turuma ntumwa kyero vaite varuvata mwia nraaqiaranramwuvanto mwia uro vaurama kyeta tiqata, Mwaanra ti variara vaisio, tirinramwu nramanrivanto ntaqutu

kyaaninranra e hiave nronraqama kyera riaaro? tita.

<sup>39</sup> Mwihua mwitaa tuvaro Iesusiva vaitoraqitairo siviro toqa vaururu mwia inronra hiro kyaarerera mwianra tiqaro, Qati tirema vahiente, tuvaro toqavanto taiqa vuvaro nramanrivanto utomwi tirema vhura.

<sup>40</sup> Tirema vahuvaro Iesusiva nai nraaqiara mwihuara tiqaro, Nanra inraikya nraatuve aatu hi variavo? Nkye hiave nianra kepukyaqama kyeta rieta hiavo? tiro.

<sup>41</sup> Iesusiva mwitaa tuvata mwia nraaqiaranramwuvanto aatu hita kyauqu ntukikinraaqateta tiqata, Qikye, mwaa nai nataahi vaisivave? Toqa vaururuvantovata, nramanrivantovata, mwia qua riaiho, tita tura.

## 5

*Iesusiva vaisi mpoqitairo vaana titamwa kyora  
(Matiu 8:28-34; Ruku 8:26-39)*

<sup>1</sup> Mwia nraaqiaranramwu mwitaa timwa kyeta mpotuqi vuhua kyaarerera qara vareta hini tokya Kekesaani uro ntovaro

<sup>2</sup> Iesusiva mpotuqitairo mwaamwi ntovaro vaisi mpovanto ori ataamwuqitairo veva ntero uto Iesusira huntu kyora.

<sup>3-4</sup> Mwi vaisiva vaisi qunte varura ori ataamwuqi variqiro vi varuvaro vaanavanto mwia utaqi varuvaro varuvata mpo uhua seni vara kyeta mwia rupa taare tita, rupa tovaro mwi vaisiva airi kyaanta kyuqu kyauqu rupa tora ntapihiqaro ntukekaama kyora. Qaiqaavata mwitaama kyeqata mwia rupa taare tuvaro

mwiva seni ntukekaama nraahu kyorara tiro, mpovanto mwia rupaariva hia varura. Mwia nraataaraariva hia varuvvaro

<sup>5</sup> mwi vaisiva entaqivata, iheravata, vaisi qunte varura ori ataamwuqi viro nrinro hiqaro qua aakyara timwaqiro viro taaqiqaaavata nrohiqaro qua aakyara tiqaro oriqtairo nai mwamwanta toqaaqamaqiro vi varura.

<sup>6</sup> Mwi vaisiva variqaro nyianrasairo Iesusira taqero hiantero uro mwia kyuqutarani tumu ntiro variqaro

<sup>7</sup> mpoqama kyero aakyara ntero tiqaro, Iesusio, Kotiva nai virini variva varihara e mwia mwaaquvanto variaro. Ni nataa hirere nrianro? Kotirara rieqara hia ni ruantema tuqo, tiro.

<sup>8</sup> Iesusiva vuni mwi vaisirara tiqaro, Uaqia hiara vaanavaao, mwi vaisiraqitaira nritarera quante, tuvarora tiro, mwi vaanava mwitaa tura.

<sup>9</sup> Mwitaa tuvaro Iesusiva mwi vaananranra ena nrutu qianta tuvaro vaana mwiva nai nrutu ntero tiqaro, Ni nutu Airivave. Tire airivantoma mwaa vaisiraqi varuro, tiro.

<sup>10</sup> Mwitaa timwa kyero mwi vaanava qaiqavata airi nani Iesusirara po kye tiro tiqaro, Hia mwaa mwataraaqaataira tiri titante, tiro.

<sup>11</sup> Mwitaa timwa kyeta vuru taqovaro mwi entara quara airintivanto uhiqa nre varuvata

<sup>12</sup> vaananramwuvanto Iesusirara po kye titi tiqata, Qati tiri titairaqe quara mwihuaqi viqetaare, tuvaro

<sup>13</sup> Iesusiva mwihua qati kyovata vaana airivanto mwi vaisiraqitai nritareta uro quara mwihuaqi vijeteta varuvata mwiaqaataita quara

2,000 nramwuvanto hianteta okai veva vahuraqi ito ntamwanra nramanriqi kyavuhu vuvaro nramanrivanto ekyaa mwihua ntaquti kyora.

<sup>14</sup> Quaravanto nramanriqi ntumwa vita qutu vuvata quaraqa ntaqikyu vaisinramwuhua taqeta mwiaqaatai hiantamwa teta mwatukya nronraqi uro mwi quara timwa nyita aanranivata viqata viti viri timwa nyiqi vuvata mwi mwatanaahua mwi inraikyara taqarerata nrumu

<sup>15</sup> Iesusiva varunani taqovaro vaakya vaana airivanto mwia utaqi varu vaisiva qati mwatakyaa viro tuavaaqa utu tero mwia vu nraato ntapihi vuvaro varuvata mwihua mwia taqeta aatuma kyeta varura.

<sup>16</sup> Mwihua mwi vaisira taqeta aatu hiqata varuvata vaisi mponramwu vaakya mwi inraikyara taqohua timwa nyita tiqata, Iesusiva mwitaama kyaiharoma mwi vaisiva kyuqema viho, timwa kyeta quaravata timwa nyuvata

<sup>17</sup> mwi mwatanaahua mpoqama kyeta aatu hita Iesusirara tiqata, E tiri mwataqaataira quante, ti varura.

<sup>18</sup> Mwi mwatanaahua mwitaa tuvaro Iesusiva mpotuqi qaiqaa mwaanri nte varuvaro vaakya vaanavanto utaqi varu vaisiva Iesusirara po kye tiro tiqaro, Kyai ntevata ivata quangye, tiro.

<sup>19</sup> Mwitaa tuvaro Iesusiva qaqao tiro, Hia mate nivatama kyera vinanrave. E ena mwaatani uro variqarama Kotiva i kyuqema kyero kyaahaqama mwatairara ena nramwunaahuavata timwa nyiante. Kotiva

iara po kye timwa mwatai quara uro ena nramwunaahuavata timwa nyiante, tiro.

<sup>20</sup> Jesusiva mwitaa tuvaro mwi vaisiva Iesusiva tunte hiro mwi mwatara kyero uro kyauqurutana mwatukya vahunani nrohiqaro Iesusiva nai kyuqema mwatorara nraakye qora timwa nyiqiro vuvata ekyaa mwia qua riohua mwi quara rieqata mwihua nkyiari kyauqu ntukikinraaqa teqata varura.

*Iairaasiva Iesusira uro huntu kyora  
(Matiu 9:18-26; Ruku 8:40-56)*

<sup>21</sup> Mwi mwatanaahua Iesusirara hia tiri mwaatani variante tuvaro Iesusiva mpotuqi qaiqaa mwaanri ntero nrumu ntantero kyaareraga qara varero hini tokyani vuvata mwini nraakye qora airivanto ntuvaantuama vita mwiva varunani ututuma vita varura.

<sup>22</sup> Varuvaro vaisi mpovanto mwi mwatukyaraqi mwaanra nraamwuqaa ntaqikyi varuva, Iairaasiva nri ntero Iesusira taqero mwia kyuqutarani tumu ntiro Iesusirara

<sup>23</sup> po kye tiro tiqaro, Ni naamwunravanto quammama qutu quananrove. E nrinra ena kyauqu mwiaqaa vatairaro mwia nriqa quariva taiqa viraro qati variarive, tiro.

<sup>24</sup> Mwi vaisiva mwitaa tuvaro Iesusiva mwikyantiri vurama.

*Nraakye mpovanto Iesusira vaaqa vitiqa kyaatu kyora*

Iesusiva Iairaasikyantiri vi varuvata nraakye qora airivanto mwia vataqita viqata hisai hisaita mwia rataaqi vi varuvaro

**25** nraakye mpovanto ekyaa enta tora taqamwaqiro vuavata mwihuaqi varura. Mwi nraakyeva 12 ihiara tora taqamwaqiro viqaro nronraqama kyero nriqa vuvaro variqaro

**26** mpo totaa mpo totahuara ni kyaahaqa hitate timwa kyero, munima nyuvata mwihua hia mwia kyaahaqa hiraitita, mwia munima nraahu nramwa kye varuvaro mwia mwamwanta mpoqavata uaqiamma vuvaro varura.

**27-28** Mwi nraakyeva nraakye qora utaqi variqaro Iesusiva kyaiqa varorara rieqaro Iesusira nraakiara nriqanro nai riero tiqaro, Nte mwia tuavaaqaqa kyaatu kyaariro ni nriqa viva qamwanrama taiqa quarive, tiro. Nraakyе mwiva mwitaa timwa kyero Iesusira vaaqaqa kyaatu kyovaro

**29** qamwanrama kyero mwia nraanre ntova aaharama vuvaro mwiva taqovaro mwia mwamwantavanto qio vhura.

**30** Mwia mwamwantavanto kyuqema vuvaro varuvaro Iesusiva qamwanrama kyero taqovaro mwia kepukya hinivanto vivuvaro mwiva tuqasaa viro nraakye qora mwia vataqita nruhua kyapara hiro, Tavave niqa tu varaiho? tiro.

**31** Iesusiva mwitaa tuvata mwia nraaqiaranramwu tiqatama, Nai tavave iqa tu varaiho? Ena taqaante, nraakye qora airivanto i nraaqani viqata i rataaqi vi variavo, tita.

**32** Mwitaa tuvaro Iesusiva qati nraahu vaisi viri mwia puaama kyarero aitutu hi varuvaro

**33** nraakye mwiva nai mwamwanta kyuqema vurara riero mwia nraatu hiqaro kyuqu kyauqu

nti varuvaro uro Iesusira kyuqutarani tumu ntiro  
mwi quara ekyaa qoqaa timwa mwuvaro

<sup>34</sup> Iesusiva nraakye mwianra tiqaro, Ni naamwunrao, e nianra mwiva ni kyaahaqa hiananrove qiararoma i mwamwantavanto kyuqema viho. Qioma i mwutukyavanto qihakya hirara quante, tiro.

*Iairaasira nraamwunra sivuma kyora*

<sup>35</sup> Iesusiva mwi quara qati ti varuvata Iairaasira nraamwuqitaita vaisi mponramwu nri nteta Iairaasira huntu kyeta mwianra tiqata, I nraamwunravanto qutuma viho. Haunri mwaanra ti vari vaisira ntavaaqavu tero, tuvaro

<sup>36</sup> Iesusivavata mwinramwuhua qua riero mwaanra nraamwuqaa ntaqikyi varu vaisirara tiqaro, Hia aatu hiante. Nianra kepukyaqama kyera rieqara variante, tiro.

<sup>37</sup> Iesusiva mwitaa timwa kyero mwiva Pitaaravata, Iemisiravata, Iemisira qata Ioninravata, mwinramwuhua nraahu sita varero

<sup>38</sup> Iairaasira nraamwuqi uro ntero taqovata nraakye qora nronraqama kyeta ti atura ntqata ntate varuvaro

<sup>39</sup> Iesusiva nraamwuqi vera ntero tiqaro, Nanranre nkye ntate variavo? Mwi qiaatarava hia qutu viho. Mwiva qati vaitema variho, tiro.

<sup>40</sup> Iesusiva mwitaa tuvata mwihua Iesusira quara raima mwateta varuvaro Iesusiva ekyaa nraakye qora vara veva mwaatani kyero qiaatara mwia nrohua qohuavata, taaramponramwu nai sita tohuavata, mwinramwuhua nraahu sita varero qiaatara mwiva qutuvata vatoraqi uro

**41** mwia kyauquqaa tu varero nai quaqitairo tiqaro, *Tarita kumi*. mwaa qiaatararuvaao, nte iara siquantema tuqo, tiro.

**42** Iesusiva mwitaa tuvaro mwi qiaatarava qamwanrama siviro nrohi varura. Mwiva 12 ihi vara kyo qiaatarava siviro nrohi varuvata mwinramwuhua mwia taqeta nrihanrama vita mpoqama kyeta kyauqu ntukikinraaqate varuvavo

**43** Iesusiva mwinramwuhuara kepukyaqama kyero tiqaro, Qio mwaa taqaarara hia mpohua timwa nyiate. Mwaa qiaatarara kyara nraahu mwiate, turama.

## 6

### *Nasaretiqinaahua Iesusira qoririma mwatora (Matiu 13:53-58; Ruku 4:16-30)*

**1** Iesusiva mwi mwatara kyero nai mwaatani vuvata mwia nraaqiaranramwuvanto mwia vatama kyeta vurama.

**2** Iesusiva nai mwaatani uro variqaro mwaanra entaqaa uro mwaanra nraamwuqi qua mwakyaakya timwa nyi varuvata nraamwu mwipi nraakye qora airivanto varuhua mwia qua rieta kyauqu ntukikinraaqateta tiqata, Qikye, mwi vaisiva taisairove mwi quara mwi quara riaiho? Mwiva kyuqe okyara mpo vu nraato mpo vu nraato taisairo vara qirove tiho? Tava mwi kyaiqara okyara mwia nraamwute variharove mwiva nronra kyaiqa vare variho.

**3** Mwiva taintave mwitaa inraikya uti varivama variho. Mwiva Mariaara mwaaqueve. Iemisivave Iosisivave Iutaavave Saimonivave

mwihuama mwia qatanramwu variarave. Mwia nrunranramwuvata mwaini variarave, tita. Mwitaa timwaqi viqata Iesusira nramwunaahua mwianra qumina vaisive timwa kyeta, mwia qoririma mwatora.

<sup>4</sup> Mwihua mwitaa huvaro Iesusiva mwihuara tiqaro, Poropeti vaisi Kotira qua timwa nyi variariva mpo mwatani uro variraro mwi mwatanaavama mwianra qamwateqaroma mwia nrutu tuaaheraananrove. Mwi vaisiva nai mwaatani variqaro nai nrunra qata kyapata variraro mwia nramwunaava mwianra qumina mwaa mwatanaava nraahuma variho timwa kyero hiama mwia nrutu tuaaheraananrove, tiro.

<sup>5</sup> Mwitaa timwa kyero nraakye qoravanto Iesusirara qumina vaisive tura kyaara Iesusiva hia qio nai mwatukyaqi nronra kyaiqa varaariva vahuvaro mwiva nriqa vuhua pataqiatanaqa nraahu nai kyauqu vatovata kyuqema vura.

<sup>6</sup> Mwia nramwunaahua mwianra hia qio tiri kyaahaqa hiarivave turara Iesusiva airi nraato tiqaro varura.

*Iesusiva nai nraaqiara 12 nramwu mpo mwatukya mpo mwatukya sitovata vurara tura  
(Matiu 10:5-15; Ruku 9:1-6)*

Mwi mwatukyaraqitairo Iesusiva siviro vintante nrintante mpo mwatukya mpo mwatukya variqi viqaro nraakye qora mwakyaakya timwa nyiqiro vura.

<sup>7</sup> Iesusiva nai nraaqiara nyaanrama kyero taaratana taaratana sitovata 12 mwinramwuhua mpona mpona vura. Mwiva mwihua siteqaro

vaisiqitaita vaana sitaivata qatinani nritareta  
quate tiro, mwiva mwihua kepukya nyiqanro  
qua mwitaama tiro:

<sup>8</sup> Nkyenramwu virera hiqatama hiama mpo  
inraikya mpo inraikya vareta viraitita, aanraqaa  
kyauru guru vare vira nraahuma vareta quate.

<sup>9</sup> Hiama kyarave tuave munimave vareta  
quate. Kyuqu nraamwu mwia nraahuma vara  
ututaate. Hia soti taaratana ututaate. Kuaiqia  
nraahu utu vareta quate, tiro.

<sup>10</sup> Iesusiva mwi quara timwa kyero mwaan  
quaravata tiqaro, Nkyenramwu vivaro ta  
mwatanaavave nkyiara qamwateqaro nkyi  
sitarera, nkye nraamwu kuaikuqi nraahu  
variqita vitama mwi mwatukyara kyeta quate.

<sup>11</sup> Nkye vivaro ta mwatanaahuave hia nkyi  
qamwata nyateta nkyi qua hia riarera utivera,  
nkyetaqaatai ntuvengrauma kyeta qaqlira tuto  
kyetama mwihua timwa nyita tiqata, Nraakiara  
nkyetama taqevalrave, qiate, tiro.

<sup>12</sup> Iesusiva mwitaa timwa kyero sitovata mwia  
nraaqiaranramwuvanto uro viti viri timwa nyita  
tiqata, Uaqia hi aanranra qaqlira kyeta kyuqe hi  
aanranraqaa quate, tita.

<sup>13</sup> Mwitaa timwaqti viqata vaisi utaqi vaana  
varuhua sitovata qatinani nritare vuvata  
airi vaisi nriqa vuhua, mwihua qiataqaa  
vahamwenra qu nyateqata kyuqema nyatovata  
qio varura.

*Nramanri nyi varu vaisira Ioninra rukyora  
(Matiu 14:1-12; Ruku 9:7-9)*

**14** Mwitaa huvaro ekyaa mwi mwatanaava Iesusirara nai timwa mwi nai timwa mwi hi varuvarora tiro, Herotiva vunyaa vaisivanto mwi mwatara Kariri mwataqaa ntaqikyi varuva, mwivavata Iesusira nrutu riora. Nraakyе qora hini uhua Iesusirara mwitaama tita, Mwi vaisiva Ionivave. Ioniva nramanri nyi varu vaisiva qutu vuva qaiqaa siviro nrohi variho. Mwiva qati siviro nrohi variqarora tiroma nronra kyaiqa qio vare variho, tita.

**15** Hini uhua mwitaa tuvata hini uhua qaqao tita, Mwi vaisiva tiri haivaqava Iraisaava qovarama viho, tita. Mwitaa tuvata mpo uhua Iesusirara tiqata, Haaru poropeti vaisi Kotira qua qovarama kye varuhua, Iesusiva mwihua votima kyeroma variho, tita.

**16** Nraakyе qora Iesusirara mwitaa ti varuvaro Herotiva mwi quara riero tiqaro, Qikye, mwi vaisiva nramanri nyi varu vaisivama variho. Nte qiavarao mwia nrunta teqa kyova Ioniva, mwivama qutu viraqitairo qati siviro nrohi variho. Mwiva qutu viraqitairo qati siviro nrohi variqarora tiroma, mwiva nronra kyaiqa qio vare variho, tiro.

**17-18** Tauraa Herotiva nai qata Piripira nraata Herotinamainra varatero varuvaro Ioniva nri ntero airi nani Herotirara tiqaro, E ena qata nraata hia varaataarama varera hiaro, tuvaro mwia kyaara Herotiva nai nraata Herotinamainranra tu quara rieqaro mwiva naivanto vaisi mpo titovaro Ioninra ntavaaqavu kyero rupaqiro uro karavuqi kyora.

**19** Kyovaro Ioniva karavuqi varuvaro Herotira nraatavanto Herotinamaiva varuvaro Ioniva mwianra tu quava mwia raraqa tovaro Ioninra rukyarera utuvaro hia mwia rukyaari aanrava vhura.

**20** Ioniva vaisi kyuqeva avuqavuma kyero nrohi varurara tiro, Herotiva mwianra rieqaro mwia nraatu aatu hiqaro hia mwia rukyaate tiro. Mwitaa timwa kyero Herotiva Ioniva ti varu quarara qamwateqarovata mwiva mwia quara taara nraato tura.

**21** Mwitaamaqi vuvaro mpo enta Herotinamaiva Ioninra rukyaari aanrava qio vhura. Mwi quara okyaravanto mwataamama vahiro. Herotiva nai mwato entava qovara huvaro mwi entaraqaa nronra vaisi kyara nyinrenro mwihua nyaanronra. Mwiva ntaqu vaisihuqaa ntaqikyi varu vaisihuave, airi inraikya vato vaisihuave, mwiva mwihua nyaanrama kyero kyara nyinro.

**22** Kyara nyuvata mwihua nre varuvaro Herotinamainra nraamwunravanto nrumu mwihua ihi ntamwa nyatero. Mwiva ihi nte varuvata Herotivata mwiva kyara nyuhuavata mwi mwanraatara qamwata mwateta. Herotiva nai nraata nraamwunranra qamwatero mwianra tiqaro, Nanra inraikyarave i mwutukya vaiho? Ni timwa mpiraqe i mwiankye, tiro.

**23** Mwitaa timwa kyero mwiva kyauqu nriqiqaa vatero tiqaro, Nte qutaama tuqo. E nanra inraikyarave tiraqena nte i mwianinrave. Mwata hini nte ntaqikyianinranra tiraqena nte ntainra kyena i mwianinrave, tiro.

**24** Herotiva mwitaa tuvaro mwanraata mwiva veva ntero uro nai nronra ntumwahiamwa hiro

tiqaro, Nto, nte nanra inraikyarave qiaro ni mpiananrove? tiro. Mwitaa tuvaro mwia nrova tiqaro, Ioniva nramanri nyi vari vaisira mwia qiaata mpiante qianta, tiro.

**25** Mwia nrova mwitaa tuvaro mwia nraamwunravanto hiantero uro vunyaa vaisi Herotirara tiqaro, Qamwanrama kyera Ioniva nramanri nyi vari vaisira nrunta teqa kyera tanuqa varaqira nrumu mpiante, tiro.

**26** Mwanraata mwiva mwitaa tuvaro Herotira mwutukyavanto uaquia huvarovata mwiva vaakya kyauqu nriqiqaa vatorara rieqaro, kyara nranrenrata nru vaisihuaravata rieqaro tiqaro, Nte mwanraata mwianra tu quara nteqa kyaankkyorave, timwa kyero

**27** mwiva karavu vaisiqaa ntaqikyi varu vaisira mpo titero tiqaro, Ioninra qiaata qamwanrama kyera varaqira nrumu mpiante, tuvaro mwiva uro karavuqitairo mwia nrunta teqa kyero

**28** mwiaqaatairo mwia qiaata tanuqa vatero varaqiro nrumu mwanraata mwia mwuvaro mwiva varero uro nai nronra mwunra.

**29** Mwitaama kyovala Ioninra nraaqiaran-ramwuvanto mwi quara rieta mwihua nrumu Ioninra mwamwanta varaqita uro quntamwa kyora.

*Iesusiva pata kyara airiqama kyero 5,000 vaisi nyunra*

*(Matiu 14:13-21; Ruku 9:10-17; Ioni 6:1-13)*

**30** Iesusiva nronraqama kyero sitovata vu vaisihua nrohitu uro ntante nrumu ntuvaantuama vita Iesusira nraaqani variqata mwihua nkyiari

kyaiqa varoravata, nkyiari nraakye qora timwa nyu quaravata, Iesusira timwa mwunra.

**31** Mwi entara nraakye qora airivanto Iesusira taqarerata vita nrita hi varuvarora tiro, Iesusiva-vata mwia nraaqiaranramwuvata hia kyuqema kye kyara nreva vahuvata varura. Mwitaa hu-varo Iesusiva tiqaro, Vivaqenramwu uro qumina sata tetaraa variarata nkyenramwu ho hiate, tiro.

**32** Iesusiva mwitaa timwa kyero mwin-ramwuhua sita varero mpotuqi mwaanri ntero kyaareraqaama tero qumina sata varirerata vurama.

**33** Mwinramwuhua vuvata airi nraakye qoravanto mwihua taqeta tiqata, Mwihua mate mwinima vivarave, timwa kyeta mpo mwatukya mpo mwatukyaqitaita mwihua hianteta kyaareratokyasataa mwataqaa vuhua uro Iesusiva mpotuqima tero virera hunani mwihua nraante uro ntora.

**34** Mwihua nraante uro ntovaro Iesusiva nraakiara uro ntero mpotuqitairo mwatani mwaamwi ntero nraakye qora airivanto ntuvantuama vuhua taqero mwihuara po kye timwa kyero tiqaro, Qikye, vaisivanto hia mwihuqaqa ntaqikyi varihata sipisipivanto nkyiariaraa nrohi varia sipisipihua votima kyeta mwaa nraakye qorahua api nrohi variavo, tiro. Mwitaa timwa kyero mwini variqaro Iesusiva qua mwakyaakya mwihua timwa nyi varura.

**35** Iesusiva timwaqiro vuvaro huari mpuani tumi vuvata Iesusira nraaqiaranramwuvanto mwiva varunani uro nteta tiqata, Huarivanto mpuani tumi viharo mwaini qumina satave.

**36** E nraakye qora mwaahua sitairata mwihua uro kyara vahiani mwatukyaraqi nrohiqata kyara kyoqaama kye nraate. Mwihua hia kyara ntumwa vareta nriahuave, tita.

**37** Mwia nraaqiaranramwu mwitaa tuvaro Iesusiva qaqao tiro, Nkyetama mwihua kyara nyiate, tiro. Tuvata mwihua Iesusira kyapara hita tiqata, Tire nronra munima 200 kinaa mwia kyetave kyara vara kyeta mwihua nyiananrave? tita.

**38** Mwitaa tuvaro Iesusiva mwinramwuhua kyapara hiro tiqaro, Mpereti nataamave ntumwa taavo? Nkye uro taqaate, tuvata mwihua uro taqeta nrumu timwa mwita tiqata, Mpereti kyauquruvata tavukya taaratanavata nraahuma ntumwa taavo, tita.

**39** Mwia nraaqiaranramwu mwitaa tuvaro Iesusiva nraakye qora timwa nyinro tiqaro, Nkye mwukyau mwaa mpo sata mpo sata ekyaama mwatakyaa vita variate, tiro.

**40** Mwitaa tuvata mwihua mpo sata 100 nramwu mwatakyaa vita varuvata mpo sata 50 nramwu mwatakyaa vita varuvata mwitaamaqi vita ekyaana nraakye qoravanto mwatakyaa vita varura.

**41** Mwatakyaa vita varuvaro Iesusiva mpereti hini kyauqu mwinramwunravata, tavukya taara mwitanavata, vara kyero nyaamwuni taqevaro Kotirara kyuqemave timwa kyero, mpereti nteqa kyero nai nraaqiaranramwu nyinro tiqaro, Qio nkye varaqita uro nyivata mwihua nraate, timwa kyero tavukya taara mwitanavata tukyama kyero nraakye qora mwihua ekyaana nyuvata

**42** ekyaa mwihua vikyokyama nronra.

**43** Vikyokyama nrovata Iesusira nraaqiaranramwu mwiaqaataita nraakyе qoravanto mpere-tivata tavukyavata nreqata viti vaati kyora utu aatuma kyeta tua nronra ntutantuto tuara 12 nramwu piqa kyora.

**44** Mwi entara 5,000 vaisi airivanto mwi kyarara nronra.

*Iesusiva kyaarera mwutuqaa kyuqu ntamwaqiro vura  
(Matiu 14:22-33; Ioni 6:15-21)*

**45** Iesusiva mwihua kyara nyinro mwiaqaatairo qamwanrama kyero nai nraaqiaranramwu sitero tiqaro, Nkye nraante mpotuqi mwaanrinte kyaareraqaamate vutura qarahi hini Vetasaitaani vi varivaqenama nte nraakyе qora sitaarita nkyiari mwaatani quate, tiro.

**46** Mwita tuvata mwihua vuvaro Iesusiva veraa taaqiqaa Kotirara aakyara tirero viro.

**47** Iesusiva Kotirara aakyara tirero vuvaro entama vuvata mpotuqi vuhua kyaarera tavaara sata vi varuvaro Iesusiva nanrianraa qatinani variro.

**48** Iesusiva mwini variqaro taqovaro toqavanto mwihua virera hunasairo nriqanro mpotu vente varuvata mpotuqi varuhua mwukyaari tiqata nramanri ntainraqita vura. Mwitaamaqita vuvaro qauma qaatatarera huvaro Iesusiva mwihua huntu kyarero kyaarera mwutuqaa nrinro.

**49-50** Mwiva nriqanro mwihua nraatara kye quankye tiro, utuvata mwihua taqovaro Iesusiva kyaarera mwutuqaa nri varuvata mwihua

mpoqama kyero nraatuqa tovata vaanave timwa kyeta, aatu hiqata oi aai ti varura.

Mwihua oi aai ti varuvaro Iesusiva qamwan-rama kyero mwihuara tiqaro, Kepukyaqama kyeta variate. Ntema nruquo. Hia aatu hiate, tiro.

<sup>51</sup> Mwitaa timwa kyero Iesusiva mpotuqi mwaanri ntero mwihua kyapata varuvaro toqavanto taiqa viro tirema vahuvata mwihua qikye tita, kyauqu ntukikinraaqate variqata

<sup>52</sup> Iesusiva mpereti taaraqia airiqama kyero nraakye qora nyunranra hia mwihua su nyaato ntapihuvata hia Iesusira okyarara ntapihi kyeta riora.

*Iesusiva Kenesaretini uro variqaro nriqa vuhua kyuqema kyora*

(Matiu 14:34-36)

<sup>53</sup> Mwihua vutura hini vantara Kenesaretini uro nte mwaamwi nteta mpotu rupate

<sup>54</sup> mwataqaa virera huvata mwi mwatanaahua Iesusira ntapihi kyeta taqeta, Qio mwaa mwivave, tita.

<sup>55</sup> Mwitaa timwa kyeta mwihua hianteta uro vutusai vurusaita nriqa vu nraakye qorahua sitaqita tumu Iesusiva variho tunani kyora.

<sup>56</sup> Iesusiva mwi mwataraqaa variqaro mpo mwatuqya mpo mwatuqya pata mwatuqya, nronra mwatuqya, uta aakyoqi vahu mwatuqyarave, Iesusiva mwini nrohi varuvata mwi mwatanaahua nriqa vuhua sitaqita mwatuqyaqaa kyeta Iesusirara po kye tita tiqata, Qiove nriqa vi nraakye qorahua i tuavaaqa vitiqaa kyaativarave? tuvaro Iesusiva qiove

tuvata ekyaa mwiaqa kyaatu kyo nraakyе  
qorahua kyuqema nraahu vura.

## 7

*Kotiva timwa tai quava vaisivanto timwa tai  
quaravata nraatara kyero vhira*

(Matiu 15:1-9)

<sup>1</sup> Parisi vaisinramwuvata mwaanra okyara ti varu vaisihuavata Iesusira taqarerata Ierusaremisaita nrumu Iesusiva varunani ntuvantuama vita variqata

<sup>2</sup> taqovata Iesusira nraaqiara mponramwuvanto variqata Parisi vaisi mwihua qua mwaanra okyara qaqira kyeta hia kyauqu hiqaraitita, kyara nre varura.

<sup>3</sup> Mwi entara Parisi vaisinramwuvata ekyaa Iutia mwatanaahuavata nkyiari haivaqahua timwa to quara rieqata mwitaa mwitaama kyeqata mwihua nkyiari kyauqu hiqe varura. Mwihua hia kyauqu hiqohua hia kyara nronra.

<sup>4</sup> Mwihua uro maaketiqi nrohita uro ntanteta nrumu varita hia nkyiari kyauqu hiqama kyaraitita, hia kyara nronra. Mwihua haivaqahua kaapu hiqe okyararave, tanu hiqe okyararave, mpo okyara mpo okyara timwa nyuvata mwihua riemwaqi viqata nrohi varura.

<sup>5</sup> Mwihua mwi quara riemwaqita nrohi varuhuara tita, Parisi vaisinramwuvata, mwaanra okyara ti varu vaisihuavata, Iesusira kyapara hita tiqata, Tiri haivaqahua qua timwa tora i nraaqiaranramwuvanto nteqa kyeta hia kyauqu hiqaraitita, kyara nre variavo. Nanraqamave mwihua mwitaa hi variavo? tita.

**6** Mwitaa tuvaro Iesusiva mwihua nkyiari timwa nyinro tiqaro, Nkye unraqama kyeqata kyuqe kyaiqa vare variahuave. Aisaiaava haaru variqaro nkyiara avuqavuma kyero qara ntumwa torave. Kotiva mwia kyaahaqa huvaro Aisaiaava Kotiva mwitaama tiho tiro:  
 Mwaa mwatanaahua nroqitai nraahu ni nutu tuaahere  
 variavaro mwihua mwutukyavanto hia nianra vaiho.

**7** Mwihua mwaanra tiqatama mwihua nkyiari haivaqahua  
 qua nraahu timwa nyiqata mwihua quminama ni nutu tuaahere variavo, tura. (*Aisaiaa 29:13*)  
 Aisaiaava mwitaama kyero qara ntumwa torave.

**8** Kotiva nkyiara mwitaa mwitaa hiate tu quara nkye mwi quara qaqlira kyetama vaisivanto timwa taa quara nraahuma riemwaqita nrohi variarave, tiro.

**9** Mwitaa timwa kyero Iesusiva mwihuara qaiqaa tiqaro, Qio kyuqema hiavo. Kotiva mwitaa mwitaa hiate tu quara nkye mwi quara qoririma kyeta nkyi haivaqahua timwa to quara nraahu riemwaqita vi variahuave.

**10** Mosesiva Kotiva timwa to quara riero nkyiara tiqaro, Ena nrohua qohua nrutu tuaahera nyataante. Nai nrohua qohuara uaqia hiani quara ti variani vaisira rukyaate, turave.

**11** Kotiva mwitaa timwa to quava vahata nkye mwi quara hia riaraitita, nkyeta riemwa kye nkye tiqata, Vaisivanto nai nrohua qohuara tiqaro, Nte nkyitana kyaahaqa hirera tu munimanra hia nkyitana nyinraitina, Kotirani vatarerave, tirera,

<sup>12</sup> mwi vaisiva qioma nai nrohua qohua qaqlira kyero hia mwitanahuaqaa ntaqikyiqiro quanarrove, qiarave.

<sup>13</sup> Nkye unra qua mwitaa tiqatama Kotira qua nteqa kyetama nkyita haivaqahua timwa nyu quara mwia nraahuma nraakye qora timwa nyi variavo, tiro.

*Nnra inraikyavanto vaisi uaqlama mwataiharo Kotiva mwianra uaqia hi vaisirave tura*

*(Matiu 15:10-20)*

<sup>14</sup> Iesusiva nraakye qora ntuvantuama vuhua nyaanrama kyero mwihua timwa nyinro tiqaro, Nkye ekyaa nte tirera hiani quara kyuqema kyeta rieqatama variate.

<sup>15</sup> Kyaravanto qatinasairo vaisi utaqi vi inraikyava hia vaisi uaqlama mwataiharo Kotiva mwianra mwiva uaqia hi vaisirave qiananrove. Vaisi utaqitairo qovara hi inraikyava vaisi vara kyero uaqlama kyairave.

<sup>16</sup> Nkyi su nyaato kyuqe su nyaato vahirera, mwi quara okyara ntapihi kyeta riaate, tiro.

<sup>17</sup> Iesusiva mwitaa timwa kyero nraakye qora ntuvantuama vuhua mwini kyero nraamwuqi uro varuvata mwia nraaqiaranramwuvanto Iesusiva vaakya tu quara okyarara mwia kyapara huvaro

<sup>18</sup> Iesusiva tiqaro, Qikye, nkyi su nyaatovata mpo? Nkyi su nyaatovanto hiave ntapihi riaiho? Kyaravanto qatinasairo vaisi utaqi vi inraikyava hia qio vaisi uaqlama mwataiharo Kotiva mwianra mwiva uaqia hi vaisivave, qiananro.

**19** Vaisivanto kyara nraihanro hia mwi kyarava mwia vu nraatoqive mwutukyaqive viraitiro, qati vaisi raraqi ito vahiro qio mwiqitairo qatinani tumitarairave, tiro. Iesusiva mwi quara timwa nyiqanro mwi quaraqotairo nraakyе qoravanto ekyaa kyara qio nraivaro Kotiva hiama nkyiara uaqia hia vaisihuave qiananrove, tura.

**20** Iesusiva mwitaa timwa kyero qua mpo tiqaro, Vu nraatoqinaa inraikyavanto, mwutukyaqinaa inraikyavanto, mwi inraikyava mwi inraikyava vaisi uaqama kyaiharo Kotiva mwi vaisirara uaqia hi vaisirave tirave.

**21** Vaisi vu nraato mwutukyaqitairo uaqia hi kyaiqara utuariva nriho. Vaisivanto nraakyevata api nrohiariva vu nraatoqitairo nriho. Mpuara varaarivavata mwiqitairo nriho. Vaisi ru kyaari-vavata mwiqitairo nriho. Mpora nraata vaatiara nrohiarivavata mwiqitairo nriho.

**22** Mpova hi inraikyarara mwutukya ntiraro varaariva vu nraatoqitairo nriho. Airi munimave mpo inraikyave vaterovata qaiqaa kyaavata nraahu vararerave ti variariva vu nraato tuaraqitairo nriho. Unra qua qiarivave, hia nai mwamwantaqa kyuqema ntumwa quarivave, mpova hi inraikyarara vairiqa hiarivave, mpora nrutu vara mwataniqa hiqaro qiarivave, nte nronra vaisive qiarivave, api nrohianinranra nraahu riemwaqi quarivave,

**23** ekyaa mwi inraikyava vaisi vu nraato mwutukyaqitairo nri ntero vaisi uaqama kyaiharo Kotiva mwia kyaara mwianra uaqia hi vaisirave qiananrove, tiro.

*Mpo mwatanaa nraakyevanto Iesusira kepuk-yara riovoro Iesusiva mwia kyaahaqama kyora  
(Matiu 15:21-28)*

<sup>24</sup> Iesusiva mwitaa timwa kyero mwi mwatara kyero uro mpo mwatani Taiaavata Saitonivata vahu mwataraqaa varurama. Mwiva uro variro hia mpovanto ni taqaarive timwa kyero, nraamwu mpoqi varuvaro nraakye mpovanto mwiva varura vaakya ntapihi kyora.

<sup>25</sup> Ntapihi kyero nraakye mwia nraamwunraqi vaanavanto varu nraakyeva Iesusiva varuraqi uro ntero Iesusira nraaqani mwia kyuqusata tumu ntiro varura.

<sup>26</sup> Mwi nraakyeva nai mpo mwatanaava hia Iutaa mwatanaava, mwiva Siria mwata Ponisiaqi mwatatova varura. Mwi nraakyeva Iesusirara po kye tiro tiqaro, Ni naamwunraqitaira vaana titairaro qatinani nritaraarive, tiro.

<sup>27</sup> Nraakye mwiva mwitaa tuvaro Iesusiva nai timwa mwinro mpo quaqaa ntumwa kyero tiqaro, Qaqao, nte nraaqiara nraante kyara mwinrenrave. Nte nraaqiara kyara vara kyena vairi nyiankyorave, tiro. (Mwi quara okyara mwataamama vahiro: Iesusiva tiqaro, Kyai nte Iutaa mwatanaahua nraante kyaahaqa hiankye. Nte mpo mwatanaahua nraante kyaahaqa hiankyorave, tiro.)

<sup>28</sup> Tuvaro nraakye mwiva tiqaro, Nronrao, e qutaa qiararovata, vairivanto tainta mwemwaqi variqaro nraaqiaravanto kyara viti vaati nreqata kyaara nrainrave, tiro.

<sup>29</sup> Nraakye mwiva mwitaa tuvaro Iesusiva tiqaro, Kyuqema tira hiaro. E mwitaa qiarananra

tina, nte vaana mwia titauqaro qatinani nritaraiho. I nraamwunravanto qio variho. Qio ena mwaatani quante, tiro.

<sup>30</sup> Jesusiva mwitaa tuvaro nraakye mwiva nai mwaatani vuva uro ntero taqovaro vaanavanto mwia nraamwunraqitairo nritarero vuvaro mwi qiaatarava taintaqaa kyuqema vaite varurama.

*Nraato tita vuvaro quavata hia ntapihi kyero tu vaisira Jesusiva kyaahaqama kyora*

<sup>31</sup> Jesusiva Taiaani variro mwiaqaatairo Saitoninivata uro variro mwisairo vintantero kyauqurutana mwatukya vahunanivata vintantero mwisairo kyaarerera nramanri Karirini tumu ntora.

<sup>32</sup> Mwini tumu varuvata mpo uhua vaisi mpo vitaqita uro Jesusiva varunani kyora. Mwia nraato tita vuvaro quavata hia ntapihi kyero tu vaisira vitaqita uro Jesusiva varunani kyeta Iesusirara po kye tita tiqata, Ena kyauqu mwiaqaa vatairaro kyuqema quarive, tita.

<sup>33</sup> Mwihua mwitaa tuvaro Jesusiva nraakye qoraqitairo vaisi mwia vitero uro nkyiariaraatana variqata Jesusiva nai kyauqu vukahiyo vaisi mwia nraatoqi veta vatero quaantu vihi kyero mwia mwaaqinriqaa vatero

<sup>34</sup> nyaamwuni taqevaro mwia ua huvaro po timwa kyero nai quaqitairo tiqaro, *Epatave*. Qatua quante, tiro.

<sup>35</sup> Mwitaa tuvaro mwia nraato tita vuva qamwanrama qatua vuvaro qio riero varuvaro mwia mwaaqinrivantovata qio vahuvaro qua ntapihi kyero ti varura.

**36** Mwitaa huvaro Iesusiva mwia nramwunaahuara kepukyaqama kyero tiqaro, Mwaa in-raikyara taqaara hia mpohua timwa nyiate, tiro. Iesusiva mwitaa tuvata mwihua Iesusira qua hia riaraitita, mwi quara viti viri timwa nyiqita vura.

**37** Mwihua viti viri mwi quara timwa nyiqi vuvata mwi quara riohua qikye tita, kyauqu ntukikinraaqateta tiqata, Mwiva ekyaa kyaiqa kyuqema kyero vare varivave. Mwiva nraato tita quahua kyuqema kyaihata qio riaarave. Mwiva hia qua qiahua kyuqema kyaihata qio qua ti variarave, tura.

## 8

*Iesusiva qaiqaa pata kyara airiqama kyero nyunra  
(Matiu 15:32-39)*

**1** Mwi entara nraakyе qora airi kyaatavanto Iesusira taqarerata nrumu ntuvantuama vita varura. Mwihua hia kyara mpoqianivata ntumwa taraitita, qati varuvaro Iesusiva nai nraaqiaranramwu nyaanrama kyero tiqaro,

**2** Nte nraakyе qora mwaa variahуara po tuqо. Mwihua taarampo enta ni vatama kyeta variqi viqata nkyiari kyara nramwa taiqa kyaavo.

**3** Nte mwihua nkyiari mwaatani sitaarita mwihua nraataa hiro vuqitairo nrivu nrivuhirata aanraqaa tumu ntivorave. Mpo hiahua nyianrasaitavata nriahuave, tiro.

**4** Iesusiva mwitaa tuvata mwia nraaqiara mwihua qaqao tita, Mwaa qumina mwukyauqaave. Taisaitave kyara varaananrave, tita.

**5** Tuvaro Iesusiva mwihua ntumwahiamwa hiro, Nkyenramwu nataama mperetive ntumwa taavo? tuvata mwihua tiqata, Mpereti 7 nramwu ntumwa tauro, tita.

**6** Mwihua mwitaa tuvaro Iesusiva nraakye qora ntuvantua uhara tiqaro, Mwatasata mwatakyaa quate, timwa kyero mpereti 7 nramwu vara kyero Kotirara kyuqeve timwa kyero, mwi kyarara nteqa kyero nai nraaqiaranramwu nyinro nraakye qora nyiate, tiro. Tuvata mwihua nraakye qora ntuvantua uhua nyunra.

**7** Nyuvaro Iesusiva tavukyavata vatora vara kyero Kotirara kyuqeve timwa kyero tiqaro, Tavukyavata tukyama kyeta nyiate, tiro.

**8** Mwitaa tuvata mwihua nyuvata nraakye qoravanto qioqama kyeta nronra. Qio nreta viti vaati kyora mwia nraaqiaranramwuvanto utu kyeta ntutantuto tuara 7 nramwu piqa kyora.

**9** Mwi entara 4,000 nraakye qora airivanto mwi kyarara qio nronra.

**10** Qio mwiaqaatairo Iesusiva nraakye qora sitero mwiva nai nraaqiaranramwu kyapata mpotuqi mwaanri ntero kyaarerera nramanri qara varero Ntamanutaa mwatani viro.

*Parisivanto Iesusirara nronra kyaiqa tirivata  
tinraamwu taante tura  
(Matiu 16:1-4; Ruku 12:54-56)*

**11** Iesusiva Ntamanutaa mwatani vuva uro ntovata Parisi vaisinramwu Iesusiva hunani nri nteta Iesusira inronrama mwatarerata mwia mwataara hiqata taqaare timwa kyeta tiqata, E

nronra kyaiqa tiri tivuqaa varairaqeta tire taqe iara quitaama Kotiva i titaiho qiare, tita.

<sup>12</sup> Mwihua mwitaa tuvaro Iesusira ua huvaro po tiro tiqaro, Mate mwaa varia nraakyе qorahua nanraqamave tiqata nronra kyaiqa tinraamwu tairaqe tire i okyarara quitaave qiare ti variavo? Nte qutaa qianinra riaate. Mate mwaa entara variahua varivaqena nte hia ntena okyara mwihua nyaamwu teqana nronra kyaiqa vararerave, tiro.

<sup>13</sup> Iesusiva mwitaa timwa kyero qaqira mwihua mwini kyero mpotuqi mwaanrintero kyaeraqaama tero vutura hini tokyanianra viro.

*Parisi vaisi kyaiqa nraatu rauriqata variate tura*  
*(Matiu 16:5-12)*

<sup>14</sup> Kyaareraqaa vi varuvata Iesusira nraaqiaranramwuvanto mpereti taunru kyeta hia vararaitita, kuaiqia nraahu mpotuqi vatovaro

<sup>15</sup> Iesusiva mpo quaqaa ntumwa kyero tiqaro, (Taupatai inraikyava mperetiqi viharo mperetivanto kyotairave.) Parisivantovata Herotivavata taupataira votima kyeta variavo. Nkye mwihua nyaatu aatu hiqata variate.

<sup>16</sup> Mwitaa huvata mwia nraaqiaranramwuvanto Iesusiva mpo quaqaa ntumwa kyero tu quara hia ntapihiraitita, nai timwa mwi nai timwa mwi hita tiqata, Nanra quave tiho? Mpereti hia varauanra mwianra rieqarove mwitaa tiho? tita.

<sup>17</sup> Mwitaa ti varuvaro Iesusiva mwihua ti varu quara riero tiqaro, Nkye nanraqamave mpereti hia varaara kyaara airi qua ti variavo? Hiave

nkyi su nyaatovanto ntapihi vihata ntapihi kyeta riaavo? Nkyi nyaato tita vihatave nkye hia ntapihi kyeta riaavo?

<sup>18</sup> Nkye su nyaato vataahua nkye hiave ntapihi kyeta rieta taqaavo? Nkye nte kyaiqa varaurara taunruve kyaavo?

<sup>19</sup> Nte 5,000 nraakye qora mpereti kyauquru nteqa kyena nyiavata nreta viti vaati kyora nataama tua nkye mwi entara piqa kyorave? tiro.

Iesusiva mwitaa tuvata mwihua tiqata, Qio tire mwi entara tua 12 nramwu piqa kyaavananrave, tita.

<sup>20</sup> Mwihua mwitaa tuvaro Iesusiva qaiqaa tiqaro, Qio nte 4,000 nraakye qora mpereti 7 nramwu nyiavata nreta viti vaati kyora nataama tua nkye mwi entara piqa kyorave? tiro.

Tuvata mwihua tiqata, Qio tire tua 7 nramwu mwi entara piqa kyaavananrave, tita.

<sup>21</sup> Mwihua mwitaa tuvaro Iesusiva tiqaro, (Nkye nte mwi kyaiqara varaurara ntapihi kyeta riaataara vahata nkye taunru kyeta mpereti kuaiqia vare nrianranra airi qua ti variavo.) Nkyi su nyaato ntapihi virata ni okyarara riaataara vahata nkye nataamaqitave ni okyarara hia ntapihi riaavo? tiro.

*Iesusiva vaisi mpo vu qipa vura ntapairi mwatora*

<sup>22</sup> Iesusiva nai nraaqiaranramwu kyapata vuhua Vetasaitaani uro nteta mwini varuvata mpo uhua vu qipavu vaisira vita vareta Iesusiva varunani uro kyeta Iesusirara po tita tiqata, Vaisi mwaqa ena kyauqu vatairaro qio taqaarive, tita.

**23** Mwitaa tuvaro Jesusiva vu qipavu vaisira kyauqu tu varero vitaqiro uro mwatukya mwaqaani kyero mwini variqaro mwia vuqaa taara vihi kyero nai kyauqu mwiaqaa vatero mwia kyapara hiro tiqaro, Mpo inraikya qiove taqera hiaro? tiro.

**24** Jesusiva mwitaa tuvaro vaisi mwia vu qauma ntapairi virera huvaro mwiva vutu taqero tiqaro, Nte vaisi taqe varuqata mwihua kyatari votima kyetama nrohi variavo, tiro.

**25** Mwitaa tuvaro Jesusiva qaiqaa nai kyauqu mwia vuqaa vatovaro mwia vuvanto ntapairi vuvaro mwiva kyuqema kyero ekyaa inraikya taqero.

**26** Vaisi mwiva ntapihi kyero taqovaro Jesusiva mwia titero tiqaro, Hia mwi mwatukyaraqi nrumu ntantera viraitira, ena mwaatani quante, tiro. Turama.

*Pitaava Iesusira okyarara tura  
(Matiu 16:13-20; Ruku 9:18-21)*

**27** Mwiaqaatairo Jesusiva nai nraaqiaranramwuvata uro Sisariaa Piripai qaumato vahu mwatukyaraqiara viro. Aanraqaa viqaro nai nraaqiaranramwu kyapara hiro tiqaro, Nraakye qoravanto nianra tavave timwa kyeqatave ti variavo? tiro.

**28** Mwitaa tuvata mwihua tiqata, Mpo hiahua iara Ioniva nramanri nyi varivave qjavata, mpo hiahua iara mwiva tiri haivaqava Iraisaavave ti variavata, mpo hiahua iara mwiva tiri haivaqava poropeti vaisi mpovanto qaiqaa qovarama viro nrohi variho ti variavo, tita.

**29** Mwihua mwitaa tuvaro Iesusiva mwihua ntumwahiamwa hiro tiqaro, Qio nkyenramwu mpo? Nkye nianra ta vaisiva varihove qiavo? tiro. Mwitaa tuvaro Pitaava tiqaro, E Karaisiva, Mesaiaavantove. E Kotiva titai vaisiva variaro, timwa kyeqatama tire varuro, tiro.

**30** Mwitaa tuvaro Iesusiva mwinramwuhuara kepukyaqama kyero tiqaro, Hiavatama mwi quara mpohua timwa nyiate, tiro.

*Iesusiva nraakiara nai qutuaninranra timwa nyunra*

*(Matiu 16:21-28; Ruku 9:22-27)*

**31** Mwitaa timwa kyero Iesusiva qua tohara tero vutu kyero nai nraaqiaranramwu mwiva nraakiara nai qutuaninranra timwa nyinro tiqaro, Nte mwatani mwatatai nraaqiarava variqana nriqa quani inraikyara airi vararerave. Nronra vaisivantovata, Kotira kyaiqa vara mwate varia vaisihua vunyaa vaisivantovata, nianra qumina vaisive timwa kyeta, ni qoririma matevarave. Mwihua mwitaa hiqatama ni ru kyaivaqena nte qutu vina taarampo enta varina qaiqaa qati siquaninrave, tiro.

**32** Iesusiva mwi quara vutu kyero qoqaa timwa nyuvaro Pitaava Iesusira vita uhini kyero qaqao tiro, Qora quama tira hiaro, tuvaro

**33** Iesusiva tuqasaa viro nai nraaqiaranramwu taqero Pitaara inronra hiro tiqaro, Saataanio, nyianrasata quante. Hia ni puqaa variante. E hia Kotiva riaintema kyera riaaro. E qumina vaisivanto riaintema kyera rie variaro, tiro.

**34** Iesusiva mwitaa timwa kyero nraakye qora ntuvantua uhuavata nai nraaqiaranramwuvata nyaanrama kyero timwa nyinro tiqaro, Ni pataqiro nrianri vaisiva mwiva nai mwutukya vahianinra qaqlira kyero vaisi rukyeta hirite katarira vara qu varero ni naakiara nriananrove.

**35** Nai mwatani qati varianinranra nraahu nronraqama kyero riaariva, mwi vaisiva ekyarama qutu quananrove. Vaisivanto nianra riemwaqiro viqaro ni kyaiqa vararero ni qua riemwaqiro viqaro uro qutu quariva, mwi vaisiva ekyaa enta qati variqiro quananrove.

**36** Vaisivanto mwatani variqiro viqaro ekyaa inraikya ntuvantuama kyero mwiaqatairo qutu viraro mwiva ntuvantuama taani inraikyava nataama kyeroove mwia kyaahaqa hiananrove? Hia mwi inraikyava mwia qio kyaahaqa hiananrove.

**37** Vaisivanto qutu viro nanra kyoqaave mwinro qaiqaa qati variqiro quananrove? Hia mwiva mwi entara qio kyoqaa utu kyero qaiqaa qati variqiro quananrove.

**38** Mwaa entara mwatani varia nraakye qorahua uaqlia hi kyaiqara utiqatama Kotira qaqlira kyaavo. Vaisi mpovanto nianravata ni quaravata mpoqama kyero kyaauruariva, mwi vaisiva variraqe nte mwatani mwatatai nraaqiarava variqana nraakiara nte tumuani entaraqaa nai-vata kyaaurira inraikya vara mwianinrave. Mwi entara ni kora peqa okyaravanto niqaatairo itero ntuvaahe variraqena nyaamwunyaahua vatama kyena tumuaninrave. Mwi entara nte mwi

vaisira naivata kyaurira inraikya vara mwianinrave, tiro. Iesusiva turama.

## 9

<sup>1</sup> Iesusiva mwitaa timwa kyero tiqaro, Nte qutaa qianinra riaate. Vaisi mponramwu mwaini mate mwaa sivita variahua hia qumina qutu vivarave. Kotiva nraakyae qoraqaa kepukyaqama kyero ntaqikyiari entava nrianinra mwihua taqeta qutu vivarave, tiro.

*Iesusira mwamwantavanto nai nraahumwa  
mpo mwamwanta kyuqe mwamwanta kyuqu vura  
(Matiu 17:1-13; Ruku 9:28-36)*

<sup>2</sup> Iesusiva mwitaa tuvaro 6 enta nritarovaro mwiva Pitaaravata, Iemisiravata, Ioninravata, mwinramwuhua nraahu sita varero taaqi nronraqa nkyiariaraa varirerata vita. Mwini uro varuvaro mwihua suqaa Iesusira mwamwantavanto kyuqu viro vahuvaro

<sup>3</sup> mwia tuavaaqavantovata mpoqama kyero itero takyuqi varura. Hiama qio vaisi mpovantohiqama tairaro mwitaama kyero takyu quannanro.

<sup>4</sup> Mwitaama kyero mwia mwamwantavanto kyuqu viro vahuvata mwia nraaqiara taaramponramwuvanto variqata taqovata Iraisaakya Mosesikya mwihua haivaqahuatana qovarama vita variqata Iesusira vatama kyeta qua ti varura.

<sup>5</sup> Mwitanahua Iesusira vatama kyeta qua ti varuvaro Pitaava Jesusirara tiqaro, Mwaanra ti variara vaisio, kyuqemama tirenramwu i vatama kyeta mwaini nrunrahua varuro. E qiove tirera, tire haraara nraamwu taaramponramwu iara

mpo, Mosesirara mpo, Iraisaarara mpoma kyeta hoqa nyataare, tiro.

<sup>6</sup> Mwihua mpoqama kyero nyaatuqa tovata varuvarora tiro, Pitaava nanra quave qianinrave tiro, mwi quara turama.

<sup>7</sup> Mwitaa tuvaro tonamwuvanto qovara hiro mwihuaqaa ntumwaqu kyovaro quavanto tonamwuqitairo tiqaro, Mwaa ni maaqu mwianra ni mutukya nti variva variho. Nkyenramwu mwia qua riaate, tiro.

<sup>8</sup> Mwitaa tuvata mwia nraaqiaranramwuvanto qamwanrama kye tuqasaaqasa hiqata taqovaro hia mpovantovata Jesusira nraaqani varuvaro Jesusiva nraahu nanrianraa varura.

<sup>9</sup> Mwitaa huvata mwihua taaqi mwiaqataita tumi varuvaro Jesusiva mwinramwuhuara kepuqyaqama kyero tiqaro, Mateqa taqaa inraikyarara hia mpohua qamwanrama kyeta timwa nyiate. Nte mwatani mwatatai nraaqiarava nte nraakiara qutu vina qaiqaa qati sivina varianinraqaataita nkye qiomma timwa nyiqita vivarave, tiro.

<sup>10</sup> Mwitaa tuvata Jesusiva tuntema kyeta hia mpohuavata timwa nyinraitita, nkyiari nraahu nai timwa mwi nai timwa mwi hita tiqata, Jesusiva nai qaiqaa siquaninranra tira nataa hi quarave tiho? tita.

<sup>11</sup> Mwitaa timwa kyeta mwihua Jesusira kyapara hita tiqata, Mwaanra okyara timwa nyi varia vaisihua tiri timwa timwita qiarave. Iraisaava tiri haivaqava mwiva nraante qovarama viro nri ntaananrove, ti variarave. Nanraqama mwihua mwitaa ti variavo? tita.

<sup>12</sup> Mwihua mwitaa tuvaro Iesusiva timwa nyinro tiqaro, Qio mwihua qutaa ti variarave. Iraisaava nraante ekyaa inraikya ntapihi kyero terama tarero nrianrivama variho. Ni mwatani mwatatai nraaqiarara mpo? Nanra qua ni-anra qara ntumwa tova vahirave? Nianra mwiva airi nriqa quani inraikyara varaqiro virata mwiaqataita mwihua mwia qoririma mwatetama mwianra qumina vaisive tivarave tiro, qara ntumwa torave.

<sup>13</sup> Qio nte nkyiara tiqana Iraisaava vaakya nrumu varurarama tuqo. Mwiva nrumu varuvata vaisi mponramwuvanto mwia nkyiari kyakya huntema kyeta mwia uaqiamma mwatorave. Kotira mpukuqi qara ntumwa tova tiqaro, Nraakiara mwia mwitaa hirave tura mwivau mwia mwitaa hurave, tiro.

*Iesusiva nraaqiaraqitairo vaana titovaro  
nritarero vura*  
(Matiu 17:14-21; Ruku 9:37-43)

<sup>14</sup> Mwitaa timwa kyero Iesusiva nai nraaqiara hininramwu kyonani tumu taqovata nraakyehora airivanto ntuvaantuama vita varuvata mwaanra okyara ti varu vaisihua mwini variqata Iesusira nraaqiaranramwu kyapata inronra hi varura.

<sup>15</sup> Mwihua tumu ntovata mwini ntuvaantuama vita varuhua qamwanrama kyeta Iesusira taqeta nrihanrama vita hiante uro mwia qua mwantovaro

<sup>16</sup> Iesusiva nai nraaqiara hini mwinramwuhua kyapara hiro tiqaro, Nanra inraikya kyaarave nkye mwihua kyapata inronra hi variavo? tiro.

**17** Mwitaa tuvaro nraakye qora utaqitairo vaisi mpovanto mwia timwa mwinro tiqaro, Mwaanra ti variara vaisio, vaanavanto ni maaqu utaqi variharo mwiva hia qio qua tihanana tina, nte e hiananrani vitena nruquo.

**18** Vaanavanto ni maaqu ntavaaqavu kyero mwia mwataqaa tuta kyaiharo mwia nroqitairo taaraparavanto nrihanro nai vai kuti haro ekyaa mwia mwamwantavanto ntapihi viro kepukyaqama vivihirave. Nte i nraaqiarara vaana titaivarо nritarero quarive tuqata mwihua mwitaa hiare qiaqaro vaanavanto hia nritare virave, tiro.

**19** Vaisi mwiva mwitaa tuvaro Iesusiva mwi quara riero tiqaro, Nkye mwaa entara varia nraakye qorahua Kotirara qumimaqama kyeta hia mwianra riaavo. Qikye, nkye ni pupohaira uti variavana nte nataama nanive nkyi kyapata varianinrave? Nte nataama entave variqana nkyi kyaahaqa hianinrave? Qio nraaqiara mwia vita vareta mwaini nriate,

**20** tuvata vite nruvaro vaanavanto Jesusira taqero nraaqiara mwia vara mwataqaa tuta kyovaro tuqasaaqasa hi varuvaro mwia mwamwanta ntirintiri hi varuvaro taaraparavanto mwia nroqitairo mpo uti varura.

**21** Mwitaa hi varuvaro Iesusiva mwia qora kyapara hiro tiqaro, Taire tohara kyero ve mwitaa iho? tiro. Mwitaa tuvaro mwiva tiqaro, Nraaqiara pataru variharo mwitaamaqiro virave.

**22** Vaanavanto mwia rukyaankye tiro, mwia vara qiaqive nramanriqive tuta kyairave. E tiri

qio kyaahaqa hirava varirera, tiriara po tiqara tiri kyaahaqa hiante, tiro.

<sup>23</sup> Mwitaa tuvaro Iesusiva qaqao tiro, E tiqara, E qio tiri kyaahaqa hiravave variaro qiananrave. E hiave ntapihira hiaro? Kotirara kepukyaqama kyero riaariva ekyaa kyaiqa qio varaananrove, tiro.

<sup>24</sup> Tuvaro nraaqiara mwia qova qamwanrama kyero tiqaro, Qio nte Kotirara riemwaqina vuva hiama qioqa iho. Evata ni kyaahaqa hiraqena nte Kotirara kepukyaqama kye riemwaqina quangye, tiro.

<sup>25</sup> Mwitaa tuvaro Iesusiva taqovata nraakye qora ntuvantuama vuhua hisai hisai vaini nruvaro Iesusiva vaana inronra hiro tiqaro, E hia qua qiara vaanavave. E nraatora hiara vaanavave. E nraaqiara mwiqitaira nritadera quante. Hia qaiqaavata nraaqiara mwiaqi viqetera variante, tiro.

<sup>26</sup> Mwitaa tuvaro vaana mwiva nronraqama kyero aakyara ntero nraaqiara mwia vara ntuqutuvaro ntirintirima eqero mwiva qutu vuhua nraantantamwa kyero ntumwa viro vahuvata nraakye qoravanto tiqatama, Mwiva qutuma viho, tita.

<sup>27</sup> Tuvaro Iesusiva mwia kyauquqaa tu varero mwia vara mwaamwianrama kyovaro qio qati siviro varura.

<sup>28</sup> Nraaqiara mwiva qio qati siviro varuvaro Iesusiva mwiaqaatairo uro nraamwuqi varuvata mwia nraaqiaranramwuvanto uro mwia tirema kye nanrianraa ntumwahiamwa hita tiqata, Tire

vaana mwia titauraro hia nritarero virave. Nanraqamave tire hia qio mwitaa huro? tita.

<sup>29</sup> Mwihua mwitaa tuvaro Iesusiva tiqaro, Mwitaa hiani vaananra hia qio qati titivararo nritarero quananrove. Kotirara aakyara nteqatama titivararo qio nritarero quananrove, tiro. Iesusiva turama.

*Iesusiva qaiqaa nai qutu viro qati siquaniranra vutu kyero timwa nyunra*

(Matiu 17:22-23; Ruku 9:43-45)

<sup>30-31</sup> Mwiaqaatairo Iesusiva nai nraaqiaranramwu kyapata mwi mwatara kyeta Karirini vura. Mwini viqaro qua ntapihi kyero nai nraaqiaranramwu timwa nyianriva vahuvarora tiro, mpovanto tire quananra puaama kyero taqaankyo tiro uqeta kye sitero vura. Iesusiva nai nraaqiaranramwu timwa nyinro tiqaro, Mpovanto ni mwatani mwatatai nraaqiarara qovarama kyairata ni ntavaaqavuqita uro vaisi kyauquqi kyaivata ni ru kyaivaqena qutu vina taarampo enta vari kyenama qaiqaa qati siquaninrave, tiro.

<sup>32</sup> Iesusiva mwitaa tuvata mwia nraaqiaranramwuvanto mwi quara okyara hia ntapihi ri-araitita, mwiva qua tura nraatu aatu hiqata hia mwi quara okyarara kyapara hura.

*Tavave tirinramwuqitairo nronraqama viro vunyaa vaisivanto variananrove tura*

(Matiu 18:1-5; Ruku 9:46-48)

<sup>33</sup> Mwinramwuhua vuhua Kapenaamini uro ntovaro Iesusiva nraamwuqi uro variqaro nai nraaqiara mwihua kyapara hiro tiqaro,

Nkyenramwu aanrani nriqata nanra qua timwa kyetave inronra hiavo? tiro.

**34** Mwitaa tuvata mwihua hia qua tiraitita, tirema varura. Mwinramwuhua aanrani nriqata mwitaama tita, Tavave tirinramwuqitairo nronraqama viro vunyaa vaisivanto variananrove? tura. Mwitaa turara tita, mwihua kyauriqata hia Iesusira timwa mwita.

**35** Mwinramwuhua hia qua tuvaro Iesusiva mwatakyaa viro mwihua nyaanrama kyero timwa nyinro tiqaro, Kyai nte nronraqama quataa hiani vaisira okyara nkyi timwa nyiankye. Vaisi mpovanto nronraqama quataa hiariva hiama vuni uro variqaro nronraqama quananrove. Mwiva nronraqama quataa hiraro nraakiarani variqaro ekyaa nraakyе qora kyaiqa vaisi variarivama nronraqama quananrove, tiro.

**36** Iesusiva mwitaa timwa kyero nraaqiara pataru vita kyero mwihua suqaa vatero mwia kyavuhu kyero tutero tiqaro,

**37** Vaisi mpovanto nianra rieqaro nraaqiara mwataa hianinranra qamwateqaro kyuqema mwataariva mwiva niyatama mwitaama mataaananrove. Mwiva mwitaa hiqaroma Kotiva ni titairavatama qamwata mwataaananrove, tiro. Iesusiva turama.

*Vaisi mpovanto Iesusira nrutu nteqaro kyaiqa varora*

*(Ruku 9:49-50)*

**38** Iesusiva mwi quara tuvaro Ioniva tiqaro, Mwaanra ti variara vaisio, tire taqauraro vaisi mpovanto i nrutu nteqaro vaana tite varirave. Mwi vaisiva hia tirivata i vataqiro nrohi variva

mwitaa ihatara tita, tire mwianra eqaante timwa kyeta, mwia antua tauro, tiro.

**39** Mwitaa tuvaro Iesusiva qaqao tiro, Hia mwi vaisira antuaate. Mpovanto ni nutu nteqaro nronra kyaiqa varero mwiaqaatairo mwiva hia qamwanrama kyero nianra uaquia hi quara qiananrove.

**40** Mpovanto hia tiri nramwutaaqa hiariva varirera, mwi vaisiva tiri nramwunaavama vari-ananrove, tiro.

**41** Nte qianinra riaate. Nkyi nramanri nraataa hirata varivaro mpovanto nkyiara Iesusira nraaqiarave timwa kyero, nramanri nkyi nyianri vaisiva variraro Kotiva hia mwia taunru kyaraitiro, mwia kyoqaa kyuqema kyero mwiananrove, tiro.

*Mpora uaquia hi aanranra nraamwuteroravetura*

(Matiu 18:6-9; Ruku 17:1-2)

**42** Iesusiva mwitaa timwa kyero nraaqiara pataru vaakya kyavuhu kyero tutorara tiqaro, Nraaqiara mwaa voti hiariva ni qua riaariva variraro vaisi mpovanto nri ntero uaquia hi aanranra mwia nraamwutairera, mwia kyaara mwi vaisiraqaa qua nronraqama kyero vahiananrove. Vaisi mwia nruntaqi ori nronra kyaantarlu kyero kyaareriqi tuto kyaivaro mwi vaisiva hia nraaqiara pata mwia uaquia hi aanranra nraamwutaataarave.

**43** Mwi quara rieqarama i kyauqu hinivanto uaquia hi kyaiqara uti varirera, mwia teqa kyera kyaante. Mwiaqaataira kyauqu kuaiqia nraahu

vahiariva qahoma nyaamwuni vira qati varinanrave. E kyauqu taaratana vahiariva uaquia hi kyaiqara uti variraro i qia iteqaro hia qipaaninraqi tuta kyaankyorave.

<sup>44</sup> [Mwi mwataraqi mwimwivanto  
qutu quani mwamwantara qati nraahu  
nramwaqiro vi variananrove.

Qiavanto iteqaro hiama qipa quananrove.]

<sup>45</sup> I kyuqu hinivanto uaquia hi kyaiqara uti varirera, mwia teqa kyera kyaante. Mwiaqaataira kyuqu kuaiqia nraahu vahiariva qahoma nyaamwuni vira qati varinanrave. E kyuqu taaratana vahiariva variraro i qia nronraqama kyero itaaninraqi tuta kyaankyorave.

<sup>46</sup> [Mwi mwataraqi mwimwivanto  
qutu quani mwamwantara  
qati nraahu nramwaqiro vi variananrove.  
Qiavanto iteqaro hiama qipa quananrove.]

<sup>47</sup> I vu hinivanto uaquia hi kyaiqara utirera, vauru kyaante. E vu kuaiqia nraahu vahiariva qahoma Kotiva ntaqikyi mwatukyaraqi vira qati variqira vinanrave. I vu taaratana vahiariva uaquia hi kyaiqara utuqira viraro i qia nronraqi tuto kyaankyorave.

<sup>48</sup> Mwi mwataraqi mwimwivanto  
qutu quani mwamwantara  
qati nraahu nramwaqiro vi variananrove.  
Qiavanto iteqaro hiama qipa quananrove. (*Aisa-  
iaa 66:24*)

<sup>49</sup> Hore aatai ntema kyero qiaqotairo ekyaa nraakye qora aataananrove.

**50** Hore kyuqe inraikyave. Horevanto uaqiamma viro hia qiakyaa hirera, hiama qio qaiqaa utu kyairaro qiakyaa hiananrove. Qio nkye hore kyuqera votima kyeta varivaro nkyi mwutukya qihaakya hirata nanrianra nanrianra kyuqe hiqata variate, tiro. Iesusiva turama.

## 10

*Nraakyе qaqira kye okyarara Iesusiva timwa nyunra*

*(Matiu 19:1-12; Ruku 16:18)*

**1** Qio Iesusiva mwi mwatara kyero Iutiaani vuva uro Iotaani nramanri qarero vutura hini tokyani vura. Iesusiva uro varuvata qaiqaa nraakyе qora airivanto mwiva varunani ntuvantuama vita varuvaro Iesusiva nauqaa hunte qaiqaa mwakyaakya mwihua timwa nyi varura.

**2** Iesusiva mwini varuvata Parisi vaisinramwu mwiva varunani uro nteta Iesusiva api qua qiarive tita, mwihua mpo qua Iesusira kyapara hita tiqata, Qiove vaisivanto nai nraata qaqira kyaananrove? tita.

**3** Tuvaro Iesusiva nkyiari kyapara hiro tiqaro, Haaru nkyi haivaqava Mosesiva nanra quave nkyilara mwitaa mwitaa hiate tiqaro timwa torave? tiro.

**4** Iesusiva mwitaa tuvata mwinramwuhua tiqata, Mosesiva mwataa timwa torave: Vaisi mpovanto nai nraata qaqira kyarero hiqaro qara mpo ntumwa kyero nai nraata mwinro tiqaro, Qio i qaqira kyauqo, timwa kyeroma titaananrove, turave. Mosesiva qua mwitaama kyero timwa torave, tita.

**5** Mwitaa tuvaro Iesusiva tiqaro, Mosesiva variqaro taqovaro nkyi haivaqahuamwanra mwutukyavanto kepuqyaqa huvata hia mwihua Kotirara riorave. Mwitaa hi varuvarora tiro, Mosesiva mwi quara timwa torave.

**6-7** Tauraaqama kyero hia mwitaama vahurave. Tauraakota nyaamwuvata mwatavata utu kyero vatero tiqaro, Nte vaisivata nraakyevata utu kyena vataurara tiro, vaisivanto nai nrohua qohua kyero nai nraatantiri taaqau vita mwitana kuaa mwamwanta votima kyeta vari-varave.

**8** Mwitana hia mpo mwamwanta mpo mwamwanta variraitita, mwitana kuaa mwamwanta nraahuma varivarave, turave.

**9** Kotiva naivanto vaativata nraatavata vara kuaaqa taaqau tairara tiro, hia mpovanto mwitanhua ntainra kyaarive, tiro.

**10** Iesusiva mwitaa timwa kyero nraamwuqi uro varuvata mwi nraaqiaranramwu Iesusira mwi quara okyarara kyapara huvaro

**11** Iesusiva mwinramwuhua timwa nyinro tiqaro, Vaisi mpovanto nai nraata qaqira kyero mpo nraakyevata varaariva, mwi vaisiva qaraakya nraakyentiri nrohiqaroma mpuaraqama kyeroma mwikyantiri nrohiananrove.

**12** Mwi votima kyero nraakyevanto nai vaati qaqira kyero qaraakya vaisi varaariva, mwi nraakyevavata qaraakya qoraisi mwikyantiri nrohiqaroma mpuaraqama kyero nrohiananrove, tiro.

*Iesusiva nraaqiaranramwuqaa nai kyauqu  
vateqaro kyuqema nyatora  
(Matiu 19:13-15; Ruku 18:15-17)*

**13** Iesusiva varuvata nraakyе qora mwihua nkyiari nraaqiara sita vareta Iesusiva nai kyauqu mwihuaqaa vataarive tita, Iesusiva varunani uro kyaare tuvata Iesusira nraaqiaranramwuvanto mwihua inronra hi varura.

**14** Mwitaa huvaro Iesusiva taqero nai nraaqiaranramwu nkyiari inronra hiro tiqaro, Qaqao, nkye nraaqiara mwihua qati kyaivata nte hunani nriate. Hia mwihua aanra antuaate. Kotiva ntaqikyiari mwatukyava mwi nraaqiarahua voti hiahua mwihua mwatukyama vahiananrove.

**15** Mwaa quara riaate. Vaisivanto hia nraaqiara votima kyero Kotira qua riaariva, mwi vaisiva hiama Kotiva ntaqikyiani mwatukyaraqi quanrove, tiro.

**16** Iesusiva mwitaa timwa kyero nraaqiara mwihua kyavuhu kyero tutoro nai kyauqu mwihuaqaa vateqaro mwihua kyuqema nyatora.

*Airi inraikya vato vaisirara tura  
(Matiu 19:16-30; Ruku 18:18-30)*

**17** Iesusiva aanrani virera huvaro vaisi mpo-vanto hiantero nrumu Iesusira kyapara hiro tiqaro, E mwaanra ti variara vaisiva kyuqvave. Nte nataa hi kyaiqara mpo kyaiqa mpo kyaiqa kyuqe kyaiqa Kotirani vara mwataan-inraqaatainave nraakiara nte ekyaa enta qati variqina quaninrave? tiro.

**18** Mwitaa tuvaro Iesusiva tiqaro, E nanraqamave nianra vaisi kyuqevave qiaro? Kotiva nraahuma kyuqeva variho.

**19** E Kotiva timwa to quarara riaante. Mwia quavanto mwataama kyero vahirave:

Hia mpore rukyaante.

Hia mpore nraakyera nrohiante.

Hia mpuara varaante.

Hia unra qua qiantre.

Hia unra utu kyeqara mpova hiani inraikyara varaante.

Ena nrohua qohua nyutu tuaahera nyataante,

turave. *(Kyatura 20:12-16)*

Kotira quavanto mwitaama kyero vahirave, tiro.

**20** Iesusiva mwitaa tuvaro mwi vaisiva tiqaro, Mwaanra ti variara vaisio, nte nraaqiarakya variqana nte mwi quara rieqana mwitaa mwitaamaqina nrunrave, tiro.

**21** Mwitaa tuvaro Iesusira mwutukyavanto mwi vaisirara vahuvaro mwia taqeqaro mwia timwa mwinro tiqaro, E kuaa inraikyara nraahu aara ntaaro. Uro ena vatena inraikyara mpohua nyinra munima vara kyera vehi nraakye qora ntainra kyera nyinranro nyaamwuni i kyoqaa vahiarive. Mwitaama kyera mwiaqataira ni pataqira nriante, tiro.

**22** Iesusiva mwitaa tuvaro mwi vaisiva mwi quara riero inraanra viri ratero varura. Mwiva airi inraikya vatovara tiro, hia Iesusira qua riaraitiro, qaqlira kyero mwia mwutukyavanto uaqla huvaro vurama.

**23** Vuvaro Iesusiva nai nraaqiaranramwu vara ututuma kyero taqero tiqaro, Airi inraikya vate-hua Kotiva ntaqikyi mwatukyaraqi mwukyaari tu kyeta vivarave, tiro.

**24** Mwitaa tuvata mwia nraaqiaranramwuvanto mwi quara rieta, Qikye tita, Iesusiva nataa hi quarave tiho, tuvaro Iesusiva qaiqaavata nraahu mwi quara tiqaro, Ni nraaqiaranramwu tuaavo, nraakye qoravanto Kotiva ntaqikyi mwatukyaraqi virerata mwukyaari tukyeqatama vivarave.

**25** (Kameri quara nronravanto nataama kyerove vuqa uvintaqi/ iriraqi ntumiaraanan-rove? Hia qio mwitaa hiananrove.) Qio kamerivanto vuqa uvintaqi/iriraqi ntumiaraariva qio vahirarove, airi inraikya vataarivavata Kotiva ntaqikyi mwatukyaraqi qio quananrove, tiro.

**26** Iesusiva mwitaa tuvata mwia nraaqiaranramwuvanto mwi quara airi nraato tiqata qikye tita, Airi inraikya vataariva Kotiva ntaqikyinani hia qio virera, nai tarave Kotiva vitaananrove? tita.

**27** Mwitaa tuvaro Iesusiva mwihua itutuma kyero taqero tiqaro, Mwatani varihua nkyiari kepukyara hiama qio vivarave. Kotiva kyaahaqa hirata qio vivarave. Kotiva ekyaa kyaiqa vare varivave, tiro.

**28** Mwitaa tuvaro Pitaava tiqaro, Taqaante. Tirenramwu i vataqita virera hiqata ekyaa in-raikya mwini kyeta qatima nrunkro, tiro.

**29** Pitaava mwitaa tuvaro Iesusiva mwihuara tiqaro, Nte qutaa qua qianinra riaate. Hia nte nkye kyaiqa varerara taunru kyaaninrave.

Vaisi mpovanto nai nraamwu maatave, nai qata vakyaave, nai nrunra nrakyaave, nronra qorave, nai nraaqiarave, nai mwatave, mwini kyero ni-anra riero ni kyaiqara riero quariva,

**30** mwi vaisiva mwia qia kyoqaa vareqaro hia kuua nani varaananrove. Mwiva mate mwaa mwataraqaa kyoqaa vareqaro airi nani varaananrove. Mwiva nraamwuve, qata vakyaave, nrunra nrakyaave, nrohuave, nraaqiarave, mwatave, mwi inraikyara mwi inraikyara airi inraikya varaananrove. Ni qua varaari vaisiva varirata mwia kyaara mwia uaqiamma mwataivaro variananrove. Qio ni qua varaariva qutu viraro Kotiva mwianra ekyaa enta qati variqira quante qiananrove.

**31** Mate nraakyе qora airivanto vuni varihua qakyo tumitareta nraakiaranima varivarave. Mate nraakiarani varihua qakyo nritareta vunima varivarave, tiro.

*Iesusiva taara mpo nani nai qutu viro qaiqaa siquaninranra nai nraaqiaranramwu vutu kyero timwa nyunra*

*(Matiu 20:17-19; Ruku 18:31-34)*

**32** Mwihua Ierusareminianra aanraqaa vi varuvaro Iesusiva nraante nanrianraa vuni vi varura. Mwiva vuni vi varuvata mwia nraaqiaranramwuvanto nraakiara nriqata airi vu nraato tuqita vi varuvata nraakyе qora mponramwuvanto Iesusira vataqita nruhuavata aatu hiqata nri varura. Mwitaamaqi vi varuvaro mwiaqaatairo Iesusiva nai nraaqiara 12 nramwu nyaanrama kyero nkyiariaraa sita varero viqaro

nraakiara naiqaa qovara hiani inraikyara qaiqaa  
timwa nyinro tiqaro,

**33** Riaate. Tire Ierusaremini uro variarata  
vaisi mponramwuvanto ni mwatani mwatatai  
nraaqiarara ntavaaqavuqita uro kyaivata Kotira  
kyaiqa vara mwate vari vaisihua mwihua vun-  
yaa vaisinramwuvantovata, mwaanra okyara ti  
varia vaisihuavata, mwihua nianra mwia ru  
kyaate timwa kyeta, ni pitaqita uro Romeni  
mwatanaahua kyauquqi tuta kyaivata ni ru kye-  
varave.

**34** Mwi mwatanaahua nianra raima mateta,  
niqaa quaantu vihiteta, kyaantaqo ni ntuqutu  
kye vateta, ni rukyaivaqena qutu quaninrave.  
Nte qutu vina taarampo enta varina qaiqaa qati  
siquaninrave, tiro. Iesusiva turama.

*Iemisikya Ionikya nkyiaritana nronraqa hirara  
Iesusira kyapara hora  
(Matiu 20:20-28)*

**35** Sepetira mwaaqutana Iemisikya Ionikya  
Iesusiva varunani uro nteta Iesusira kyapara hita  
tiqata, Mwaanra ti variara vaisio, e mpo inraikya  
tiritana quara eo timwa kyera mwitaama timwa  
taanterama nrunro, tita.

**36** Tuvaro Iesusiva tiqaro, Nte nkyitana nataave  
hianinrave? tiro.

**37** Tuvata mwitanahua tiqata, Nraakiara e  
kepukyavanto nraakye qoraqaa ntaqikyiqara  
nronra vaisi taintaqa mwatakyaa vira variqara  
e tiraro tiritanaqitairo mpovanto nronraqama

viro i kyauqu kyaatutani mwatakyaa viro vari-raro mpovanto nronraqama viro i kyauqu kyaantaaqani mwatakyaa viro variarive. Tiretana mwianra rieqatama i kyapara huro, tita.

**38** Mwitaa tuvaro Iesusiva qaqaao tiro, Nkyetana hia ntapihi kyeta vu nraato tiraitita, apiqama kyeta ni kyapara hiavo. Kaapuqitai nramanri nraantema kyena nte nriqa quani nramanrinra nraaninra, qiove nkyetanavata nrevarave? Nte nriqa quani inraikyara nramanri varaantema kye varaaninra, qiove nkyetanavata varevarave? tiro.

**39** Tuvata mwitanahua tiqata, Tiretana qioma mwitaa hiananrave, tuvaro Iesusiva mwitanahua timwa nyinro tiqaro, Qutaama nte nramanri nraaninra nkyetanavata nrevarave. Qutaama nte nramanri varaaninra nkyetanavata varevarave.

**40** Ni kyauqu kyaatutanivata kyaantaaqanivata mwatakyaa vita vari vaisitanahuara hiama ni kyaiqa vaiho. Ni kova vaisi taaratana teramataihua, mwitanahuama mwiaqaa mwatakyaa vita varivarave, tiro.

**41** Mwitaa tuvata Iesusira nraaqiara hini 10 nramwuvanto mwi quara rieta mwia kyaara Iemisikya Ionikya inronra hura.

**42** Mwinramwuhua mwitanahua inronra hi varuvaro Iesusiva mwinramwuhuavata mwitanahuavata nyaanrama kyero eqaate tiro, Mpo mwatanaahua ntaqikyiqi vi varia okyarara nkye ntapihiarave. Mwihua qiata vaisivanto nritareta virito variqata mwi kyaiqara mwaa kyaiqara vara timwataate ti variarave. Mwihua nronra

vaisivanto tiqata, Tire nronravanto varuro. Tiri  
qua nraahu riemwaqita quate, ti variarave.

<sup>43</sup> Nkyenramwu hia mwihua nraantantaate.  
Nkyiqitairo mpovanto nronra varirero mwiva  
nkyi kyaiqa vaisi nraante variro nraakiara nron-  
raqama quananrove.

<sup>44</sup> Nkyiqitairo mpovanto nritarero vuni  
varirero qiariva, mwiva rupa tai vaisira votima  
kyero nkyini kyaiqa vara nyataananrove.

<sup>45</sup> Nte mwatani mwatatai nraaqiaravama  
varuqo. Ntevata hia nraakye qoravanto nini  
kyaiqa vara mataatera tumuvave. Nte nraakye  
qorani kyaiqa varaqina viqana airi nraakye qora  
kyaahaqama nyatena mwihuara qutu virerave  
timwa kyena tumuvave, tiro. Jesusiva turama.

*Iesusiva Vatimiaasira vu ntapairi kyora  
(Matiu 20:29-34; Ruku 18:35-43)*

<sup>46</sup> Iesusiva nai nraaqiaranramwuvata vuva  
Ierikoni uro ntero mwi mwatuqyara nraatarero  
virero huvata nraakye qora airivanto mwia  
vataqita vi varuvaro vu qipa vu vaisiva Vatimi-  
aasiva, Timiaasira mwaaquvanto variqaro mpo  
inraikya mpiate timwa kyeqaro nyaanru ti varu  
vaisiva aanra tokyani mwatakyaa viro varura.

<sup>47</sup> Mwiva mwini variqaro riovata mpo uhua  
tiqata, Iesusiva Nasaretinyaava nritare vi vari-  
aho, tuvaro riero mwiaqatairo mwiva paatiro  
Jesusirara aakyara ntero tiqaro, Iesusio, Ntevitira  
mwaquo, qati nianra po kye timwa mataante,  
tiro.

<sup>48</sup> Vu qipa vu vaisiva mwitaa tuvata airi  
nraakye qoravanto mwia inronra hita tiqata,  
Tirema variante, tuvaro mwiva hia mwihua qua

riaraitiro, qaiqaa paatiro aakyara ntero tiqaro, Ntevitira mwaaquo, qati nianra po kye timwa mataante, tiro.

**49** Mwitaa timwaqi vuvaro Iesusiva nrumu mwiaqaa siviro variro tiqaro, Nraanraivarо nri-anrise, tuvata mwihua vu qipa vura nraanrama kyeta tiqata, Qio qamwateqara variante. Siquante. Mwiva ima nraanraiho, tita.

**50** Mwihua mwitaa tuvaro vaisi mwiva nai vaqa qutora vara qatinani kyero siviro Iesusiva sivi varunqani vuyaro

**51** Iesusiva mwia kyapara hiro tiqaro, Nivanto i nataaq hiarive tirave nrianro? tiro. Mwitaa tuvaro vu qipa vu vaisiva tiqaro, Mwaanra ti variara vaisio, e ni pu ntapairi kyaanterama nruqo, tiro.

**52** Mwitaa tuvaro Iesusiva mwia timwa mwino tiqaro, Qio quante. E nianra mwiva qio ni kyaahqa hiananrove qiararoma i vu ntapairi viho, tiro. Mwitaa tuvaro mwia vuvanto qamwanrama kyero ntapairi vuvaro mwiva qio taqero. Mwiva qio taqebaro Iesusira vataqiro aanraqaa vurama.

## 11

*Nraakye qoravanto Iesusira qamwata mwate varuvaro mwiva Ierusaremiqi vura*

*(Matiu 21:1-11; Ruku 19:28-40; Ioni 12:12-19)*

**1** Iesusiva nai nraaqiaranramwu kyapata vuvaro Ierusaremi qaumato vahuvata mwihua Mpetapaasivata Mpetaani mwatukyanivata uro ntora. Mwatukya mwitanava Oripi taaqi mwemwaqi vahura.

**2** Uro ntero Iesusiva nai nraaqiara taaratana sitero tiqaro, Nkyetana viti mwatukyaraqi vivaro

nkyi suvanto vaakyama ntonki mpo kyaantaru tera taqaananrove. Mwia qaraakya ntonki hia vaisi mpovanto mwia mwoqaqa mwatakyaa viro varirave. Nkyetana uro mwia puaama kyeta mwia ntatu kyeta vitaqita nrumu ni mpiate.

<sup>3</sup> Mpovanto nkyitananra nanrave uti variavo tirera, nkyetana mwitaama mwia timwa mwiate. Tiri nronravanto ntonki mwianra ti-hatama nrunro. Pataqia vari kyero qaiqaa vara kyairaro nriananrove, qiate, tiro.

<sup>4</sup> Iesusiva mwitaa tuvata mwitanahua mwatukya mwipi uro nte taqovaro ntonkivantao aanraqaa quesana kyaantarutova varuvata mwitana mwia huvanti varuvata

<sup>5</sup> vaisi mponramwu mwini sivita varuhua tiqata, Nkyetana nanraqamave mwia huvanti variavo?

<sup>6</sup> tuvata mwitanahua vaakya Iesusiva tu quara timwa nyuvata qio vitaate tita.

<sup>7</sup> Tuvata mwitanahua qaraakya ntonki mwia vitaqita uro Iesusira mwunra. Uro mwita mwia nraaqiaranramwuvanto nkyiari vaaqa ntonki mwoqaqa vuti mwatovaro Iesusiva mwiaqaa mwaanrintero mwatakyaa viro variro aanraqaa vura.

<sup>8</sup> Aanraqaa vi varuvata nraakye qoravanto Iesusirara qamwateqata nkyiari tuavaaqa aanravau vuti mwatovata hini uhua aakyoqitaita kyatari mwanre teqaqita uro aanravau vuti mwatora.

<sup>9</sup> Mwitaamaqi viqata Iesusira vuni vi varu nraakye qorahuavata, mwia mwoqani nri varu nraakye qorahuavata, aakyara nteta tiqata, Kyai mwia nrutu tuaaheraare.

Nronravanto nai nrutuqa nri vari vaisira  
kyuqema mwataiho. *(Ihi 118:26)*

**10** Tiri haivaqava Ntevitiva  
kepukyaqama kyero ntaqikyintema kyero  
mwivavata ntaqikyiqiro quaninranra tiro,  
Kotiva mwia kyuqema mwataiho. Ekyaa  
nyaamwunyaahua mwia nrutu  
tuaaheraate, tita.

**11** Mwitaa timwaqita vuvaro Iesusiva  
Ierusaremini uro ntora. Uro ntero Kotira  
nraamwu nronraqi verantero ekyaa inraikya  
mwiqi vahura taqamwa ntero, veva ntero  
entama virera huvaro nai nraaqiara 12 nramwu  
kyapata nrumu ntantero Mpetaanini vura.

*Fiki hia tamwa riora*  
*(Matiu 21:18-19)*

**12** Mwia qanranraa mwinramwuhua Mpetaani-  
saita uto ntanteta nri varuvaro Iesusira nraataa  
huvaro

**13** mwiva taqovaro vutura mposata fiki, mwia  
tamwa nre varu kyatariva vahuvaro mwia  
mwanre airi vahura. Mwia tamwa vahirera hiq  
kyena nraankye timwa kyero, Iesusiva taqovaro  
hia mwia tamwa rio entava vahuvarora tiro,  
mwanre nraahu ntora.

**14** Mwanre nraahu ntovaro Iesusiva fiki mwia  
inronra hiro tiqaro, Qio, nraakiara hia mpovant-  
vata iqaatairo hiq kyero nraanrive, tiro. Mwitaa  
tuvata mwia nraaqiaranramwuvata mwi quara  
riora.

*Iesusiva Kotira nraamuqi vura*  
*(Matiu 21:12-17; Ruku 19:45-48; Ioni 2:13-22)*

**15** Iesusiva nai nraaqiaranramwuvata vuva Ierusaremini uro ntero Iesusiva qaiqaa Kotira nraamwuqi vera ntero taqovata kyoqaa kyaiqa varo vaisihua mwipi variqata kyoqaa kyaiqa vare varura. Mwitaa hi varuvaro Iesusiva mwihua vara veva mwaatani kyero, munima mwukyaari tuqasaaqi varu vaisihua taintavata vara rauru kyero, nyaamwa nyiqata munima vare varu vaisihua taintavata vara rauru kyero.

**16** Mwitaama kyero mwiva mwi nraamwunra aatareqanianra tiqaro, Mwaini hia aanravanto vaiho. Nkye kyoqaa mwitaa inraikya vareqata hia mwaini vitare nritare hiate, tiro.

**17** Iesusiva mwitaa timwa kyero mwiva qua timwa nyinro tiqaro, Kotira mpukuqi mwitaama qua qara ntumwa tova vahirave.

Nraakye qora mpo mwatanaa mpo  
mwatanaahua  
ni nraamwuanra Kotirara aakyara nte varia  
nraamwunrave tivarave, turave. (*Aisaiaa 56:7*)

Nkye variavaro mwaa nraamwuva mpuara vaisivanto tuqeta kye ntuvantua hia nraamwunra votima kyeroma vaiho, tiro.

**18** Iesusiva mwitaa tuvata Kotira nraamwuqi variqata Kotira kyaiqa varo vaisihuavata, mwihua Iesusira qua rieta mwia kyaara Iesusira rukye aanranra puua hi varura. Mwihua taqovata qati nraakye qoravanto Iesusiva tu quarara qamwateqata kyauqu ntukikinraaqate varuvata mwinramwuhua mwianra rieqata Iesusirara aatu hiqata varura.

**19** Iesusiva Ierusaremini varuvaro enta hirera huvaro mwiva nai nraaqiaranramwuvata Ierusaremi kyero vurama.

*Fiki aaharama vura  
(Matiu 21:20-22)*

**20** Mwia qanranraa toqaqi mwinramwuhua uto ntanteta nriqatama mwia nraaqiaranramwuvanto taqovaro fiki mwia kyauqu kyaaravantovata tuqavantovata aaharama viro vahuvaro

**21** Pitaava Iesusiva mwi kyatarirara tu quara riemwa tero Iesusirara tiqaro, Qikye, mwaanra ti variara vaisio, taqaante. Fiki e inronrama taarava tamusama viho, tiro.

**22** Mwitaa tuvaro Iesusiva mwinramwuhua timwa nyinro tiqaro, Nte qianinra riaate. Nkyenramwu Kotirara kepukyaqama kyeta riemwaqita nrohiate.

**23** Nkyenramwu mwitaamaqi viqata mwaan taaqirara tiqata, Tumitarera kyaareraqi ntumwa quante, tivarave. Mwitaa tiqata hia taara nraato tiraitita, quttaaqama mwitaa hiananrove tivera, Kotiva nkyinramwu kyaahaqa hiraro taaqivanto tumitarero kyaareraqi ntumwa quananrove.

**24** Nte mwianra rieqanama nkyiara mwitaa tirerave. Nkye mpo inraikya vararerata Kotirara aakyara nteqata qutaama mwi inraikyara ni mpiananrove tiqatama nkye mwi inraikyara mpo inraikya mpo inraikya qio varevarave.

**25** Nkye sivi variqata Kotirara aakyara nteqatama mpovanto nkyi uaqlama nyataani quava vahirera, nkye mwi quara hia riemwaqi viraitita, mwi vaisira qua taunru kye qaqlira kyeta Kotirara aakyara qiate. Nkye mwitaa hivaro nkyi sova

nyaamwuni variva nkye uaqia hi kyaiqara uti  
quaravata qaqlira kyero taunru nyataananrove.

<sup>26</sup> [Nkye hia mpohuaqa qua vahira qaqlira kye  
taunru kyaivera, nkyi sova nyaamwuni variva  
hiama nkyitaqaavata qua vahianinra qaqlira  
kyero taunru kyaananrove], tiro.

*Iesusirara tava i nronraqama kyaiharave e  
mwi kyaiqara varaqira vi variaro tura*  
(Matiu 21:23-27; Ruku 20:1-8)

<sup>27</sup> Iesusiva mwitaa timwa kyero nai  
nraaqiaranramwuvata uto ntero Ierusaremini  
uro varura. Iesusiva qaiqaa Kotira nraamwu  
nronraqi vera ntero nrohi varuvata Kotira  
nraamwuqi variqata Kotira kyaiqa vara mwate  
varu vaisihua mwihua nronra vaisinramwuvata,  
mwaanra okyara ti varu vaisihuavata, Iutaa  
nronra vaisivata, mwihua Iesusiva hunani uro  
nteta

<sup>28</sup> Iesusira mwia inronra hita tiqata, E ta vaisiva  
variqarave mwaa kyaiqara vare variaro? Tava i  
nronraqama kyaiharave e mwaa kyaiqara vare  
variaro? tita.

<sup>29</sup> Mwihua mwitaa tuvaro Iesusiva nkyiari  
timwa nyinro tiqaro, Kyai nte nraante nkyi  
kyaparama nyataarita nkye nte qiani quara  
qio timwa mpivera nte ntene nronraqama vina  
variqana mwaa kyaiqara varaaninranra nkyi  
timwa nyiankye.

<sup>30</sup> Tava Ioninra nronraqama kyovarove mwiva  
nraakye qora nramanri nyunrave? Kotivave iho,  
qati vaisivantove iho? Nkye ni timwa mpivaqena  
riaankye, tiro.

<sup>31</sup> Iesusiva mwitaa tuvata mwihua nkyiari kya-para hita tiqata, Tire nanra quave qiananrave? Mate tire tiqata, Kotiva Ioninra nronraqama ky-orave, qiarera, Iesusiva tiriara, Nkye nanraqa-mave Ioninra quara hia quitaave qiavo? qianan-rove.

<sup>32</sup> Qaiqaa mate tire tiqata, Vaisivanto nraahu Ioninra nronraqama kyorave, qiarera, mwi qua-vavata hia qioqa hiananrove, tura. Qati nraakyе qoravanto Ioninranra Kotira qua qovarama kyo vaisivave turara tita, mwihua qati nraakyе qora nyaatu aatu hiqata hia mwitaa tita.

<sup>33</sup> Mwihua mwitaa timwa kyeta mwiaqaatai Iesusirara tiqata, Nai tava Ioninra nronraqama kyorave? Hia tire ntapihunanrave, tita.

Mwihua mwitaa tuvaro Iesusiva mwihuara tiqaro, Nkye mwitaa qiavana nte nina nron-raqama kyaihana mwaa kyaiqara vare varurara hia nkyitavata timwa nyianinrave, tiro. Iesusiva turama.

## 12

*Uaini vara tutoraqi hia kyuqema kyeta  
ntaqikyu vaisihuara tura*  
(Matiu 21:33-46; Ruku 20:9-19)

<sup>1</sup> Iesusiva mwitaa timwa kyero mpo quaqaa ntumwa kyero mwihua timwa nyinro tiqaro, Vaisi mpovanto uaini vara tutero mwia vara ututu tutukya ratero mwata quvu kyero uaini tatianinra ututero haraara nraamwu mponta vaimwanraanra nraamwu hoqa kyero vatorave. Mwiaqaatairo nyianra mpo mwatani virero hiqaro mpo uhua timwa nyinro tiqaro, Nkye

ni uaini aakyoqaa ntaqikyi mate varivaqe nte quankye, timwa kyero mwiva nyianra mpo mwatani vurave.

<sup>2</sup> Mwini uro varuvaro uaini hiyu entava nri ntovaro mwiva nai kyaiqa vaisi mpo titero tiqaro, E uro ni aakyoqaa ntaqikyi mate varihua tiratama uaini ninanivata hiyu kye mataate, turrave.

<sup>3</sup> Mwitaa tuvaro mwini vuvata mwia aakyooqaa ntaqikyi mwate varu vaisihua mwia kyaiqa vaisi mwia ntavaaqavu kyeta kyaamwuqotaita ntuqutu kyeta vateta, hia uaini hiyu kye mwia mwirnraitita, qati titovaro nrumeru ntantero vurave.

<sup>4</sup> Qati nrumeru ntantero vuvaro aakyo qova nai kyaiqa vaisi mpo titovaro vuvata mwia aakyoqaa ntaqikyi mwate varuhua mwia qiaata raarahitima kyeta kyaurira inraikya mwunrave.

<sup>5</sup> Mwitaa huvaro aakyo qova nai kyaiqa vaisi mpo qaiqaa titovaro vuvata mwia rukyorave. Qio mwitaamaqi vita, hini nai kyaiqa vaisi titohua kyaamwuqotaita ntuqutu kyeta, hini rukyorara tuquo.

<sup>6</sup> Mwia kyaiqa vaisi taiqa kyovaro vaisi kuaiqia nraahu varura. Mwi vaisiva aakyo qora mwaaquvanto varuvaro mwia qora mwutukyavanto mwianra mpoqiaavata vahu vaisiva varuvaro mwia qova mwiaavata nraakiara ekyara titero tiqaro, Mwihua ni mwaaqu taqeta nianra mwia mwaaquve tiqatama mwia kyuqema mwatevarave, tiro.

<sup>7</sup> Mwitaa timwa kyero mwia titovaro mwini vuvata mwia aakyoqaa ntaqikyi varu vaisihua mwia mwaaqu taqeta, nai timwa mwi nai timwa

mwi hita tiqata, Mwia qova qutu viraro mwaa vaisiva nai qora mwatavata, mwitaa inraikyavata, varaarivama variho. Nrivaqe tire mwia rukyaararo mwiva vararero hiani inraikyava tirini nraahu vahiarive, turave.

<sup>8</sup> Mwihua mwitaa timwa kyeta mwia mwaaqu ntavaaqavu kye rukyeta mwaaqani mwaati qaqlira kyorave, tiro.

<sup>9</sup> Iesusiva mwitaa timwa kyero mwihua kyanarama nyatero tiqaro, Mwihua mwitaa hurara tiro, aakyo qova nai mwaaqu rukyera kyaara nataave hiananrove? Aakyo qova nri ntero nai aakyoqaa ntaqikyi vaisihuua ru taiqa kyero kyaata mpo vaisinramwuanra tiqaro, Nkyema ni aakyogaa ntaqikyi mataate, qiananrove, tiro.

<sup>10</sup> Iesusiva mwitaa timwa kyero mwiva mwihuara tiqaro, Nkye hiave Kotira mpukuqi mwaa quara kyaara ntumwa kyeta riaavo? Mwi quava mwataama tiro:

Ori nraamwu hoqeqlata  
ori mpo hia kyuquerave timwa kye qaqlira kyaava,  
mwi oriva puhaqama viho.

<sup>11</sup> Kotiva mwi orira vara kyero nronraqama kyaihata  
tire mwia kyaiqa taqeta kyuquerave tunanrave,  
turave. (*Ihi 118:22-23*)

Kotira mpukuqi mwitaama kye qara ntumwa torave. Nkye hiave mwi quara kyaara ntumwa kyeta riaavo? tiro.

<sup>12</sup> Iesusiva mwitaa tuvata Iutaa nronra vaisinramwuvanto ntapihi riovoro Iesusiva uaini utaqaa ntaqikyi mwato vaisihuara tiqaroma mwihuaqaa ntumwa kyero tuvata mwihua

Iesusira ntavaaqavu kyeta ko qiare tura. Mwitaa timwa kyeta nraakye qoravanto mwipi ntuvantuama vuahua tiri inronra hivorave tita, mwihua nraatu hiqata Iesusira kyeta vurama.

*Taakisiga hirara Iesusira kyapara hura  
(Matiu 22:15-22; Ruku 20:20-26)*

<sup>13</sup> Iutaa vaisi nronranramwuvanto vari kyeta mwiaqaatai mwihua Parisi vaisi mponramwuvata, Herotira nramwunaahua mponramwuvata, siteta tiqata, Nkye Iesusira kyapara hivaro mwiva api qua tiraqe mwiaqa qua vataare, tita.

<sup>14</sup> Tuvata mwihua Iesusiva hunani uro nteta mwia kyapara hita tiqata, Mwaanra ti variara vaisio, tire taqaurara e kyuqe qua nraahu ti variaravave. E hia vaisi nraatu aatu hiraitira, nronra vaisiaravata, qumina vaisiaravata, kuaa qua nraahu ti variaravave. E vaisivanto Kotira vataqita vi aanranra ntapihi kyera timwa nyi variaro. Qio mwaa quara timwa timwinraqe riaare. Tire Kotira qua rieqata qiove tire Romeni mwatanaahua vunyaa vaisi Sisaara taakisi mwiananrave? (Mwi mwatanaahua hia Kotira qua riaahuave.) Mwia taakisi mwiananrave hiave mwiananrave? tita.

<sup>15</sup> Mwihua mwitaa tuvaro Iesusiva taqvata mwihua nroqaataita kyuqe kyuqe ti variqata mwihua su nyaatoqitaita Iesusira uaqlama mwatarerata uti varuvaro Iesusiva tiqaro, Nanraqamave nkyenramwu nivanto api qua qiarive tita mwitaa qiavo? Qio munima mpoku vara kyaivaqe nte taqaankye, tiro.

<sup>16</sup> Mwitaa tuvata munima mwia kuaaru mwuvaro mwiva mwihua kyapara hiro tiqaro, Munima mwiaqaa tara virivata tara nrutuvatave vaiho? tiro.

<sup>17</sup> Mwitaa tuvata mwihua Sisaarave tuvaro Iesusiva mwihuara tiqaro, Mwianra rieqatama nkye Sisaava hianinra nai mwita, Kotiva hianinra nai mwiate, tiro. Iesusiva mwitaa tuvata mwihua mwi quara rieta tiqata, Qikye, mwiva tiri qua nraatara kyero kyuqe qua tiho, timwa kyeta kyauqu ntukikinraaqate varura.

*Saitiusi vaisinramwuvanto qutu vita qaiqaa  
qati sivirara Iesusira kyapara hura*

(Matiu 22:23-33; Ruku 20:27-40)

<sup>18</sup> Saitiusi vaisivanto Iesusiva varunani uro ntora. Saitiusi mwihua nkyiari mwaanra qua rieqatama mwihua tiqata, Vaisivanto qutu viro qio mwiva ekyaarama qutu viro hiama qaiqavata siquananrove, ti varu vaisihua uro nteta

<sup>19</sup> Iesusira kyapara hita tiqata, Mwaanra ti variara vaisio, tiri haivaqava Mosesiva mwaanra qua timwa timwiqanro mwitaa turave. Vaisivanto hia nraaqiara mwataraitiro, qutu viraro mwia qatavantove vakyaavave mwia nraata varatero nraaqiara mwata humwuanrama mwataananrove, turave.

<sup>20</sup> Tire qiarara e riaante. Haaru qate vakye 7 nramwu varurave. Mwihua sakyava toharenaava nraakye varatero hia nraaqiara mwataraitiro, qutu vuvaro

<sup>21</sup> mwia qata mwia nanaava mwia nraata varatero mwivavata hia nraaqiara mwataraitiro, qati variqiro viro qutu vurave. Mwiva qutu

vuvaro mwia qata mwia nanaava nraakye mwia varatero hia nraaqiaravata mwataraitiro, qutu vuvarave.

**22** Qio mwitaamaqi vita ekyaa mwinramwuhua nraakye mwia varateta hia nraaqiaravata mwataraitita, ekyaa qati nraahu qutu vurave. Qutu vuvaro nraakiara nraakye mwivavata variro qutu vurave.

**23** Nraakiara nraakye qora qaiqaa qati sivita vari entaraqaa mwi nraakyeva tara nraatave variananrove? Mwiva qati varu entara qoraisi 7 nramwu vara torave, tita.

**24** Saitiusi vaisinramwuvanto mwitaa tuvaro Iesusiva nkyiari timwa nyinro tiqaro, Nkye Kotira qua qara ntumwa tora hia ntapihi kyaahuave. Nkye Kotira kepukyavata hia ntapihi kyaahuave. Qutaara hia ntapihi kyaahuara tita nkye api qua ti variavo.

**25** Nraakiara nraakye qora qutu vihua qutu viraqitaita qaiqaa sivita qati variqita vi entara hiama nraata vaati vare okyarava vahiananrove. Mwihua nyaamwunyaahua votima kyetama varivarave, tiro.

**26** Iesusiva mwitaa timwa kyero mwiva tiqaro, Nraakye qora qutu vihua qati sivirara nte nkyi kyapara hirerave. Nkye hiave Kotira mpukuqi Mosesiva mwaa quara qara ntumwa tora kyaara ntumwa kyeta ntapihi riaavo? Kotiva mwitaa turave. Nte mwanriqa Kotivave. Nte i haivaqara Evarahaamunraqaa ntaqikyina, Aisaakiraqaa ntaqikyina, Iaikopuraqaa ntaqikyuvave, turave.

**27** Qio riaate, Kotiva mwanriqavanto hia qutu viro taiqavi inraikyaraqaa ntaqikyi varivama variho. Nraakyе qoravanto qaiqaa qati sivi okyarara nkyi su nyaatovanto hia ntapihi vihata api rieqata ti variarave, tiro.

*Nanra quave Kotiva vuni vatai quava vaiho tura*  
*(Matiu 22:34-40)*

**28** Iesusiva Saitiusi vaisi kyapata qua ti varuvaro mwaanra okyara ti varu vaisiva uro variqaro riovaro Iesusiva Saitiusi vaisi qua nraatara kyeqaro kyuqe qua nraahu ti varuvaro mwi vaisiva Iesusira kyapara tiro tiqaro, Kotiva qua timwa taiva nanra quavantove vuni vahi quava vaiho? tiro.

**29** Tuvaro Iesusiva mwia timwa mwinro tiqaro, Mwaa quava vuni vahi quavama vaiho. Mwataama qara ntumwa torave:

Nkye Isareri mwatanaahua riaate.

Tiriqaa ntaqikyi variva Kotiva mwanriqa kuaiqiyavanto variho.

**30** Ekyaa ena mwutukyaqitairave,  
 ekyaa ena mwanraquraqitairave,  
 ekyaa ena vu nraatoqitairave,  
 ekyaa ena kepukyaqotairave,  
 Kotirara nraahu mwutukya vahirara variante,  
 turave.

*(Lo 6:5)*

**31** Mwi quava vaharo mwia nraakiara okyara qua mpo vaiho. Mwitaama tiro:  
 Enanra mwutukya vataarantema kyera  
 ena henanranravata  
 mwutukya vahirara variante.

*(Wok*

*Pris 19:18) Qio mwi quatanava vuni vahi*

quatanavama vaiho. Hia mpo quavanto mwi quatana nraatara kyairave, tiro.

**32** Iesusiva mwitaa tuvaro mwaanra okyara ti varu vaisiva tiqaro, Mwaanra ti variara vaisio, e kyuqema kyera ntapihima qiaro. E qutaama tiqara, Mwanriqa Kotiva kuaiqiaavanto nraahu variho qiaro. Hia mwanriqa mpovantovata variho, qiaro.

**33** E qutaama tiqara, Vaisivanto mwutukyaqitairove, kepukyaqotairove, Kotirara mpoqama kyero mwutukya ntiraro variananrove. Vaisivanto nai henanranra nanrianra mwutukya vahintema kyero mwianravata mwutukya vahiarive, qiananrave. Mwi quatanava vuni vahiqaro hini qua nraatara kyairave. Mpo qua Kotira kyaiqa vara mwateqata quara rukyeta qia quara mwate varia quaravata, mwi quatanava nraatara kyairave, tiro.

**34** Mwitaa tuvaro Iesusiva taqovaro vaisi mwiva kyuqema kyero tuvaro Iesusiva mwia timwa mwinro tiqaro, Kotiva iqaa ntaqikyiari i gaumatoma vaiho, tiro. Iesusiva mwitaa tuvata vaisi kyaatavantovata Iesusiva tiri qua nraatara kyaankyo titi, hia Jesusira qaiqaavata nrumu mpo qua mpo qua kyapara hora.

*Iesusiva Mesaiaara kyapara hora  
(Matiu 22:41-46; Ruku 20:41-44)*

**35** Iesusiva Kotira nraamwuqi variqaro qua timwa nyiqiro viro tiqaro, Mwaanra okyara ti

varia vaisihua tiqatama, Kotiva titaariva Mesaiaavanto Ntevitira okyara kuaa okyara mwipiinnaa vaisivantomä variananrove, qiarave. Mwi-hua nataama kyeta mwi quara ntapihi kyetave mwitaa tivarave?

<sup>36</sup> Haaru Kotira mwanraquravanto kyaahaqa huvaro Ntevitiva nai mwitaa turave:  
 Kotiva ni nronra vaisiara tiqaro,  
 E nritarera ni kyaqu kyaatutani  
 mwatakyaa vira variraqena  
 nte i nramwutaahua ru taiqa mwataarira  
 mwihuaqaa kyuqu ntamwa tera variante, turave.  
 (Sng 110:1)

Ntevitiva mwitaa turave.

<sup>37</sup> Ntevitiva Mesaiaavanto qovara hianinranra tiqaro, Mwiva ni nronra vaisive, turave. Ntevitiva mwitaa turara tiro, nataama kyeroove Mesaiaavanto Ntevitira nraisi qio variananrove? tiro. Iesusiva mwitaa tuvata qumina nraakye qora airivanto ntuvantuama vita varuhua mwia qua rieqatama qamwateqata varura.

*Mwaanra okyara ti varu vaisihuara tura  
 (Matiu 23:1-36; Ruku 11:37-54, 20:45-47)*

<sup>38</sup> Iesusiva qua timwa nyiqiro viro tiqaro, Vaisi mponramwu mwaanra okyara ti variahua, nkye mwihua rauriqata variate. Nraakye qoravanto mwihua tiri taqeta qua mwanteqata qamwata timwataate titi, mwihua mpuahaa tuavaaqaa kyuqera utu vareta nraakye qora suqaa maake-tiqi nrohi variarave.

**39** Mwihua mwaanra nraamwuqi vera nteta uaquia hi taintara qaqlira kyeta, kyuqe taintaqaa nraahu mwatakyaa vita variarave. Mwihua omwata nraanraqaa variqata mwihuara nronra vaisive qiate tita, uro vaisi nronravanto mwatakyaa vita variaraqaa mwihuavata mwatakyaa vita variarave.

**40** Mwihua tetona varia nraakyehua nraamwuve mpo inraikyave vataara mpuara vareta tiqata, Mpohua tire qora inraikya utunanra taqeta tiriara uaquia hia vaisihuave tivorave, tita mwihua nraakye qora suqaa variqata Kotirara mpuahaama kyeta aakyara ti variarave. Qikye, mwia kyaara mwihuqaqua qua nronraqama kyero vahiananrove, tiro.

*Vehi nraakyevanto munima pataqia Kotira mwunra*

*(Ruku 21:1-4)*

**41** Kotira nraamwuqi taqu mpo vahuvata mwipi nraakye qoravanto Kotira kyaiqara rieqata munima kye varura.

Qio Jesusiva qua taiqa kyero uro taqu mwia tataaqa mwatakyaa viro variqaro nraakye qoravanto munima taqu mwipi kyeqata vi varuvaro Jesusiva taqe varura. Mwiva taqovata airi inraikya vatohua munima airi mwipi kyora.

**42** Kye varuvaro vehi tetona nraakyevantovata nri ntero munima patarutana nraahu taquqi kyora.

**43** Munima pataqiarutana mwipi kyovaro Jesusiva nai nraaqiaranramwu nyaanrama kyero

timwa nyinro tiqaro, Taqaate, Vehi nraakyе teto-qavanto kyai munimava airi inraikya vataahua airi munima kyaaravata nraatara kyaiho.

<sup>44</sup> Airi inraikya vataahua nkyiari munima hini nraahuma taquqi kyaavo. Nraakyе mwiva vehi variqaro nai vatai munimanra ekyaama kyaiho, tiro. Iesusiva turama.

## 13

*Kotira nraamwu akukyaaraqama kyeta ntapairi kyerara tura*

*(Matiu 24:1-2; Ruku 21:5-6)*

<sup>1</sup> Iesusiva Kotira nraamwuqitairo veva ntovaro mwia nraa qиara mpovanto tiqaro, Qikye, mwaanra ti variara vaisio, taqaante. Mwaa nraamwuva kyuqe hi nraamwunrave. Mpo ori mpo ori nronraqotaita vara kyeta hoqataa nraamwuva kyuqe nraamwuma vaiho, tiro.

<sup>2</sup> Mwitaa tuvaro Iesusiva mwia timwa mwinro tiqaro, Mate e nronra nraamwu taqe variaro. Nraakiara ori naiqaa naiqaa taaqautaava hia mwitaama kyero vahiananrove. Mwaa nraamwunra ntapairiqata mwia venta kyaivarо tumu ntiraro orivanto ntuvuraa vura hiro api mpona mpona vahiananrove, tiro.

*Iesusiva nraakiara airi muaanra qovara hinanrove tura*

*(Matiu 24:3-14; Ruku 21:7-19)*

<sup>3</sup> Mwitaa timwa kyero Iesusiva uro Oripi taaqiqaa mwatakyaa viro varura. Oripi taaqvianto mwaa hini vahuvaro Kotira nraamwvantо vutura qarahi hini vahura. Mwitaa vahuvata Pitaavavata, Iemisivavata, Ionivavata,

Enturuvavatama kyeta mwinramwuhua nraahu vuhua Iesusiva varunani uro nteta mwia kyapara hita tiqata,

<sup>4</sup> E vaakya Kotira nraamwuanra qiananra taireve qovara hiananrove? Nanra nanra in-raikya qovara hiraqeve tirenramwu mwi inraik-yaraqaa apeqama kyeta taqeqlata mwi entava nrianriva qaumatoqa iho qiananrave? E tiri timwa timwinraqe riaare, tita.

<sup>5</sup> Mwihua mwitaa tuvaro Iesusiva tiqaro, Mpo-vanto mwi quara nkyi api timwa nyiankyo tita, rauriqatama variate.

<sup>6</sup> Nraakiara airi vaisivanto nri nteta ni nutu nteta tiqata, Kotiva ni titaihana nruvave. Nte mwaa mwivave, tivata airi nraakyae qoravanto mwihua unra quara qutaa quave tivarave.

<sup>7</sup> Nkye varivaro nronraqama kye ntaqi quava nraaqasairove mponasairove nrinrata hia aatu hiate. Ntaqi inraikyava qovara hiananrove. Mwitaa hirata nkye mwianra rieqata mwi entava ekyara enta nri ntaiho tivorave.

<sup>8</sup> Mpo mwatanaavanto mpo mwatanaanravata ntaquananrove. Qiata vaisi mpovanto nai henai qiai vaisi mpovata ntaquananrove. Mpo mwata mpo mwata mwaturavanto tuananrove. Mpo mwata mpo mwata kyarara aarantevarave. Mwi inraikyava mwi inraikyava qovarama virata hia ekyara enta nri ntaiho qiate. Qakyo atura ntumwa kyero nraaqiara mwataariva vaharo vuni pataqia toharaintema kyero, muaanra ntaani entava qati toharama taiho, qiate.

<sup>9</sup> Mwi entara aitutumaqi vita rauriqata variate. Mpo hi vaisihua nkyi ntavaaqavuqita

uro nkyiari kaanasoriqaa kyeta, nkyiqa qua vatevarave. Nkye mwaanra nraamwuqi vari-vata nkyi kyaamwuqo ntuqutu kyeta vatevarave. Nkye ni kyaiqa vare varivata mwia kyaara nkyi ntavaaqavuqita uro kamaninra nronra vaisi suqaave, vunyaa vaisinramwu suqaave, kyaivata mwi entara nkye ni qua ntapihi kye timwa qovarama kyevarave.

**10** Ni qua kyuqe qua ekyaa mpo mwatanaa mpo mwatanaahua timwa nyiqi vivata ekyaama riemwa ntevarave.

**11** Nraakiara mwihua nkyi ntavaaqavuqita uro ko tirera hivaro, hia nkyi kyuqu kyauqu ntirata nanra quave qiananrave qiate. Mwi entara hia nkyeta su nyaatoqitaita riemwa kyeta tiraitita varivaro Kotira mwanraquravanto nkyi kyaahaqa hiqaro mwi quara qiate tirata mwi quara nraahu qiate.

**12** Nraakiara vaisivanto nai qatave nai vakyaarave qovarama kyairata ru kyevarave. Mwia qova nai nraaqiara qovarama kyairata ru kyevarave. Nraaqiaravanto nkyiari nyohua sohua nramwutaaqa hiqata ru kyaate tivata mwihua ru kyevarave.

**13** Mwi entara nkye ni nraakye qoravanto vari-vatara tita, mwia kyaara ekyaa qati nraakye qoravanto hia nkyiara mwutukya vahirata vari-varave. Mwitaama mwataivarovata hia qoriri hiraitiro, kepukyaqama kyero variqi viro uro taiqa kyaani vaisira, mwiama Kotiva vitaananrove.

*Anoma kyero qora inraikyavanto nraakiara*

*qovara hianinranra tura*

(*Matiu 24:15-28; Ruku 21:20-24*)

**14** Nraakiara nkye taqaivarano kyero qora inraikyavanto qovarama viro hia mwianra variante qianinra mwinima mwiva siviro variananrove. Mwaa quara kyaara ntirava ntapihi kyera nraato tuante. Nraakiara mwi entara mwi inraikyava qovarama virata nraakye qora Iutiaani varihua sivita hianteta verara taaqiqaa quate.

**15** Mwi entara nraamwu quesana variariva hiama nraamwuqi vera ntero mpo inraikyavata vararaitiro, mwiva mpo inraikya mpo inraikya qaqlira kyero qatima hiantero quarive.

**16** Mpowanto aakyoqi kyaiqa vare variariva hia nai vaaga vararero nrumu ntantero viraitiro, mwiva mwia qaqlira kyero qatima hiante quarive.

**17** Mwi entara nraaqiara tuaqahi nraakyehuvata, nraamwa nyi vari nraakyehuavata, hia kyuqema varivarave. Nte mwi nraakyehuara po tuquo.

**18** Hia huari itaani entaraqaa aatu quaro tita nkye Kotirara aakyara tivaro huari itaani entara nyianrive.

**19** Po, nraakiara mwi entara muaanra vahiariva nronraqama kyero vitarero vahirata nraakye qora hia kyuqema kyeta varivarave. Haaru Kotiva mwaa mwatara utu toraqaatairo mwitaa hi muaanrava hia qovara hurave. Nraakiaravata hia mwitaa hiani muaanrava qaiqaavata qovara hiananrove.

**20** Mwi entara mpuahaa enta vahiratavauma ekyaa nraakye qoravanto taiqa vivaro hia kuaiqi-

avantovata qati variananrove. Qio Kotiva nai kyaama tai nraakye qorahuara rieqaroma mwi entara vara qiquqama kyaananrove.

**21** Mwi entaraqaa nkyiara Kotiva titai vaisiva Mesaiaavanto mwainima variho, mwinima variho, tivera, hia mwihua quara quitaave qiate. Mwi entaraqaa vaisi mpovanto qovarama viro unra tiqaro, Nte Mesaiaavantove, tiraro mpo vaisivanto tiqaro, Nte Kotira qua qoqama kye varu vaisivave, qiananrove. Mwihua mwitaa timwaqi viqata airi unra vaisivanto qovarama vivarave.

**22** Mwihua qovarama vita unra kyaiqa varaqi viqata Kotiva nai kyaama tai nraakye qorahua mwihua tirinramwu quara quitaave tiqata api aanra quate titi, nronra kyaiqa varaqi vivarave.

**23** Mwi quara rieqatama mwi entaraqaa nkye rauriqata variate. Nkye hia mwi vaisihua quara quitaave qiate tina, nte mwaa entaraqaa variqana nraakiara qovarama quani inraikyarara nkyi timwa nyi varuqo, tiro.

*Iesusiva nai qaiqaa mwata mwaini tumuaninranra tura*

*(Matiu 24:29-31; Ruku 21:25-28)*

**24** Iesusiva mwitaa timwa kyero tiqaro, Nraakiara muaanra vahiani entava taiqa viraro mwi entaraqaatairo huarivanto qipa viraro toravantovata hia itairaro

**25** aahoquravantove, qovoravantove, tumu nti tumu nti hiraro nyaamwuni kepukya inraikya vahiariva ekyaa qakyaa qakyaa hiananrove. *(Aisaiia 13:10, 34:4)*

**26** Mwi inraikyava mwitaa hirata ekyaa mwata maata varihua taqe varivaqe nte mwatani mwatatai nraaqiarava nyaamwusaina tonamwuqi tumuanrita ni taqeverave. Nte mwunruqama taari inraikyava mpoqama kyero itero takyuqiro ante anta/atipetipa hi variraqe nte kepukyavanto tumuaninrave.

**27** Nte tumiqana nyaamwunyaahua sitaarita mwihua mwatani uto hisai hisaita Kotiva nai kyaama tai nraakye qorahua ekyaa ntuvaantuama kyeta sitevarave, tiro.

*Iesusiva qaampuakya voti hurara tura  
(Matiu 24:32-35; Ruku 21:29-33)*

**28** Iesusiva mwitaa timwa kyero tiqaro, Nkye qaampuakyara rieqatama mwaa quara okyara ntapihi kyeta riaate. Mwi kyatariva tamwa riemwa taiqa kyero vahiro mwiaqaatairo qaraakya mwunri ntarero utihata nkye mwiaqaa apeqama kye taqeta tiqata, Huari nronra itaani entava qaumaqa iho, qiarave.

**29** Mwia votima kyeta, nraakiara qovara hiani inraikyarara tura, nkye mwiaqaa apeqama kye taqeta nianra tiqata, Mwiva tumuani entava qau-matoqa iho, tivarave.

**30** Nte qutaama tuqo. Mwaa mwataraqaa vari nraakye qorahua hia taiqa vivaro mwi inraikyara mwi inraikyarara tuva qovara hiananrove.

**31** Nyaamwuvantovata mwatavantovata taiqa viraro ni quavanto qati nraahu vahiqiro quananrove, tiro.

*Hia mpovanto nte tumuani entara ntapihirave  
tura  
(Matiu 24:36-44)*

<sup>32</sup> Iesusiva mwitaa timwa kyero tiqaro, Nte taireve, nanra huari vuqaave, tumuaninra? Hia vaisi mpovanto mwi entara ntapihirave. Hia nyaamwunyaahuavata mwianra ntapihiarave. Ntenavata mwatani mwatatai nraaqiarava variqana mwi entarara hia ntapihi kyaaurave. Kotiva ni kova mwiva nraahuma mwi entara ntapihirave.

<sup>33</sup> Mwi entava nrianinra nkye hia ntapihi-ahuara titi, nkye taqe varita rauru kyeqa teramate variate.

<sup>34</sup> Mwi entava nrianinranra tirera nanra quaqaa ntumwa kyenave qianinrave? Mwaa quaraqaa ntumwa kyena tirerave. Vaisi nronravanto nyianrani virera hiro nai kyaiqa vaisinramwuanra tiqaro, Nte quarita nkye mwi kyaiqara mwi kyaiqara vare varivaqe nte uro ntantena nriankye, timwa kyero mpo kyaiqa mpo kyaiqa mwihua nyinro vaisi mpora tiqaro, E quesana variqara vaimwanraanra ntaqikyi variante, timwa kyero qio vurave, tiro.

<sup>35</sup> (Iesusiva mwitaa timwa kyero nai nraaqiaranramwu timwa nyinro tiqaro), Mwi quara rieqatama nkyevata taqeqlata variate. Taireve mwihua nronra vaisivanto nyianrasairo uro ntantero nriananrove? Enta hirera hianinranive? Enta mwutukyaqive? Kokoraaravanto nruqua qianinranive? Qaatata viraro toqaqive nriananrove?

<sup>36</sup> Mwiva qamwanrama nri ntero taqairata nkye vaite varivorave.

<sup>37</sup> Nkye mwianra rieqatama nte nkyinramwuanravata ekyaahuaravata mwitaamataina, Nkye taqe variqata variate tuqo, tiro.

## 14

*Nronra vaisinramwuvanto Iesusira rukye  
quara qaiqaa turama*

(Matiu 26:1-5; Ruku 22:1-2; Ioni 11:45-53)

<sup>1</sup> Mpo ihi mpo ihi mwi mwatanaahua nyaamwunyaava vekyahu nyatoraravata, hia kyoto mperetiraravata, rieqata mwi entaraqaa mwi kyarara nronra. Mwi entara mwi kyarara nreva taara enta qati vahuvata Kotira nraamwuqi Kotira kyaiqa vara mwate varu vaisihua mwihua vunyaahuavata, mwaanra okyara ti varu vaisihuavata, mwihua ntuvantuuma vita Iesusira ntavaaqavuqita uro rukyerara uqetakye qua tiqata

<sup>2</sup> mwitaama titi, Tirenramwu vekyahu nyato kyarara nraana entaraqaa Iesusira ntavaaqavu kyaararo nraakye qoraqitairo ntaqi inraikyaya qovara hiankyorave, tura.

*Nraakye mpovanto vahamwenra Iesusira qiataga qumwatora*

(Matiu 26:6-13; Ioni 12:1-8)

<sup>3</sup> Mwi entara Iesusiva Mpetaanini Saimon-inra nraamwuqi uro varura. Tauraa mwi vaisira tauma rumpuaravanto utuvaro varu vaisira. Iesusiva mwi vaisira nraamwuqi uro kyara nre varuvaro nraakye mpovanto vera ntero Iesusira kyuqema mwatarero vahamwenra kyuqe mwunta vura, nronra munima kyora, ori

taquqi varero uro taqu hiara kinta kyero Iesusira  
qiataqaa rauru kyero qumwatora.

<sup>4</sup> Mwia qiataqaa rauru kyero qumwatovata  
hini uhua nraamwu mwipi varuhua mwi nraaky-  
era *nununrama mwateta/ nriqi humumuse* nai  
timwa mwi nai timwa mwi hita tiqata, Qaqao,  
nanraqamave mwitaama kyero vahamwenra  
mwia qumina taiqa kyaiho?

<sup>5</sup> Mwiva vahamwenra mwia nyinro nronra  
munima 300 kinaa vara kyero vehi nraakyeye qora  
niyataarave, tita. Mwitaa timwa kyeta mwia  
kyaara mwi nraakyera inronra hi varura.

<sup>6</sup> Mwihua mwia inronra hi varuvaro Iesusiva  
tiqaro, Qati kyaivaro mwi nraakyeva variarive.  
Nanraqamave nkye mwia inronra hiavo? Mwiva  
mwitaa hiqaro ni kyuqema mataiho.

<sup>7</sup> Vehi nraakyeye qora mwihua mpo enta mpo  
enta nkyi kyapata variqi vivarave. Nkye mpo  
enta mwihua kyaahaqa hiataa hirata qioma  
kyaahaqa hivarave. Nte nraahuma hia nkyi  
kyapata airi enta varianinrave.

<sup>8</sup> Mwi nraakyeva taqaiharo mwi kyaiqava  
mwianra qioqa hirama varaiho. Nte qati variani  
entaraqaa mwiva nraante vahamwenra qumate-  
qaroma ni quntamwa terara tera hi variho.

<sup>9</sup> Nte qutaa qua qianinra riaate. Nraakiara  
ni qua mwakyaakya ekyaa mpo mwatanaa  
mpo mwatanaahua timwa nyiqi viqata mwaa  
nraakyeva mate vahamwenra mwaa ni qu matai  
quaravatama timwa nyivata rievarave, tiro.

*Iutaasiva Iesusira qovarama kyarerero veva  
ntero vura*  
(Matiu 26:14-16; Ruku 22:3-6)

**10** Iesusiva mwitaa tuvaro mwia nraaqiara  
**12** nramwuqitairo mpovanto Iutaasi Isikeriotiva  
 mwiqitairo veva ntero Iesusira qovarama kyaani  
 quara timwa nyinrenro vuva Kotira nraamwuqi  
 Kotira kyaiqa vara mwate varuhua mwihua  
 nronra vaisinramwu timwa nyuvata

**11** mwihua mwia quara qamwata kyeta tiqata,  
 E mwitaa qiarata tire qutaaqama kyeta munima  
 i mwinrenrave, tuvaro mwiaqatairo Iutaasiva  
 Iesusira mwihua kyauquqi kyaani aanranra puaa  
 hi varura.

*Iesusiva nai nraaqiaranramwuvata vekeyahu  
 nyato kyarara nronra*

*(Matiu 26:17-25; Ruku 22:7-14, 21-23; Ioni  
 13:21-30)*

**12** Mpereti hia kyotorara nro entanramwuva  
 nruvata toharo entaraqaa sipisipi nraati rukyo  
 entaraqaa mwia nraaqiaranramwuvanto  
 Iesusira kyapara hita tiqata, Taraqive tire uro  
 terama mwataarara e vekeyahu nyato entarara  
 rieqarama mwi kyarara nrenanrave? tita.

**13** Tuvaro Iesusiva nai nraaqiara taaratana  
 sitero tiqaro, Nkyetana Ierusaremi mwatukya  
 nronraqi vivaro vaisi mpovanto nramanri taqu  
 kyaqa varero nrianriva nkyitana qintorama  
 kyairata mwia vataqita vivaro

**14** mwiva nraamwuqi vera ntairata  
 nkyetanavata mwiqi vera nteta nraamwu  
 qorara mwitaama qiate, Mwaanra ti vari  
 vaisiva iara tiqaro, Ta rumunraqive nte ntena  
 nraaqiaranramwu kyapata vekeyahu nyato  
 kyarara nraaninrave tiho, qiate.

**15** Nkyetana mwitaa tivarо mwiva nkyitana rumu nronra verato vahi rumunra taintavata mwipi teramataiharo vahiraqi nyaamwutairata qio rumu mwipi kyara terama taate, tiro.

**16** Iesusiva mwitaa tuvata mwitanahua uro mwatukya nronraqi taqovaro ekyaa inraikyara tu quava avuqavuma kyero mwivau vahuvata mwitanahua vekyahu nyato kyarara terama kyeta mwatora.

**17** Terama kyeta mwatovaro entama vuvaro Iesusiva nai nraaqiara kyapata nruva nraamwu

**18** mwipi kyara nre variro tiqaro, Nte qianinra riaate. Nkyiqitairo mpovanto nramwutaahua suqaa ni qovarama kyaananrove, tiro.

**19** Mwitaa tuvaro mwia nraaqiaranramwu mwutukyavanto uaquia huvata mwihua kuaiquia kuaiquia vanto Iesusira kyapara hita tiqata, Nianrave tira hiaro? Nte hia mwivave. Nte hia mwivave, timwaqita vita.

**20** Mwitaa tuvaro Iesusiva timwa nyinro tiqaro, Nkyi 12 nramwuqitairo mpovanto nai mpereti vara kyero ni vatama kyero tanuqi mwaati ntamwa kyero nre variariva mwi vaisivama ni qovarama kyaananrove.

**21** Ni mwatani mwatatai nraaqiarara mwitaama kyeta rukyerara haaru qara ntumwa torave. Mwi quava qutaa mwivauma vahiananrove. Ni mwatani mwatatai nraaqiarara qovarama kyaani vaisirara nte po tuqo. Mwia nrova hia mwia mwata kyaataara mwia mwata kyairave, tiro.

*Mperetiaravata uainianravata timwa tora  
 (Matiu 26:26-30; Ruku 22:15-20; 1 Korinti  
 11:23-25)*

<sup>22</sup> Mwitaa tuvata kyara nre varuvaro Iesusiva mpereti vara kyero Kotirara kyuqeve timwa kyero, nteqa kyero nai nraaqiaranramwu nyinro tiqaro, Mwaa kyarara varaate. Mpereti mwaa ni mamantama iho, tiro.

<sup>23</sup> Mwitaa timwa kyero mwiva uaini kaapu vara kyero Kotirara kyuqeve timwa kyero, viti nyuvata ekyaahua kaapu mwikitaita nronra.

<sup>24</sup> Nreta varuvaro Iesusiva tiqaro, Nramanri mwaa ni nraanrema iho. Kotiva nraakye qora kyapata kuaaqi kuairama viro varirero qaraakya qua vatarerove. Mwi quava kepukyaqama quarive tiro, ni nraanrevanto mwi quara kepukyaqama kyaananrove. Ni ru kyaivaro ni nraanrevanto tuminro airi nraakye qora kyaahaqa hiananrove.

<sup>25</sup> Nte qianinra riaate. Nte mate mwaa entaraqaataina tohara kyena hia uaini nranraitina, qati variqi vina nraakiara Kotiva ntaqikyianinraqi variqana mwi entaraqaa qaraakya uaini nraaninrave, tiro.

<sup>26</sup> Iesusiva mwitaa timwa kyero nai nraaqiaranramwu kyapata Kotirara ihi timwa kyeta veva nteta Oripi taaqiqaa vurama.

*Pitaava nraakiara qiani quara Iesusiva nai  
 timwa mwunra  
 (Matiu 26:31-35; Ruku 22:31-34; Ioni 13:36-38)*

<sup>27</sup> Mwinramwuhua mwini varuvaro Iesusiva timwa nyinro tiqaro, Nkyenramwu ni kyeta ntupeqaa hita vivarave. Kotira mpukuqi qara

ntumwa to quava qutaa mwivauma vahianan-rove. Mwitaama tiro:  
 Sipisipiqa ntaqikyi vaisira Kotiva rukyairata  
 sipisipi mwihua nkyiariara nkyiariara  
 mpona mpona vivarave, turave. *(Sekaraiaa 13:7)*

<sup>28</sup> Qio nraakiara ni qati vara sivuma kyairaqe variqana nkyi suni nte nraante Karirini virerave, tiro.

<sup>29</sup> Mwitaa tuvaro Pitaava qaqao tiro, Ekyaa mwinramwuhua i kyeta aatu ntugema kyeta vivaqevata nte nraahu ivatama kyena mwaini varianinrave, tiro.

<sup>30</sup> Pitaava mwitaa tuvaro Iesusiva tiqaro, Nte qianinra riaante. Mate entaqi kokoraaravanto hia taara nani nruqua tirara e taarampo nani nianra tiqara, Hia mwia ntapihurave, tinanrave, tiro.

<sup>31</sup> Iesusiva mwitaa tuvaro Pitaava kepukyaqama kyero qaqao tiro, Hia iara tiqana, Nte hia ntapihurave, qianinrave. Ivatamakyne ni rukyaivaqenavata nte hia mwitaa qianinrave, tiro. Pitaava mwitaa tuvata Iesusira nraaqiara hini mwihuavata kuaa qua mwia nraahu tura.

*Kyaqamwa ututora Kesemaniqi Iesusiva vurama*  
*(Matiu 26:36-46; Ruku 22:39-46)*

<sup>32</sup> Mwiaqaatairo Iesusiva nai nraaqiaran-ramwuvata vuva uro kyaqamwa ututora mwia nrutu Kesemaniqi uro ntero nai nraaqiaranramwuanra tiqaro, Nkyenramwu mwaana mwatakyaa vita varivaqe nte vuturaqi uro Kotiravata qua qiankye, timwa kyero

**33** Pitaaravata, Ioninravata, Iemisiravata, mwinramwuhua nraahu sita varero viro.

Mwinramwuhua nraahu sita varero vuvaro mwia hia kyuqe huvaro

**34** taarampo mwinramwuhuara tiqaro, Ni mutukyavanto nronraqama kyero muaanra ntero niqa piqaro ni rukyaa qara ihanama varuqo. Nkyenramwu nivatama kyeta mwaaqaa variqatama vu ntapairi kyeta viti viri taqe variqata variate, tiro.

**35** Mwitaa timwa kyero mwiva pataqia vututo viro uro mwataqaa tumu ntiro Kotira kyapara hiro tiqaro, Mpo aanra vahirera, nte hia muaanra vahi aanranraqaa quangye, tiro.

**36** Mwitaa timwa kyero mwiva tiqaro, Po hiave, ko, e ekya kyaiqa qio vare variaravave. Nte nriqa quani nramanrinra nraani kaapura e mwi kaapura vara qatinani kyaante. Nte mwitaa qiariravata hia ni mutukya vahira vataqira quante. Ena mwutukya vahira vataqira quante, tiro.

**37** Iesusiva mwitaa timwa kyero uro ntantero nai nraaqiara taaramponramwu kyonani nrumu taqovata mwinramwuhua suvanto tauto-vata vaite varuvaro mwiva Pitaarara tiqaro, Saimonio, e vaiteve variaro? Nanraqamave nkyenramwu nivata pataqia variqata hia vu ntapairi kyeta viti viri taqe variqata variavo?

**38** Nkyiara mwihua uaquia hi kyaiqara ututate tiro, Saataaniva nkyi mwataara hiankyora mwianra rieqata taqe varita Kotirara aakyara nteqata variate. Nkyi mwanraquravanto mwitaa

hiataa iharo nkyi mwamwantavanto nraahu hia  
kepuuyaqa ihata variavo, tiro.

<sup>39</sup> Mwitaa timwa kyero Iesusiva qaiqaa mwihua mwini kyero uro Kotiravata qua tirero mwiva vaakya tu quara mwi quara nraahu qaiqaa tiro timwa taiqa kyero

<sup>40</sup> uro ntantero nrumu taqovata mwia nraaqiaranramwu vu tautovata qaiqaa vaite varura. Iesusiva nri ntovata mwihua sivita kyauriqata Iesusira timwa mwi quava hia vahuvata varuvaro

<sup>41</sup> Iesusiva qaiqaavata uro Kotiravata qua timwa taiqa kyero uro ntantero nrumu taqovata mwihua qaiqaa vaite varuvaro Iesusiva tiqaro, Qikye, nkyenramwu tekya hiqatave vaite variavo? Qio taqaate. Ni tu vare entava nrimaltaih. Ni mwatani mwatatai nraaqiarara ni ntavaaqavuqita uro uaqia hi kyaiqara uti varihua kyauquqi tuta kyevarave.

<sup>42</sup> Sivivaqenramwu quare. Ni qovarama kyaari vaisiva nrimaltaih, tiro.

### *Iutaasiva Iesusira qovarama kyora*

*(Matiu 26:47-56; Ruku 22:47-53; Ioni 18:3-12)*

<sup>43</sup> Iesusiva mwi quara ti varuvaro mwia nraaqiara 12 nramwuqitairo Iutaasiva uro ntero. Iutaasiva uro ntovata mwihavata vaisi airivant paipavata, kyaamwuvata, tu vareta vura. Kotira nraamwuqi Kotira kyaiqa vara mwate varu vaisihua mwihua nronra vaisinramwuvata, mwaanra okyara ti varuhuavata, Iutaa nronra vaisinramwuvantovata, mwihua mwi vaisihua sitovata mwihua Iutaasira vatama kyeta nrunra.

**44** Nruvaro Iutaasiva Jesusira qovarama kyaaninranra mwihua timwa nyinro mwitaama tiro: Nte mwia qua mwanteqana mota kyaani vaisira mwia mwivave. Nkye mwia ntavaaqavu kyeta mwiaqaa kyuqema kye ntaqikyiqi vita uro kyaate, tiro.

**45** Iutaasiva mwitaa timwa kyero mwihua kypata uro ntero mwiva qamwanrama kyero Iesusiva varunani uro ntero tiqaro, Mwaanra ti variara vaisio, timwa kyero mwia mota kyero.

**46** Iutaasiva Jesusira uro mota kyovata Iutaasiravata nrushua uro Jesusira ntavaaqavu kyovaro

**47** Jesusira nraaqasairo mwia nraaqiara mpo vanto paipa nai tuaqitairo veva ntanrau kyero mwiaqotairo vaisi mpo nraato teqa kyovaro tumu ntura. Kotira nraamwuqi kyaiqa vare varuhua mwihua vunyaa vaisi mwia kyaiqa vaisi nraato teqa kyora.

**48** Mwitaama kyovaro Iesusiva Iutaasiravata nrushua uro tiqaro, Qikye, nkye kamaninravatama kyeta ntaqua vaisihuua sitarerata nriantema kyeta ni pitarerata paipavata kyaamwuvata varetave nriavo?

**49** Nte mpo enta mpo enta Kotira nraamwuqi variqana nraakye qora qua mwakyaakya timwa nyi varuqata nkye mwi entara hia ni ntavaaqavuarave. Kotira mpukuqi mwitaa hirara qara ntumwa tova vaiho. Mate mwi quava mwivauma vahiananrove, tiro.

**50** Iesusiva mwitaa tuvata mwihua mwia ntavaaqavu kyovata ekyaa mwia nraaqiaranramwuvanto mwia kyeta aatu ntugeqaa hita vivura.

**51** Qaraakya vaisi kuaikuvanto nraahu tavuna egaroritua rupatova Iesusira vataqiro virera utuvata mwihua mwia taqeta uro mwiavata ntavaaqavu kyaare tita,

**52** tavuna mwi tuara nraahu tu varovaro mwi vaisiva tokyavanto hiantero vura.

*Iutaa nronra vaisi suqaa Iesusira uro kyora  
(Matiu 26:57-68; Ruku 22:54-55, 63-71; Ioni 18:13-14, 19-24)*

**53** Mwia nraaqiaranramwuvanto aatu vuvata mwihua Iesusira vita vareta Kotira nraamwuqi kyaiqa vare varuhua mwihua vunyaa vaisivanto varuraqi uro kyovata Kotira nraamwuqaa ntaqikyi varuhua ekyaahininramwu nronraqama vuhuavata, Iutaa nronra vaisinramwuvata, mwaanra okyara ti varu vaisihuavata, mwihua ekyaah nraamwu mwipi ntuvaantuama vita varura.

**54** Iesusira vitaqita uro kyeta varuvaro Pitaava vutura nyianrasata viqaro mwihua sataqiro vuva vunyaa vaisi nraamwu maata vahunani uro ntero utaqi mwaati ntero mwatukya mwiaqaa ntaqikyi varuhua kyapata mwatakyaa viro variqaro qia taare varura.

**55** Pitaava mwaata mwini varuvata Kotira nraamwuqi kyaiqa varohua nronranramwuvata, ekyaah nronra vaisi mwipi ntuvaantuama vita varuhuavata, Iesusiraqaa qua vateta mwia rukyaare tita, mpo quara puua huvaro hia vahuvata qumina mwia rukye quarara puua hi varura.

**56** Hia qua vahuvata vaisi airivanto apiqama kyeta Jesusiraqaa unra qua nraahu vateta ti varuvaro mwihua quavanto mpo qua mpo qua vahiro, hia kuaa qua vhura.

**57** Mwitaa timwaqita vuvata mpo uhua Jesusiraqaa unra qua vateta tiqata,

**58** Jesusiva mwitaa tihata tire riaunanrave. Mwiva tiqaro, Nte Kotira nraamwu vaisivanto nkyiari kyauquqo hoqataara ntapairi kyena nte taarampo enta variqana hia kyauquqo vareqana qaiqaa nraamwu mwia hoqa kyaaninrave, tirave, titi.

**59** Mwi vaisihua mwi quaravata tiqata hia ntapihi kyeta kuaa qua turama.

**60** Mwitaa tuvaro Kotira kyaiqa vara mwate varuhua mwihua vunyaa vaisivanto mwihua suqaa siviro Jesusira kyapara hiro tiqaro, Mwihua mwitaama kyeta iqaa qua vateta ti variavo. E mpo? Mwihua mwi quara iara qiera e nanra quave nkyiari timwa nyinanrave? tiro.

**61** Tuvaro Jesusiva hia qua tiraitiro, tirema varuvaro qaiqaa mwiva mwia kyapara hiro tiqaro, Qutaave Kotiva i titaihara e tiri kyaahaqa hirava Mesaiaavanto variaro? Qutaave e Kotira mwaaquvanto variaro? Tiri timwa timwinraqe riaare, tiro.

**62** Mwiva mwitaa tuvaro Jesusiva tiqaro, Nte mwaa mwivave. Nkye nraakiara taqaivage nte mwatani mwatatai nraaqiarava nronraqama vina Kotiva kepukyavanto varianinra mwia kyauqu kyaatutani varina tonamwuqi tumuaninrave, tiro.

**63** Iesusiva mwitaa tuvaro Kotira kyaiqa vara mwate varuhua vunyaa vaisivanto nai tuavaaqaa nrahitu kyero tiqaro, Qikye, qumina vaisi kyaatavanto mwiaqaa qua vatehua nyaanrevorave.

**64** Riaate. Nkye airivanto variavaro mwiva Kotira vuqaa variqaro uaquia hi quara tiho. Mwia kyaara nkye nanreve Iesusirara tivarave? Tivaqe riaankye, tiro. Mwitaa tuvata mwihua tiqata, Mwia qora kyaiqvavanto nritaraiho. Mwia kyaara mwia rukyaarava nraahuma vaiho, tita.

**65** Mwitaa timwa kyeta hini uhua uro Iesusiraaqaa taara vihikye mwiaqataita Iesusiva hia qio taqaarive tita, mwia vuqaa tavunaqo rupateta vireraqama kyeta mwia ntuqutu kyeta tiqata, Tavave i ntuquтиho? Hia taqaraitira, i ruani vaisira nrutu tiraqe riaare, tita. Mwitaamaqi vita Iesusira uaqiamma mwatovata piponramwuvantovata mwia vita kyeta kyauquqo ntuqutuqita vurama.

*Pitaava Iesusirara hia taqau vaisirave tura  
(Matiu 26:69-75; Ruku 22:56-62; Ioni 18:15-18,  
25-27)*

**66** Nraamwuqi Iesusira uaqiamaqita vi varuvaro Pitaava mwaatani mwatuqyaqaa mwatakyaa viro varuvaro vunyaa vaisi mwia kyaiqa nraakye mpovanto nritareqaro taqovaro

**67** Pitaava qia taare varuvaro mwia ntapihi kyero taqero tiqaro, E Iesusira Nasaretinyaa vaisintiri variaravave, tiro.

**68** Tuvaro Pitaava qaqao tiro, E nanra quave qiaro? E qiana quara nte hiama ntapihuqo, tiro. Pitaava mwitaa timwa kyero uro nronraanrana varuvaro kokoraaravanto nruqua tiro.

**69** Pitaava mwini varuvaro kyaiqa nraakyе mwiva qaiqaa mwia taqero mwini sivita varuhuara tiqaro, Vaisi mwiva mwia nramwunaave, fuvaro

**70** Pitaava qaqao hiave nraahu tiro.

Mwitaa timwa kyero pataqia varuvata qaiqaa mwini sivita varuhua Pitaarara tiqata, Iesusira nraaqiaranramwu Karirinyaahua variavara quutaama evata mwinyaavama variaro, tita.

**71** Mwihua mwitaa tuvaro Pitaava kyauqu nriqiqaa vatero tiqaro, Nte unra qiankyera Kotiva qioma ni ruananrove. Nte quutaama tuqo. Nkye ti varia vaisira nte hia mwia taqaurave, tiro.

**72** Mwitaa tuvaro qamwanrama kyero kokoraaravanto qaiqaa nruqua tuvaro Pitaava mwiaqaatairo Iesusiva timwa mwu quara mwianra riero. Iesusiva Pitaara timwa mwiqanro mwitaama tiro: Mate entaqi kokoraaravanto hia taara nani nruqua tirara e taarampo nanima nianra tiqara, Nte hia mwia taqaurave tinanrave, tu quara mwianra riovoro mwia mwutukyavanto uaquia huvaro Pitaava ntatora.

## 15

*Iesusira Pairaativa hunani vitaqita uro kyora  
(Matiu 27:1-2, 11-14; Ruku 23:1-5; Ioni 18:18-38)*

**1** Mwia qanranraa toqaqi Kotira kyaiqa vara mwate varu vaisihuua mwihua nronra vaisinramwuvata, Iutaa nronra vaisinramwuvata, mwaanra okyara ti varu vaisihuavata, ekya kaanasorinramwuvata, mwihua ntuvaantuama vita variqata mwihua qua ti okyarara timwa

avuqavuma kyeta Jesusira seniqotaita mwia rupa vareta Paireativa kamaninra nronra vaisivanto varuraqi uro kyora.

<sup>2</sup> Uro kyovaro Paireativa Jesusira kyapara hiro tiqaro, Qutaave e Iutaa vunyaa vaisivanto variaro? tuvaro Jesusiva tiqaro, E qiananra nte mwaa mwivama iho, tiro.

<sup>3</sup> Mwitaa tuvata Kotira kyaiqa vara mwate varu vaisihua mwihua nronra vaisinramwuvanto mpo qua mpo qua kyaara Jesusira inronra hi varuvaro

<sup>4</sup> Paireativa mwihua qua rieqaro qaiqaa Jesusira kyapara hiro tiqaro, E hiave mwia hiniqama nkyiariara tinanrave? Mwihua airi qua kyaara i inronra hi variavo, tiro.

<sup>5</sup> Mwitaa tuvaro Jesusiva qaiqaa hia qua tiraitiro, kepukyaqama kyero varuvaro Paireativa airi nraato ti varura.

### *Jesusira kyatariqaa rutaate tura*

(Matiu 27:15-26; Ruku 23:13-25; Ioni 18:39-19:16)

<sup>6</sup> Mpo ihi mpo ihi vekyahu nyato kyarara nro entaraqaa kamaninra vunyaa vaisivanto nraakye qora qamwata nyatarero karavu vaisi mpo huvantu kyero titovaro mwaatani vura. Nraakye qoravanto mwi vaisira huvantu timwa taante tuvaro mwi vaisira huvantu nyate varura.

<sup>7</sup> Mwi entara vaisi mponramwuvanto kamaninravata ntaqura kyaara karavuqi varuvaro mwi vaisinramwuhuaqitairo mpovanto mwia nrutu Varavaasiva mwiva vaisi rukyora kyaara karavuqi varura.

<sup>8</sup> Qio mwi entaraqaa nraakyе qoravanto ntuvantuama vita variqata karavu vaisi huvantu kyaaninra mwianra rieqata ntuvantuama vita varuvaro

<sup>9</sup> Paireatativa mwihua kyapara hiro tiqaro, Nte karayugitaina ta vaisirave huvantu nyataaninrave? Iutaa mwatanaa vunyaa vaisi mwiave nte huvantu nyataaninrave? Nkye timwa mpivaqe riaankye, tiro.

<sup>10</sup> Paireatativa ntapihi kyovata nronra vaisinramwuvanto Iesusiva nronraqama quankyorave tita, Iesusira inronrama mwateta mwihua mwia vitaqita uro Paireatira kyauquqi tuta kyora.

<sup>11</sup> Paireatativa karavu vaisi tarave huvantu nyataaninrave timwa kyero, nraakyе qora kyapara huvata Kotira kyaicq var a mwate varu vaisihua mwihua nronra vaisinramwuvanto uro nraakyе qora utaqaa variqata kepuqya qua mwihua timwa nyita tiqata, Hia Iesusira huvantu timwa taante. Varavaasira huvantu timwa taante qiate, tita.

<sup>12</sup> Mwi nraakyе qorahua rapateqa tuvata mwihua Varavaasira huvantu timwa taante tuvaro Paireatativa qaiqaa nraakyе qora kyapara hiro tiqaro, Nkye Iesusirara tiqatama, Iutaa vunyaa vaisivantove, qiarave. Nte mwi vaisira nataave hianinrave? tiro.

<sup>13</sup> Mwitaa tuvata mwihua aakyara nteta tiqata, Mwia kyatariqaa rutaate, tita.

<sup>14</sup> Mwitaa tuvaro Paireatativa qaiqaa mwihua kyapara hiro tiqaro, Mwiva nanra uaqia hi kyaicqara utu kyaihatave mwitaa qiavo? tuvata mwihua qati nraahu paatita aakyara nteta tiqata, Mwia kyatariqaa rutaate, tita.

**15** Mwihua mwitaa tuvaro Paireativa nraakyе qora qamwata nyatarero Varavaasira huvantu nyatero mwiaqaatairo nai ntaqu vaisihuara Iesusira kyaamwuqо ntuquutuate tuvata mwihua mwia kyaamwuqо ntuqutu kyovaro mwiaqaatairo mwia kyatariqaa rutaate tiro, Paireativa Iesusira nai ntaqu vaisihua kyauquqi tuta kyora.

*Ntaqu vaisihua Iesusirara raivuvuma mwateta mwia ntuquitura*

*(Matiu 27:27-31; Ioni 19:2-3)*

**16** Paireativa nai ntaqu vaisihua kyauquqi Iesusira tuta kyovata mwihua mwia vitaqita uro kamaninra nraamwuqи kyeta mwihua nkyiari hena ntaqu vaisihua ekyaa nyaanrama ntuvaantuama kyeta

**17** mwia vireraqa hiqata vunyaa vaisi tavuna nraanre tavuna rupa mwateta mwiaqaataita tauvera vara kyeta qiata vaisi tovaqa voti huru ququrama kyeta Iesusira qiataqaa qumwa tora.

**18** Mwitaama kyeta nkyiari kyauqu tiriqa vateqata kumwaanri mwitaa titi tiqata, Iutaa vunyaa vaisio, variqarave? titi.

**19** Mwitaa timwa kyeta mwihua kyaamwuqotaita mwia qiata ntukamu kyeta, mwiaqaa taara vihi kyeta, mwia vuqaa tori kyauru ravi variqata qati vireraqama kyeta mwia qamwata mwateqata varura.

**20** Mwitaamaqi viqata vireraqama kye raima mwateta mwiaqaataita mwihua nraanre tavuna rupa mwatora huvantu kyeta nai tuavaaqa utu

mwateta mwia kyatariqaa ninri rukyeta hiritarerata Jesusira vita vareta vurama.

*Iesusira kyatariqaa ninri ru kyeta hiritora*

*(Matiu 27:32-44; Ruku 23:26-43; Ioni 19:17-27)*

**21** Ntaqu vaisinramwuhua Jesusira kyatariqaa ninri ru kyeta hiritaare tita, mwia vita vareta mwatukya mwaaqani aanraqaa vi varuvaro vaisi mpovanto mwia nrutu Saimoniva mwatukya nronraqi virera huvata mwihua mwia antua kye kepukyaqama kyeta tiqata, Jesusira ru kyeta hirite kyatarira vara quqira uro mwataante, tuvaro Saimoniva vara quqiro uro mwatora. Saimoniva mwata Sairininyaava mwiva Arekisantaakya Rupukya sova varura.

**22** Mwihua Jesusira vitaqita uro qumina mwata Korokotaave tunani kyora. *Korokotaa* mwaan quaraqitai tirera, *Qiata Mwukyaariqaave*, tunani Jesusira uro kyora.

**23** Uro kyeta uaini mwipi ukavu inraikyara tuqasaa kye vato nramanrinra mwia mwinrenra huvaro Jesusiva hia nrenro.

**24** Hia nrovata mwihua mwia kyatariqaa ninriqotai rukyeta mwia tuavaaqa vara kyeta tahuave qio varevarave timwa kyeta, kaati ruantema kyeta ori tuto kyeqata mwia tuavaaqa ntainra kyeta varora.

**25** Toqaqi huarivanto nrinro virisataqa huvata Jesusira kyatariqaa rutora.

**26** Mwia kyatariqaa ruteta Jesusira qiatani quambo, mwia ko timwa mwato quara qara ntumwa teta kyatariqaa rutora. Mwi quava mwitaama tiro:

IUTAA VUNYAA VAISIVE, tiro.

Mwi qarava mwitaama kyero vhura.

<sup>27</sup> Mwihua Iesusira kyatariqaa ruteta Iesusira vatama kyeta vaisi taaratana rutora. Mwitanhua mpuara vare varutanahua varuvata mpo Iesusira kyauqu kyaatutani ninri ruteta mpo Iesusira kyauqu kyaantaaqani ninri rutora.

<sup>28</sup> [Iesusira vatama kyeta mwitaama rutorara tiro, Kotira mpukuqi qua mpo qara ntumwa tova mwivau vhura. Mwitaama tiro: Mwiva uaqia hi vaisihua vatama kyero variananrove, tura.]

<sup>29</sup> Mwitaama kye rutowata nraakye qoravanto vitare nritare hiqata viri taqeta nkyiari mwaunru miqi kyeqata Iesusirara uaqia hu quara timwa mwateta tiqata, Qikye, e tiqarama, Kotira nraamwu ntapairi kyenama taarampo entaqaa kyaiqa vareqanama qaiqaa hoqa taiqa kyaaninrave, qiaravave?

<sup>30</sup> Qio ena kyaahaqa hiante. E kyatariqaataira mpiami ntaante, tita.

<sup>31</sup> Mwihua mwitaa ti varuvata mwihua tuntema kyeta Kotira kyaiqa vara mwate varuhua mwihua nronra vaisinramwuvata, mwaanra okyara ti varu vaisihuavata, mwihua Iesusirara raima mwateta tiqata, Mwiva mpohua nraahu kyaahaqa hi variva hiama qio nai kyaahaqa hirove.

<sup>32</sup> Mwiva Kotiva titai vaisiva Mesaiaavantove, Isareru vunyaa vaisivantove, qiavata riaunranrave. Kyai tire variqata taqaararo mwiva kyatariqaatairo mpiami ntero tuminrenra, tire mwianra qutaave qiare, tita.

Mwihua mwitaa tuvata mwihua nraantanteta mpuara vaisitana Iesusira vatama kyeta

rutotanahua, mwitanahuavata mwia uaqia hu quara timwa mwate varura.

*Iesusiva qutu vura*

(*Matiu 27:45-56; Ruku 23:44-49; Ioni 19:28-30*)

<sup>33</sup> Mwitaa huvaro ihera mwutukya tavaara ekyaa mwi mwataraqaa entama tero vahiqi vuvaro huarivanto vitira tavaarana tumi vuvaro qaiqaa ntuvahama vura.

<sup>34</sup> Qaiqaa ntuvahama vuvaro Iesusiva nai quaqitairo aakyara ntero tiqaro, *Eroi, Eroi, rama sapakitani*. Kotio, Kotio, nanraqamave ni qaqla kyera hiarao? tiro.

<sup>35</sup> Iesusiva mwitaa tuvata mpo uhua mwini sivita varuhua mwia qua rieta tiqata, Mwiva Iraisaara tiri haivaqara nraanraiho, tuvaro

<sup>36</sup> mpovanto hiantero ukavu uaininra kyaqa kyero kyaamwu kati kyero mwiaqaa huairi kyero viri Iesusira nrona vatero tiqaro, Kyai variqata taqaararo Iraisaava mwia kyaahaqa hirero tumaninra taqaare, tiro.

<sup>37</sup> Mwitaa tuvaro Iesusiva nronraqama kyero aakyara ntamwa kyero qutu vura.

<sup>38</sup> Iesusiva qutu vuvaro Ierusaremini Kotira nraamwuqi tauha voti hora tavuna nronra hiritova virisairo utaqaa nrahituqiro tuminro mpiani tumu kyora.

<sup>39</sup> Ntaqu vaisihua vunyaava Iesusira ruto kyatirira nraaqani varuva taqovaro Iesusiva nronraqama kyero aakyara ntamwa kyero qutu vuvaro mwiva tiqaro, Qikye, qutaama vaisi mwaava Kotira mwaaku variva qutu viho, tiro.

**40** Iesusiva qutu vuvata nraakyе mponramwuvanto nyianrasata variqata taqe varura. Mwinramwuhuaqitairo hininramwu nyutu vahirero. Mariaava Makataranyaava mpo, Mariaava Iemisiva nraakiaraa vaisi mwiavata Iosisiravata nyova mpo, Saromeva mpo, mwihua mwini varura.

**41** Nraakyе mwinramwuhua Iesusiva Karirini nrohu entara mwia vataqita nrohiqata mwia kyaiqa kyaahaqama mwato nraakyenramwuhua varuvata nraakyе mponramwuvata mwini varura. Mwihua Iesisiravatama kyeta nruhua Ierusaremini varura.

*Iesusira quintamwa tora*

(*Matiu 27:57-61; Ruku 23:50-55; Ioni 19:38-42*)

**42-43** Entama virera huvaro Iosepiva Arimatanyaava nri ntora. Mwi vaisiva vaisi kyuqeva kaanasorivanto variqaro Kotiva ntaqikyiani entava nrianinranra taqeqaro mwia vekya varuva nri ntero, hora Iutaa mwaanra enta vahianinranra riero hia aatu hiraitiro, uro Paireatirara Iesusira mwamwantara kyapara hiro tiqaro, Mwia mpiraqe varaqina uro quantaakyе, tiro.

**44** Mwitaa tuvaro Paireativa Iesusiva qamwanrama qutu vurara airi nraato tiro ntaqu vaisira mpo nraanrama kyero kyapara huvaro mwi vaisiva tiqaro,

**45** Qio quitaama qutu viho, tuvaro Paireativa Iosepirara tiqaro, Qioma mwia mwamwanta varaqira uro quintamwa tenanrave, tiro.

**46** Mwitaa tuvaro Iosepiva egarori tavuna kyoqaama kyero Iesusira mwamwanta kyatariqaatairo itu kyero egarori tavuna mwiaqotairo qapuqama kyero uro vaisi

quntarera ori vaurutoraqi vera vatero ori nronra mpo ventaqiro uro mwia nrona tita tora.

<sup>47</sup> Mariaava Makataranyaavavata, Mariaava Iosisira nrovavata, taqe varuvata Jesusira origi vera vatora.

## 16

*Iesusiva qutu vuraqitairo sivura*

*(Matiu 28:1-8; Ruku 24:1-12; Ioni 20:1-10)*

<sup>1</sup> Saarareqa Iutaavanto mwaanra tu entava taiqovata Mariaava Makataranyaaa nraakyevantovata, mwia qamwava Iemisira nrovavata, Saromevavata, mwi nraakyenramwuhua munima kyeta kyuqema kyero mwunta vu inraikyara vareta Jesusira mwamwantaqa qumwatarerata vura.

<sup>2</sup> Saante toqaqi huarivanto mate nrintoraqi mwinramwuhua Jesusira quntamwa toraqiara vura.

<sup>3</sup> Aanrani viqata mwinramwuhua nai kyapara hi nai kyapara hi tiqata, Tire mwini uro ntaararo tavave ori nronra qesana titataara vara kyaananrove. Ori mwia nronra nrusi ntamwa taarave, tita.

<sup>4</sup> Mwitaa timwa kyeta mwinramwuhua nri nteta taqovaro ori nronra mwia nrusi venta kyovaro qatinani vahura.

<sup>5</sup> Orivanto mwitaama vahuvata taqeta mwinramwuhua origi vera nteta taqovaro vaisi mpo qaraakya vaisivanto ebarori tuavaaqa ututo vaisiva mwiqi hini kyaataaqi mwatakyaa viro varura. Mwiva mwiqi varuvata mwia taqeta aatu huvaro

**6** mwiva mwihuara tiqaro, Hia aatu hiate. Iesusira Nasaretinyaanra kyatariqaa rutaan vaisira, nkyenramwu mwianrave puua hi variavo? Mwiva hia mwaaqi variho. Mwiva qatima siviho. Nkyenramwu mwaini taqaate. Mwaaqi mwia vataaraqi hiama variho.

**7** Qio mwaa quara vareta uro mwia nraaqiaranramwuvata, Pitaaravata, timwa nyiate. Mwitaama timwa nyiate. Mwiva nraante nkyi suni Karirinima viho. Nkyenramwuvata mwini vita uro mwia taqevarave. Tauraa qati variqaro mwianra nkyi timwa nyunra mate mwivauma vaiho. Mwi quara timwa nyiate, tiro.

**8** Mwiva mwitaa tuvata aatu hiqatara tita, mwinramwuhua Iesusira quntamwa toraqitaita veva nteta hiantamwa teta aanrani viqata hia mpohuavata timwa nyinraitita, vura.

*Iesusiva Mariaara Makataranyaanra vuqaa qovarama vura  
(Ioni 20:11-18)*

**9** [Iesusiva Saante toqaqi qutu vuraqitairo siviro vuni mwiva Mariaara Makataranyaanra vuqaa nraante qovarama vura. Haaru Iesusiva nraakye mwia utaqitairo vaana 7 nramwu sitovata nritare vu nraakyera vuqaa qovarama vuvaro

**10** Mariaava uro Iesusira nraaqiaranramwu timwa nyinrenro vuva uro taqovata mwihua Iesusirara ntate varura.

**11** Ntate varuvaro mwiva mwihua timwa nyinro tiqaro, Iesusiva qatima siviro variho. Nte ntene puquotaina mwia taqauqo, tuvata mwihua hia mwia quara qutaave tura.

*Iesusiva nai nraaqiara mpotana suqaa qovarama vura  
(Ruku 24:13-35)*

<sup>12</sup> Mwi entara Iesusiva nraahumwa mpo qarama kyero nai nraaqiara taaratana suqaa qovarama vura.

<sup>13</sup> Mwitanahua aanraqaa vi varuvaro Iesusiva qovarama vuvata mwihua mwia taqeta uro ntanteta nrumu hini mwihua timwa nyuvata mwihua hia mwitanahua quara quataave tura.

*Iesusiva nai nraaqiara 11 nramwu suqaa qovarama vura*

*(Matiu 28:16-20; Ruku 24:36-49; Ioni 20:19-23)*

<sup>14</sup> Qio nraakiara ekyaara Iesusira nraaqiara 11 nramwuvanto kyara nre varuvaro Iesusiva mwihua suqaa qovarama vura. Iesusiva qati siviro varuvata mpo uhua mwia taqeta uro Iesusira nraaqiaranramwu timwa nyuvata mwihua mwi quarara unra quave timwa kyeta varuvarora tiro, Iesusiva nkyiari suqaa qovarama viro mwia kyaara mwihua inronra hiro tiqaro, Nkye mwi quarara quataave qitaara vaihatama nkye kepukyaqama kyeta variqata hia quataave qiaavo, tiro.

<sup>15</sup> Mwitaa timwa kyero mwihua timwa nyinro tiqaro, Nkye ekya mwata maata nrohiqata ekya nraakye qora kyuqe qua mwaa timwa nyiate.

<sup>16</sup> Timwa nyivaro ni quara quataave timwa kyero, nramanri varaani vaisira, mwiamma Kotiva qio vitaananrove. Ni quara hia quataave qiani vaisira Kotiva hia mwia vitaraitiro, mwiaqaa qua vataananrove.

<sup>17</sup> Ni quara quataave tihua, mwihuama nronra kyaiqa mwataa hianinra qio varevarave. Mwihua ni nutu nteqatama vaana titavata vivarave. Mwihua nraahumwa mpo mwatanaa quavata qio tivarave.

<sup>18</sup> Mwihua quaiha tu varaivaro mwi inraikyava hia mwihua ruananrove. Mwihua tuhi nramanri nraivaro tuhi nramanrivanto hia mwihua ruananrove. Mwihua nriqa vihuaqa kyauqu vataivata mwihua kyuqema vivarave, tiro. Turama.

*Kotiva Iesusira vitovaro nyaamwuni vura  
(Ruku 24:50-53; Kyaiqa Varora 1:9-11)*

<sup>19</sup> Nronravanto Iesusiva nai nraaqiaranramwu kyapata qua timwa nyi taiqa kyovaro Kotiva mwia nyaamwuni vitero vuvaro mwiva mwini nronraqama viro Kotira kyauqu kyaatutani mwatakyaa virero vurama.

<sup>20</sup> Iesusiva nyaamwuni vuvata mwia nraaqiaranramwuvanto mwata maata vahuntema nrohiqata Iesusirara timwa nyi varuvaro nronravanto Iesusiva mwihua kyaahaqa hi varuvaro mwihua kyaiqvanto kepukyaqama viro nritarero vahuvatara tita, nraakyae qoravanto taqovaro mwihua quavanto quataa qua nraahu vhura.]

**QARAAKYA QUA TIMWATORA  
The New Testament in the Omwunra-Toqura (South  
Tairora) Language of Papua New Guinea  
Nupela Testamen long tokples Omwurna-Toqura long  
Niugini**

copyright © 2000 Wycliffe Bible Translators, Inc.

Language: Omwunra-Toqura (South Tairora) (Tairora, South)

Dialect: Omwunra-Toqura

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 28 Dec 2024 from source files dated 31 Aug 2023

73e2f29d-4ca4-50e6-a471-722ac8ab5666